

VASEGA MATUTUA 2026

ASO SA: 25 IANUARI 2026
(ASO SA O TUPULAGA)

MATAUPU: I LE AMATAGA: FAAIGOAINA O MEAOLA. (*In the beginning; naming the creature*)

SINI: Ia malamalama le vasega, na faaigoa e le tagata meaaola i le amataga.

TUSI FAITAU: Kenese 2: 19 - 25.

FESOASOANI MO FAIAOGA:

O le fuaiupu e ogatotonu ai le tatou mataupu i lenei Aso Sa, Kenese 2: 19; Na faia e le Alii le Atua i le eleele o manu vaefa uma lava, ma manu felelei uma lava, na ia aumaia ia Atamu ia iloa pe ni a ni igoa na te faaigoa ai; o le igoa ua faaigoaina ai e Atamu i mea ola uma o lona igoa lea.

I le tatou tusi faitau o lenei Aso Sa, o lo o aumai ai se ata taua i le amataga o le foafoaga ma le faatulagaina o mea uma e le Atua mo le ola o le tagata, mafutaga, ma le tiute tauave. I le fuaiupu lava e 19 o lo o faamatalaina ai, le finagalo paia o le Atua, ma lana tofiga na tuuina atu ia Atamu, o le faaigoaina lea o manu. E mafai lava e le Atua ona tuuina atu igoa i manu uma na Ia faia, peitai, na ia filifili e aumaia i latou, ina ia faaigoaina e ia. O lenei mea na

1. Pule ma le Tiute tauave a Tagata:

Ua tuuina atu e le Atua i tagata le pule e tausia ma pulea mea uma o le foafoaga (Kenese 1: 26 - 28). O le faaigoaina o manu e le gata i se igoa, ae o se faailo o le pule, le tiute tauave ma le vaaiga aoao a le tagata i mea ua foafoaina.

2. Foafoaina ma le Galulue faatasi ma le Atua.

O le tuuina atu o igoa i manu, o se faailoga o le tomai, e na te faatupu mai ai mea, o le malamalama o le mafaufau o le Atua ua faasoa mai mo le tagata. O le faailoga lava, o le finagalo alofa o le Atua mo lana tagata, ina ia galulue fai paaga ma Ia.

3. I le faaigoaina o manu taitasi na iloa ai e Atamu, e leai se manu e tutusa ma ia, po o se soa moni mo ia. O lea na saunia ai loa le ala mo le foafoaina o le fafine. (fuaiupu 21-22)

4. O le faatulagaga ma le mafutaga i le Foafoaga, o le faaigoaina lava na aumaia ai le faatulagaga. Ua maua e manu uma se igoa ma o latou tulaga. E le gata i lea, ua mafai ai e tagata ona iloa le mafutaga ma mea ola, i auala tatau, manino, le tāua ma le mafana e taua i le fesootaiga.

Ua mae'a ona faaigoaina manu uma, e le i i ai lava se soa talafeagai mo Atamu. (fuaiupu 20). Ona faia lea e le Atua o

le fafine mai le ivi 'aso'aso o Atamu, o se soa atoatoa, po o se fesoasoani tatau mo ia. Na faaleo atu e Atamu i le fuaiupu 23; "O le ivi lava lenei o o'u ivi, ma le aano o o'u aano." O ia upu, o le uluai gagana lea ua faalogoina a se tagata mai le Tusi Paia. O le faailo o le fiafia ina ua maua se mafutaga moni. Ua faaiuina la tatou mataupu i le faavaeina o le faaipopipoga, o se mafutaga o le lotogatasi, le faamaoni ma le alofa.

E pei ona tuuina atu e Atamu igoa i manu taitasi, ua tuuina mai foi e le Atua ia i tatou uma igoa ma se tiute faapitoa. E leai se tasi e le taua i le silasila a le Atua.

O le faaigoaina o manu, o se faailoga o le vaaiga a tagata i meaola uma. O lo tatou valaauina foi lea i le taimi nei. Ia tausia le siosiomaga ma mea ola uma.

E lē na o i tatou e galulue, ae ua valaauina i tatou e le Atua e galulue faatasi ma Ia. E pei ona faaigoaina e Atamu manu, ua valaaulia foi i tatou e faaoga meaalofo o loo ia i tatou mo le finagalo o le Atua.

E lē mafai ona sui e galuega ma tofiga le fia maua o mafutaga moni. Na faaalua ia Atamu le manaomia o se soa, po o se fesoasoani, ma ua a'oa'oina ai i tatou, e tāua le mafutaga ma le Atua ma isi tagata.

Ua a'oa'o mai lenei mataupu Kenese 2: 19 -25. I le amataga, ua foaiina atu e le Atua i tagata le pule, le tiute tauave, ma le meaalofo o le ola mafuta. O le faaigoaina o meaola, e le gata o se valaauina i le galuega, ae o se faailoga o le so'otaga i le Atua.

I lenei lava vaega o le Tusi faitau, o se faamanatu, mo i tatou, e le gata ina ua foaiina mai e le Atua ia i tatou galuega ma le

pule, ae ua Ia foaiina mai foi mafutaga ma le alofa. E pei ona galulue faatasi Atamu ma le Atua i le faaigoaina o manu, o le feau tumau foi lea mo i tatou i aso nei ma aso uma, ia tatou galulue faatasi ma lo tatou Atua i le tausia o lana Foafoaga ma le tausisia o mafutaga paia ua foaiina mai.

O le tatou mataupu lena i lenei Aso Sa. Ia manuia outou le fanau i lenei Aso Sa paia. Ona o Iesu, Amene.

Uiga o Upu:

- i) toina. - ua aveese i se gaioiga faapitoa
- ii) fesoasoani. - soa

GALUEGA FAATINO: (Fa'aaliga manatu)

Ia faailoa mai ni mafuaaga se lua, na finagalo ai le Atua, e aumaia meaola uma ia Atamu e na te faaigoaina.

Ia ta'itolu laina mo le manatu e tasi.

PESE: Pese ma Viiga 91

A'OA'OGA:

1. Ia tausia lelei meaola uma.
2. Ia tatou galulue faatasi mo le manuia o mea uma.
3. E finagalo le Atua tatou te galulue faatasi ma Ia.

.....

ASO SA: 1 FEPUARI 2026

MATAUPU: VALAAU I LE IGOA (*Name Calling*)

SINI: Ia malamalama le vasega, ua valaauina i tatou e le Atua i o tatou igoa.

TUSI FAITAU: Isaia 43: 1 - 7

FEAOASOANI MO FAIAOGA:

O le tatou mataupu i lenei taeao o le Aso Sa, o se faamafanafana ma se faamoemoe mo Isaraelu i taimi o le fefe, o le faatafeaina, ma le le mautonu.

Sa feagai Isaraelu ma le ola tete'e, ma faamasinoga amiotonu ma le faatafeaina, a o le Atua e ala i lana perofeta o Isaia, na faamanatu atu ia i latou, e le galo lava i latou i le Atua. O loo tumau pea ona avea i latou o ona tagata filifilia ua valaauina i lona Suafa, ua faia mo lona MAMALU, ma ua laveaiina i lona mana.

I le fuaiupu muamua, ua fetalai ai le Atua; A o lenei, o lo o faapea ona fetalai mai o le Alii, o Le na faia oe, Iakopo e, ma ua faia oe, Isaraelu e, 'aia le fefe, aua ua faatauanauiina oe, ua ou valaauina i lou lava igoa, e faia oe mo'u. O le gagana lea o le mo'u, po o le ana, o le gagana o le pule, ma le e ona le meatotino.

E le silasila le Atua ia Isaraelu o se Malo ma se nuu o lo o lotolotoi i totonu o malo o le lalolagi, a o se totino patino ia te Ia, o se Oloa tautele.

O le ta'ua o le igoa, o se faailoga patino lona faaaogaina, e taua ma paia, le aiātatau a le Atua i ona tagata. I le fuaiupu 2 - 4, ua faamautinoa mai ai e le Atua, e tusa lava pe ui atu i vailoloto o le afi, po o ni tofotofoga, e le faaumatia i latou, auā e iai pea le Atua i lo latou ogatotonu. O nei ata e faasino i puapuaga ma faigata o le olaga, ae o le valaauina e le Atua, e tuuina mai ai le faamoemoe ma le saogalemu. O le fuaiupu e fitu (7) o lo o ogatotonu i ai la tatou mataupu, e faapea, o i latou uma ua igoa i lo'u igoa, na ou faia ia viia ai A'u; na a'u gaosia ma 'ou faia lava i latou. Ua fa'aalia iinei ni manatu se tolu (3).

1. Ua valaauina i le Suafa o le Atua.

O lona uiga o Lē e ana. i le lalolagi anamua, sa avea le igoa o se faailoga o ie e ana le tulaga ma le faasinomaga. O le valaauina i le Suafa o le Atua, o se faailoga lea e fai ma sui o Ia i le lalolagi.

2. Ua fausiaina mo le Mamalu o le Atua:

E le'i faia fua tagata, ae ua faia mo se mafuaaga taua - o le faamamaluina o le Atua; o le olaga o tagata uma e iai le uiga moni o le fa'aalia lea o le mamalu ma le matagofie o le Atua i le lalolagi.

3. Ua Fausia ma Fausiaina e le Atua:

Ua faailoa ai le faatinoina o le galuega a le Atua i tagata. E pei ona Ia faia Atamu mai le efuefu, ua Ia faia foi ona tagata ta'itoatasi i se faamoemoe lelei ma le maua luga, ma paia. O se faamanatu e lē gata i le

foafoaga, ae faapea foi le toe faafoisia pea foi le tafeaga, o ese mai le agasala ma le tosina atu i Atua faapaupau a nuu ese. I le vaaiga aoao i le tatou mataupu, ua folafola e le Atua le togiola. E ui i le ola agasala o lona nuu, ua laveaiina pea i latou e Ia.

Ua folafola foi e le Atua, e i ai pea tofotofoga. O le afi ma le vai e fai ma ata o faigata o le olaga, ae lē mafai e ia mea ona faaumatia tagata o le Atua. Ua toe faamanatu foi e le Atua ia Isaraelu, o Ia o le Paia o Isaraelu, o le Faaola ma le Faasa'o.

Ua Ia faamaonia i ona tagata le tāua ma lona alofa ia i tatou o ona tagata. O i latou o Lana oloa tāua, ua lē o lona malosi, a o lana filifiliga ua avea ai i latou e fai ma ona nuu. O le taualuga o le finagalo o le Atua: O tagata uma ua valaauina i le Suafa o le Atua, ua faia mo lona mamalu, ma ua ia fausia. O lo tatou faasinomaga e sau mai le Suafa o le Atua. E pei ona valaauina Isaraelu i le Suafa o le Atua, ua valaauina foi i tatou i le Suafa o Keriso. O le Suafa o Keriso mo tatou faasinomaga. Na fausia i tatou mo le mamalu, ae le mo le masiasi. I taimi o faigata, e faigofie ona galo lo tatou aoga. Ua faamanatu mai le tatou mataupu o tatou na faia mo le mamalu o le Atua.

O le Atua e i ai pea i tofotofoga. E le o lona uiga o le a leai i ai ni puapuaga, ae o le a le tu'ulafoaiina i tatou e le Atua i ia taimi o puapuaga. E toe faaleleia lo tatou leaga faia e le Atua. E pei ona folafola e le Atua, na te toe aumaia Isaraelu mai itu uma, e faapena foi le toe faatasia e le Atua i tatou i lona malo faavavau. O le valaauina i le suafa o le Atua, o le

faailoga o le alofa ma le e ana i tatou. Auā ua Ia ta'ua i tatou o lana fanau ma ona tagata. Ua silafia i tatou e le Atua i o tatou igoa, ua Ia faaola i tatou, ua fai i tatou ma ana fanau. O le valaau i igoa, o se faailoga o le mamalu, le so'otaga ma le alofa.

I le fuaiupu e 7, ua ogatotonu i ai la tatou mataupu, o lo o faailoa mai le mea moni taua. Ua valaauina i tatou i le Suafa o le Atua, ua tatou faia mo lona mamalu, ina ua fausia e ona aao. E ui lava i tofotofoga, agasala, po o le vaivai, e tumau pea lo tatou faasinomaga i le Atua, o le ua valaau mai ia i tatou i igoa. O le tatou mataupu lena i lenei Aso Sa. Ia faamanuia atu le Atua i lenei vaiaso i aoaoga.

Uiga o Upu:

- i) mo'u - o lē e ana
- ii) lofia - lilo atoa i le vai

GALUEGA FAATINO:

O lea ua faamalamalamaina atu le fuaiupu autu o le tatou mataupu Isaia 43: 7, i totonu o fesoasoani mo faiaoga. Ua tatau foi ona outou malamalama i le tatou mataupu o lea la e avatu ai le manao o le tatou mataupu. Sei faamatala mai ni mea moni se tolu o lo o aumai e le fuaiupu e 7. Faamatala mai i ni laina se tolu.

PESE: Pese ma Viiga 63

A'OA'OGA:

1. E ui i lo tatou ola agasala, e lavea'iina pea e le Atua tatou.
2. O a faigata o le olaga, e lē afaina tagata o le Atua.
3. Ua faia i tatou e le Atua mo lona mamalu.

.....

ASO SA: 08 FEPUARI 2026

MATAUPU: O LE FAAMAONI MA LE LOTOMAU O RUTA (*Ruth's loyalty and commitment*)

SINI: Ia malamalama le vasega, o le faamaoni ma le loto mau o Ruta, ua ola ai lona siosiomaga fou.

TUSI FAITAU: Ruta 1: 1 – 18

FESOASOANI MO FAIAOGA:

O le Ruta 1: 16 o le fuaiupu autu lea o le tatou tusi faitau o le tatou mataupu i lenei Aso Sa. E amata le tala ia Ruta i le taimi o le Au-faamasino. O se vaitaimi o le tala faasolopito o Isaraelu, sa feagai ai ma se tamaoaiga femoumoua'i, ona o oge ma le ola tetee i le Atua, e ala i le faatinoga o le agasala.

I le tatou mataupu ua faatomua ia Elimeleka, Naomi ma le la fanau tama e toalua. Ona o le oge i le nuu o Iuta, na latou o atu ai i Moapi. Na faaipoipo ai le fanau tama a Naomi i fafine Moapi e toalua, o Orepa ma Ruta. Peitai, na iu ina maliliu uma Elimeleka ma ona atalii, ma tuua ai Naomi ma ona afafine nofotane e toalua i se tulaga faigata tele.

I na ona po, o fafine ua oti a latou tane, o i latou ua ola pagatia, ola tuulafoaiina ma le le amanaiaina, ma le leai o se puipuiga. Na filifili Naomi e toe foi i le nuu o Iuta, ina ua ia faalogo ua toe foai e le Atua fua o le laueleele i ona tagata i Peteleema. Na ia una'ina ai Orepa ma Ruta, ina ia toe foi i o la'ua aiga i Moapi, ina ia mafai ona la maua se isi olaga fou ma maua ai o la'ua avanoa mo ni a la faaipoipoga mo lo la'ua manuia. Na toe foi Orepa i lona aiga ma lona nuu, ae na pipii atu pea Ruta ia Naomi i le loto mau. Na faia e Ruta lana tautinoga taua o le faamaoni ma le faatuatua, e pipii atu ai ia Naomi, ia Isaraelu, ma fai ai le Atua na Ia faia mea uma lava ma ona Atua.

Na iloa e Naomi le finau maua'a ma le loto mau o Ruta ma na ia le toe finauina ai le toe foi o Ruta i lona aiga ma lona nuu. O lenei tautinoga na tatala ai le ala mo le malaga fou a Ruta i le talafaasolopito o le faaolataga a le Atua.

Ua a'oa'o mai Ruta, e lē na o le faigofie ma le saogalemu e faavae ai le faamaoni, a o le agaga o le ola ositaulaga ma le alofa moni. Na maua e Ruta lona faasinomaga fou e ala i lana filifiliga e avea o ia ma vaega o tagata o le Atua. E faapena foi i tatou, o a tatou filifiliga ma tautinoga e fausia ai ni siosiomaga fou mo lona lumanai lelei. O lo tatou filifilia

e avea ma tagata o le Atua e maua ai o tatou avanoa i ana fuafuaga tetele i le ola atali faavavau.

E pupula le faatuatua i taimi o puapuaga. Na faailoa mai le malosi o le faatuatua o Ruta i le taimi na sili ona faigata. O taimi o tofotofoga e iloa ai le moni o le loto faatuatua ma le alofa moni. O le filifiliga a Ruta e foliga mai e patino ia te ia lava, ma o se mea laitiiti, ae na avea ma vaega o fuafuaga tetele a le Atua. Na avea ai o ia o se tina matua, matua lava (great great grand mother) o Tavita le tupu, ma lavea ai i le gafa o Iesu Keriso (Mataio 1: 5). O le pipii atu o Ruta ia Naomi, e faapena le alofa tumau o le Atua ia i tatou. O se alofa e le tuulafoa'i, e tusa lava po o a tatou tulaga. O le tala ia Rtua ma Naomi, o se mafutaga mafana, aua ua faamaoni le alofa, a ua tausia foi le faatuatua ma le faalagolago i le Atua. A o le finagalo lea o le Atua, na Ia filifilia ai o Isaraelu ma ona tagata e fai ma ona nuu. Ia avea Isaraelu ma ona tagata e fai ma ona malamalama mo le lalolagi atoa. A lea ua avea le Atua ma Atua o Ruta le tamaitai Moapi. O le tautinoga a Ruta, ua ta'u mai ai lona faamaoni, savali i lana tautinoga, ma le galuega lilo a le Atua.

O lenei mataupu ua a'oa'o mai ia te i tatou ia tatou mafaufau; Pe tatou pipii atu i le Atua ma ona ala e tusa lava pe le mautonu le lumanai? O le tala ia Ruta, ua faamanatu mai o lo tatou faamaoni i le Atua ma ona tagata, e le se mea e maumauina. O le faamaoni i le Atua e le tataua ona mou ese atu, ae avea ma faitotoa i le manuia, ma mea tetele ua Ia saunia mo le faamoemoe i ana fuafuaga sili. O le faamaoni o le Atua ia i tatou ua fa'aalia atoatoa mai i le auina mai o

Iesu le Faaola mo lo tatou faaolaina i le ola faavavau. o le tatou mataupu lena i lenei Aso Sa. Ia manuia ona o Iesu.

Uiga o Upu:

- | | | | |
|------|----------|---|-----------------------------|
| i) | aumau | - | nofo i se nofoaga le tumau. |
| ii) | mapusaga | - | malologa lelei |
| iii) | siliga | - | ua le toe maua ni avanoa |
| iv) | vagana | - | avanoa faapitoa |

GALUEGA FAATINO:

Se'i e toe faamtala mai i ni au lava upu le tautinoga a Ruta ia Naomi e pei ona faamauina i le fuaiupu 16 & 17. Faamatala mai i ni laina se tolu. E ta'u mai ua e malamalama i le tatou mataupu e pei ona avatu i fesoasoani mo faiaoga.

PESE: Galo i ola le feagaiga (Punialavaa)

1. Ua ifo le taulaumea ma loifofoga
Ae fotu le tau tutupu
O moomooga faalelei ai masei, ma faamagaloga
Lau pele fai mai sau tali i lou fanoga
Afai e ilo ala o gata, i luga o le papa
O aeto i le lagi, ma vaa i luga o vasa
Faapena le ala o tane i le tausala
E tumau pe a ou malu le ufi mata

Tali: Aumaia le alofa
E fai ma fusi, feagaiga osi
E pei ona fai mai ai o Ruta ia Naomi
E fai lou nuu ma lou Atua ma o'u tofi
E le tetea taua vagana le oti.

A'OA'OGA:

1. Ia faamaoni i au tautinoga i ou matua.
2. Ia alofa faamaoni i ou matua.
3. Ia tumau le faatuatua i le Atua.

.....

ASO SA: 15 FEPUARI 2026.

MATAUPU: O LE LOTOTASI O LE.. (*Unity is...*)

SINI: Ia malamalama le vasega, o le lototasi e maua i ni tagata, po o se potopotoga o tagata, e afua mai ona na taufai maua e tagata uma le alofa.

TUSI FAITAU: Salamo 133: 1 - 3.

FESOASOANI MO FAIAOGA:

O le fuaiupu e lua o le Salamo lenei, ua ogatotonu i ai la tatou mataupu i lenei Aso Sa, e faapea: Ua tusa ma le suauu

lelei i luga o le ulu, na tafe ifo i le 'ava o le 'ava lava a Arona, na tafe ifo i le ua o ona ofu. O le Salamo 133 e lavea i le vaega o Salamo, e ta'ua o Pese o le Afio a'e po o le o a'e (Salamo 120 - 134).

E masani ona usuina e tagata Isaraelu a o latou malaga a'e i Ierusalem e tapuai i taimi o tausamiga tetele. O nei pese e faatumuina i le agaga o le malaga, tapuaiga, ma le fia mafuta ma nonofo faatasi ma isi uso o le nuu o le Atua. E puupuu le Salamo 133, ua na o le tolu fuaiupu ae loloto lona uiga, aemaise lava i le faamatalaina o le aoga ma le manuia o le lotogatasi. Na fatuina ma tusia e Tavita lenei Salamo. Na ia iloa lelei le matagofie o le autasi, ae na ia iloa lelei foi le tiga o fevaevaeaiga. Sa ia fetaia'i ma le ola fevaevaea'i i totonu o lona aiga, le loto leaga ma le fouvalega i ta'ita'i, ma le ola tetee mai tagata lautele. Peitai na ia lagonaina foi le fiafia o le lotogatasi ina ua tasi Isaraelu i lalo o le pulega a le Atua. Mai i lenei poto masani na tusia ai e Tavita lenei Salamo e faamanuia ai le ola i le lotogatasi.

Fai mai le Salamo 133, Faauta, o le mea e matua lelei ma le matagofie lava, pe a nonofo faatasi lava o uso. Na amata Tavita i se faaupuga malosia. Faauta - O se valaaulia e mafaufau loloto i ai i lenei mataupu taua ma loloto. O le lotogatasi e l e gata o se mea lelei, ua tusa ma le finagalo o le Atua, ae e matagofie, e fiafia i ai tagata. O le upu uso; e le gata o lona uiga e aiga i le toto ma aano, ae aofia ai foi le aiga i le faaleagaga o le Atua. O le nonofo i le lotogatasi e sili atu nai lo le leai o ni misa, o se olaga e tumu i le filemu, ma nonofo faatasi i le fealolofaa'i ma le fetausia'i, ma le faamoemoe tasi.

O le fuaiupu e lua: Ua tusa ma le suauu lelei i luga o le ulu, na tafe ifo i le 'ava, o le 'ava lava a Arona, ua tafe ifo i le ua o ona ofu. O le ata o lo o fa'aaoga e Tavita, o Arona o le ulua'i Faitaulaga sili, a o faauuina i le suauu. (Esoto 29:7) O le suauu o se faafefiloi paia, o se faailoga o le Agaga Paia, o le faamanuiaga ma le tuuina ese mo le Atua. Na sasaa le suauu i luga o le ulu o Arona seia oo ifo i lana 'ava ma lona ofu, o se faailoga o le tele o le Alofa tunoa ma le mutimutivale o le Atua.

Ua a'oa'o mai e lenei ata, o le lotogatasi e paia. E pei lava o le suauu sa faaesea mo galuega paia, o le lotogatasi foi o se meaalofo paia mai le Atua. O le lotogatasi foi e tafe ifo mai luga i lalo. E amata mai le ulu ona tafe ifo lea i le tino atoa, e faapea foi le lotogatasi, e amata mai i le Atua ma ona ta'ita'i, ma sosolo atu ai i ona tagata uma. E le gata o lo o i luga o le ulu le suauu, ae ua sosolo atu i le tino atoa. E faapea foi le sosolo atu o le lotogatasi i totonu o aiga, nuu, atunuu ma le Ekalesia.

O le fuaiupu e tolu, o lo o aumai ai se ata mai le mauga o Heremoni. O le sau mai tumutumu o le mauga mauualuga lenei o Heremoni, e toto ifo i le mauga o Siona, olo o i ai le malumalu tapuai i le Atua, o lo o faapea mai le fai Salamo; Aua na poloa'i le Alii ia oo i ai lana faamanuia, o le ola lea e faavavau. O le lotogatasi foi e pei o le sau e toe faafouina le nuu atoa o le Atua. O le faaiuga o le fuaiupu e taua tele. O le mea o iai le lotogatasi, ua poloiaina e le Atua lona manuia e tini taunuu i ai, o le ola lava e faavavau.

Ua a'oa'o mai le Salamo, e le o le tagata e faia le lotogatasi, ae o le Atua. E amata mai i lona Agaga e pei ona faatusa i le

suauu o le faauuga. I le Feagaiga Fou, ua faataunuuina lenei mea i le Keriso, o le na tatalo i le Ioane 17:21, ina ia tasi i tatou uma, faapei o oe le Tama o i totonu ia te A'u, o A'u o i totonu ia te Oe, ia tasi i latou i totonu ia te i ta'ua. Na toe ta'u atu foi e Paulo i le Ekalesia i Efeso 4:3, ia tausi le lotogatasi o le Agaga i le fusifusia o le filemu. O le lotogatasi, e le o lona uiga o le tutusa o tagata uma. O lona uiga o le tasi i le eseese e pei ona faafefiloiina vailaau manogi i le suauu e fai ma manogi e tasi. O tagata eseese ua tasi i lalo o le Agaga e tasi, le Alii e tasi ma le faamoemoe e tasi. O se ata matagofie ma le loloto o le aoga o le lotogatasi. E pei o le suauu taua, paia tafe ifo ma sosolo atu i vaega uma, ma aumaia le manuia i so o se mea e oo i ai.

I le lalolagi ua tumu i fevaevaeaiga, e toe aami mai ai e le Salamo 133 le finagalo o le Atua, ia nonofo faatasi ona tagata i le lalolagi i le lotogatasi. I le mea e i ai le lotogatasi, e poloiaina ai e le Atua ona manuia. E lelei, e matagofie ma e maua manuia e faavavau.

Uiga o Upu:

- i) Heremoni - o le mauga mauualuga i Isaraelu, e ta'uta'ua i lona sau e faafouina ma aumaia le ola i laufanua mātūtū

GALUEGA FAATINO:

Ia faalautele mai e oe i au lava upu le tatou mataupu o le lotogatasi i lenei Aso Sa. Tusi mai lou iloa i le upu lotogatasi (Unity). Ia faamatala mai i ni laina se tolu.

PESE: Pese ma Viiga. 91

A'OA'OGA:

1. Ia nonofo faatasi i le alofa ma le ola fefaamagaloa'i.
2. A lotogatasi le Ekalesia, ua tupu ma ola le galuega a le Atua.
3. E maua le lototasi ina ua taufai fealolofaa'i.

.....

ASO SA: 22 FEPUARI 2026

MATAUPU: E AUMAI E LE SATAURO LE LOTO TASI (*The Cross will bring unity*)

SINI: Ia malamalama le vasega, o le Satauro o Keriso, na tu'u fa'atasia ai le fanau a le Atua i le talitonu ma le fa'amaoni, o Iesu lava o le alofa fua Ia.

TUSI FAITAU: Ioane 11:47 – 53

FESOASOANI MO FAIAOGA:

O le mataupu o lenei aso Sa, o loo atagia ai se fa'amamafa o loo ta'oto i le aoga o le Satauro o Keriso. E foliga mai ai, o loto na eseese o ni tagata, ae ua avea le Satauro o Keriso, ma mafuaaga o le tu'u fa'atasia.

Peita'i a talanoa i le Satauro, ua talanoa i le fa'asalaga o lona taunuuga o le oti. O se fa'asalaga a le amlo o Roma, e tuuina i le tagata ua mātuiā sana soligatulafono ua fai.

O lea ua tupu le popole i ta'ita'i o le lotu Iutaia, ona ua maitauina, ua to'atele tagata ua o latou talitonu i vavega na faia e Iesu, faapei o le toe faatuina mai o Lasalo mai le tuugamau. Ua tupu le loto tigā i ta'ita'i o le lotu Iutaia ia Iesu ma le mea ua ia faia, auā ua fai ma ala ua to'atele ai tagata ua mulimuli atu ia Iesu ma o latou talia le a'oa'o atu a Iesu. Peita'i, ua fai ma ala ua tupu ai le loto leaga i ta'ita'i o le lotu Iutaia, ma ua manatu ai, ina ne'i avea ma ala e tu'umau alaloina ai le avea o i latou ma ta'ita'i o le nuu, i le vaai mai o le malo o Roma. Auā afai ae mafuli le nuu e mulimuli ia Iesu ma talia ana a'oa'oga, o le a fai ma ala o le fasagatau mai ai o Roma ma fa'aumatia uma le nuu, ma fasiotia atu ai ma i latou o ta'ita'i o le nuu ma le lotu Iutaia. O le ala lea na taupulepule ai loa, ina ia fasiotia Iesu. Ua pau lea o le vai fofō mo i latou, o le aveesea poo le fasiotia o Iesu. O le manatu o Kaiafa le ositaulaga sili i lea vaitau, e sili ia'i latou le oti o le tagata e to'atasi nai lo le leiloa ma le fa'aleagaina o le nuu atoa. A'o le isi lea vaivaiga o le tagata soifua. O le galue i le va'aiga a tagata. Faapei ona faia e Kaiafa ma ta'ita'i o le lotu Iutaia. E finau ina ia manumalo

le finau vale ma le faia o le mea sesē, nai lo o le fia fa'alogo i le Atua ma le faia o le amiotonu ma le mea sa'o, e pei ona a'oa'o atu o Iesu.

O le satauro, o le taunuuga lea o le taupulepulega a Kaiafa ma ta'ita'i o le lotu Iutaia, fa'atasi ma le au lē talitonu ia Iesu ma lona afio mai i le lalolagi. O le i'uga na manatu ai le au lē talitonu, o le muta'aga o mea uma lava.

Peita'i, o loo matuā manino mai lava i le manatu o Kaiafa le ositaulaga sili, e pei ona ia vavalo ai, o le maliu o Iesu, e mo le nuu. E le gata mo le nuu, ae mo le fanau uma a le Atua ua ta'apeape. O lona uiga, e foliga mai ua leva ona iloa e Kaiafa le fa'amoemoe o Iesu na afio mai ai i le lalolagi. E pei o loo vavala mai ai i le finagalo o Kaiafa, e tāua le maliu o Iesu, ina ia fai ma ala e tu'ufasia uma ai le fanau a le Atua i le lalolagi. O le fa'aaogaina e le tusitala o Ioane o le upu "ta'apeape", o loo ta'oto ai se va'aiga o le fa'asalalauina, lē tapasāina, lē mautonu, ola fa'asamasamanoa ma isi, i tagata ua o le lalolagi. Ma o foliga tonu lava ia o le lalolagi o tagata o loo i ai, ona o talitonuga eseese ma filosofia e tele ua fausia e mafauauga o tagata, ua fai ma ala ua ta'ita'i sesēina ai le ola o aso uma.

E ui lava la o se i'u i le taupulepule a Kaiafa ma ta'ita'i o le lotu Iutaia ina ia fasiotia le Alii o Iesu, peita'i o loo ta'oto ai le fa'amoemoe lelei, o le toe tu'ufa'atasia lea o tagata uma i le loto e tasi, ma le Agaga e tasi, ma le fa'amoemoe e tasi, ina ia o tatou loto e tasi ma le talitonu e tasi, ua na o Iesu lo Alii ma le Fa'aola, o Ia lava o le Alo o le Atua, o lona Agaga e tauto'alua lo latou finau.

O le Satauro e aveesea ai pa puipui i le va o Iutaia ma tagata ese, o tagata mau'oa ma tagata matitiva, o le tamāloa foi ma le fafine. E mafai i le Satauro o Keriso, ona avea ma faitoto'a o pa puipui i le lotu, o nuu, o lanu ma gagana, po o le tulaga i le sosaiete.

E mafai ona o tatou fa'amatala le Satauro, o le faailoga o le alofa moni. E le gata o le alofa mo sa fīafia ia Iesu, ae faapea foi i ē sa fa'asagatau ia Iesu. O le alofa lea e tataua ona avea ma faavae o le olaga o se Kerisiano talavou.

GALUEGA FAATINO:

A: Fesili mo Talanoaga

1. Aiseā na matuā popole ai le au ta'ita'i lotu i le fa'aailoga na faia e Iesu?
2. E faapefea ona avea le upu a Kaiafa ma faamatalaga loloto i le galuega a Iesu, e ui sa ia tautala i lona manatu faapolokiki?
3. O ā pa puipui e mafai ona vavaeesea ai tupulaga talavou i aso nei?
4. O le ā se auala e mafai ona e fesoasoani ai e aveesea ia pa puipui ma fausia ai le lotogatasi?

E: Ata Fa'amatala:

Tusi se ata o le satauro i le ogatotonu o le laupapa poo se pepa lapo'a, ona tusia lea o igoa o atunuu, ituaiga, po o vaega o tagata o loo e iloa, e faailoa ai o loo tuufaatasia i le

satauro. Ia tufa atu tamaiti i ni kulupu se tolu e talanoaina fesili nei:

1. E faapefea ona tatou iloa o loo galue le lotogatasi i totonu o lo tatou Ekalesia?
2. O le ā se faataitaiga o le faiga o le faamagaloga i le olaga o se talavou?
3. O le ā se galuega e mafai ona fai a le vasega mo le lotogatasi i totonu o le Ekalesia po o le nuu?

PESE: Pese ma Viiga 40 A ou manatu ifo nei

A'OA'OGA:

1. Aua tatou te manatu fa'atauva'a i le tāua o le fa'aolataga na a faia e Keriso.
2. O i tatou uma o tagata ua fa'amamaluina e Iesu Keriso.
3. Ia tatou loto e tasi i le Atua ma lona alofa mai.

.....

ASO SA: 01 MATI 2026

MATAUPU: O LE MANA O LE TALALELEI
(*The power of the Gospel*)

SINI: Ia malamalama le vasega, o le mana o le Talalelei a Keriso, e na te liliuina ma aumaia le ola fou i le tagata ua talitonu ma le fa'amaoni.

TUSI FAITAU: Roma 1:1-17

FESOASOANI MO FAIAOGA:

O le tusi a Paulo i le Ekalesia i Roma e ta'ua o se tasi o ana tususiga sili ona tāua ma loloto. Na tusia e Paulo i le taimi a'o i ai i Korinito (pe tusa o le 57 T.A.) ia lana malaga fa'amisionare lona tolu. O le sini autū ma le fa'amoemoe o le tusi atu o Paulo, o le fa'amatala manino atu i Kerisiano o i Roma le faavae o le Talalelei, o le fa'aolataga e ala i le faatuatua, ae le o galuega po o tulafono.

O le nuu o Roma o se taulaga tele, o loo i ai tagata Iutaia ma tagata Eleni, o e ua avea ma Kerisiano. Sa faigofie ona fa'afefiloi le fa'atuatua ma aganuu, ma o le mafuaaga lea na tusia ai e Paulo lenei tusi, ina ia fa'amanatu atu i le au Kerisiano ala tonu o le Atua o le ola i le Talalelei.

Na fa'aali atu e Paulo o ia o se pologa a Keriso, ua valaauina ma tofia e fai ma Aposetolo o le Talalelei. E le o se galuega na filifili ai o ia i lona loto, ae o le valaauina mai le Atua. O le Talalelei e fa'avae i le ta'utinoga i le Atua mai aso anamua, ma ua fa'ataunu'uina i le olaga, e ala i le maliu ma le toetu o Iesu Keriso. O le Talalelei lea mo tagata uma. O le tala i le Fa'aolataga. O le tala i le maliu ma le toetu manumalo mai o Iesu Keriso mai le oti ma le tuugamau.

O loo faafetai Paulo i le Atua ona ua lauiloa lo latou faatuatua a'o i ai i Roma, ma e manao o ia e fa'asoa atu le meaalofo fa'aleagaga ina ia fa'amalosia ai e le tasi le isi.

“Auā ou te le mā i le Talalelei a Keriso...” O le fuaiupu lea o loo atagia ai le faavae autū o le tusi atoa lenei a Paulo i tagata o le Ekalesia o i Roma. O le Talalelei, o le mana o le Atua e aumaia ai le fa'aolataga i le tagata ua talitonu ma le fa'amaoni ia Iesu Keriso. O soo se vaipanoa lava o le ola, e maua i le faatuatua, e amata i le faatuatua, ma e faai'u fo'i i le faatuatua.

E lē o se Talalelei ua na o le fa'alologologo i ai, ae o le Talalelei o loo i ai le mana e suia ai le tagata atoa, ina ua talia ma talitonu i ai. E suia ai le ala tatou te mafaufau ai, ma o le Talalelei fo'i tatou te faia ai filifiliga tonu, ma tatou te tali atu ai i lu'itau eseese o le ola. E pei o le afi e na te susunuina otaota i totonu, e faamamā le loto ma aumaia le ola fou.

O le Talalelei fo'i, e tatala i tagata uma. E lē fa'apitoa i se ituaiga, poo se lanu, po o tulaga tofi maualuluga i totonu o se sosaiete o tagata. O le Talalelei, e lē mana'omia le malosi, o ni tupe, po o le tulaga taualoa, ua na o le loto lava ia faatuatua ma ola ai.

O le ta'utinoga a le toeaia o Paulo o loo faapea ai, “A ou vaivai, ona ou malosi lea.” (2 Korinito 12:10). O le manatu o le toeaia, o le Talalelei, e avea ma ta'iala o le tagata.

E pei o le tala e uiga i le tamā na ia tusi le fa'afanua mo lona atalii, e fa'apena le Talalelei, o le fa'afanua a le Atua mo le olaga o le tagata. E ta'u mai ai le auala e savali ai, ina ne'i tatou sesē i auala o le lalolagi.

GALUEGA FA'ATINO:

“FA'AFANUA O LE FAATUATUA”

Tusi i se pepa le “fa'afanua o lou fa'atuatua.”

Amata i le amataga o lou faatuatua (*fa'ata'ita'iga*, papatisoga, a'oa'oina)

Faailoa auala faigata (tofotofoga, vaivaiga, o mea lelei ma mea leaga)

Faai'u i le taunu'uga o le ola ma Iesu. (Avea ma tagata Ekalesia)

E lelei fo'i ae fa'atalanoa ni tala e faailoa ai se tagata talavou sa tauivi ma finau i mea a le lalolagi, ae suia lona olaga ina ua ia talitonu i le Talalelei.

Fesili fa'atupu manatu mo tupulaga talavou.

1. O le ā le uiga o le “Talalelei” i lou olaga i aso nei?
2. O ā vaega o lou olaga o loo mana'omia le suia e le mana o le Talalelei?
3. E faapefea ona e lagonaina le lē mā e faasoa atu le Talalelei i isi?
4. E faapefea ona e iloa o loo e savali i le fa'afanua a le `Atua?

PESE: Pese ma Viiga 247 E malie lava le tala

A'OA'OGA:

1. E tatau i tagata uma ona talitonu i le Talalelei ia Iesu Keriso.
2. Ia fa'aaoga tatau le ola mo Iesu ma lona finagalo.
3. O le Talalelei e mo tagata uma, e aofia ai ma tatou.

.....

ASO SA: 08 MATI 2026

MATAUPU: TAFIESEA MAI LE FA'ATOAGA
(Banished from the Garden)

SINI: Ia malamalama le vasega, o le lē usita'i
o le tagata, na mafua ai ona tafiese mai
le fa'ato'aga.

TUSI FAITAU: Kenese 3: 8 – 24

FESOASOANI MO FAIAOGA:

O tagata ua sulufa'i ona o sauāga, o taua ma mala fa'a-le-Natura, po o le fa'aletonu faa-le-tamaoiga ua masani ona tatou va'ai i ai. I lenei vaiaso, tatou te mafaufau i le Tusi Paia i tala o tagata na tuua o latou fale ma aiga ona ua sesē la latou filifiliga, ma ua fai ma a'afiaga tugā ma tulaga faigatā na aafia ai i latou.

O loo manino le ulua'i tala o le Tusi Paia, i le tala o le Foafoaga. Na foafoaina e le Atua le lalolagi ma mea uma o i ai mai le amataga. O le tumutumu o le galuega foafoa a le Atua, na Ia faia ai le tagata, o Atamu ma Eva i lona faatusa (Kenese 1:27). O le fa'amoemoe o le Atua, ina ia fai ma o la nafa le tausia o le faato'aga matagofie i Etena. O se nofoaga o le filemu, o le soifua lelei ma le fegalegaleaiga, ma ia ola fiafia ma le Atua, e ala i le fa'alogo ma usita'i.

Sa tele mea na mafai e Atamu ma Eva ona o la fai ma fiafia ai, sa fa'atagaina ai e le Atua. Ae na tuu se tasi o poloaiga, aua ne'i o la 'ai i le laau e tasi, o le laau o le ola, e iloa ai le lelei ma le leaga (Kenese 2:17). O lenei poloaiga, sa fa'ailoga e saili ai le fa'atuatua ma le usiusita'i e tatau ona i ai le tagata i le va ma le Atua. Peitai, na oso mai le gata, o le fa'atusa lea o le fili ma le ti'apolo ua faasesēina ai Eva fa'apea ai ma Atamu. Ua la 'ai i le fua o le laau sa fa'asa, ma o iina na ulu mai ai le agasala i le lalolagi.

Ina ua aai Atamu ma Eva i le fua o le laau sa fa'asaina, o loo fa'amatala ai, na tatala o la mata ma iloa ai le lē lavalavā. O se fa'ailoga o le iloa o le leaga, o le lē toe mamā o le loto, ma le lē toe atoatoa o lo latou so'otaga ma le Atua. Ina ua silafia e le Atua le tagata ua tago i le fua o le laau na Ia fa'asāina i le faato'aga, na o la nanā i le Atua, ma o le fa'ailoga muamua lea o le mā ma le fefefe, o ni taunu'uga o le agasala.

O le feiloa'iga i le va o le Atua ma Atamu ma Eva i le vaega lenei o le Tusi o Kenese e matua loloto lona uiga. E le gata o se fa'amasinoga, ae o se fa'aaliga o le alofa ma le fa'amoemoe o le Atua i lana tagata. O le tuli'esea o le tagata

mai le fa'ato'aga, o le fa'ailoa lava lea e le Atua o lana fa'aolataga i le tagata. Auā o tu'utu'uga na faia i le laau na fa'asaina, o le taimi lava e 'ai ai pe pa'i ai fo'i, o le a oti fo'i. Sa pa'i ma ai Atamu ma Eva i le fua o le laau, ae le'i oti i la'ua, ma o le fa'amaoniga lea o le fa'aolataga a le Atua i lana tagata.

E to'atele i tatou e pei o Atamu ma Eva, e faia filifiliga e vavae'ese ai i tatou mai le Atua. Peita'i, e le o le i'uga lena o le ola. E pei o le tagata na tuli'esea mai le faato'aga, o loo tatala pea le avanoa e toe fo'i atu ai i le Atua e ala i le alofa tunoa o Iesu Keriso.

E tāua tele lenei tala mo i tatou talavou i aso nei. E ao ona tatou iloa e ui lava ina tatou te solia le finagalo o le Atua i nisi taimi, e le o fa'amuta e le Atua lana alofa mai. E lē o le tafiesea poo le tuliesea le fa'ataua o loo i le tala. O le tafiesea ma le tuliesea, o le tau i o le lē faalogalo ma usita'i. O le vaega e aupitosili ona tāua, o le lagonaina e le tagata o lona fa'atauva ma le loto ua salamō moni ona o se sesē ua fai. O le natura lava ia o le Atua, o le alofa ma le naunau i le tagata ina ia ola sa'oloto ma iloa le va feagai ai ma le Atua.

GALUEGA FAATINO: Fesili mo le faa-Talanoaga

1. O le ā na tupu i le fa'ato'aga o Etena ina ua agasala Atamu ma Eva?
2. Aiseā na tuli'esea ai i la'ua mai le faato'aga?
3. O le ā e te iloa ai le alofa o le Atua e le'i muta i le tagata e ui ina agasala?

4. E fa'afefea ona e tausia le “faato'aga” o lou loto i le mamā ma le filemu?

PESE: Ua ou filifili e mulimuli ia Iesu

A'OA'OGA:

1. E fa'asalaina le tagata e lē fa'alogalo ma usita'i i le Atua.
2. E tāua le salamō ma le fo'i i le Atua ma le loto mauualalo.
3. Ia a'oa'oina i tatou mai mea sesē tatou te fai.

.....

ASO SA 15 MATI 2026

MATAUPU: O LE AIGA O LE NOFOAGA O LO O I AI LE LOTO
(Home is where the heart is)

SINI: Ia malamalama le vasega, e taua i le Atua le tagata e tuu i lona loto le alofa atu ia te Ia i aso uma.

TUSI FAITAU: Teuteronomi 6:1 – 12

FESOASOANI MO FAIAOGA:

O le tusi o Teuteronome o le tusi lona lima a Mose, e pei ona talia lautele ai e tagata faitau o le Tusi Paia. Ma o lona uiga o le “tulafono lona lua” (mai le upu Eleni Deutero-nomos). O se toe faamanatuina lea o le tulafono a le Atua na tuuina atu i le fanauga a Isaraelu ina ua latalata i le ulufale atu i Kanana le nuu folafolaina.

Ua leva ona malaga le fanauga a Isaraelu i le toafa mo le 40 tausaga i le finagalo o le Atua. Ua feoti le augatupulaga muamua o e mai Aikupito, ona o lo latou lē usiusita’i, ma ua sauni le augatupulaga fou e ulufale atu i le nuu na folafola mai e le Atua. O lea ala lea o le fa’aaogā ai e Mose o le avanoa e toe ta’u atu ai le talafaasolopito o le nuu, o tulafono ma le finagalo o le Atua, ina ia aua ne’i galo ia i latou, pe a maua le manuia ma le filemu i le nuu fou ua folafolaina.

O le popolega tele o loo ia Mose, ina ne’i o’o le nuu i Kanana, tafilisaunoa ma atua i le oa, ma avea ai ma ala o le a latou galo ai le Atua, o lē na aumaia i latou mai Aikupito, le nuu sa nofo pologa ai. O le faamalosi atu o Mose, ina ia alofa i le Alii le Atua ma le loto atoa, ma le agaga atoa, ma le malosi atoa. Ia tumau nei upu i loto o soo se tagata Isaraelu. O foliga na o le aiga i le saofa’iga i le va o le Atua ma lona nuu.

A vaai i foliga o le aiga, o le saofa’iga i le va o matua ma fanau. O matua, e fa’amoemoe i ai le ola ma le manuia o fanau. O le tiute o le matua, o le fanau ina ia saogalemu ma ola manuia. Ae o le tiute o fanau, o le faalogo ma usita’i i matua. O soo se aiga foi, e i ai lona fa’asinomaga, o ona tapu

ma ana measina, e tausi ma fa’amemelo i ai soo se tagata. Ma o le ata tonu lea o loo atagia i le va o le Atua ma lona nuu o Isaraelu. O le tiute faa-matua o le Atua i lona aiga, o lona nuu lava lea, o le faatonu, ma le tausia lelei ina ia saogalemū ma ola sa’oloto i manuia ua Ia tapenaina mo i latou.

O le “aiga” i le mafaufau faa-Eperu e le gata o le nofoaga o lo’o nofo ai le tagata, ae o le nofoaga o lo’o faamau ai le sootaga i le agaga ma le loto. E mafai ona e i ai i se fale malosi ma matagofie e malutia ai le tino o le tagata, ae pe afai e leai le Atua i le loto o le tagata, e le o se “aiga moni lona vaaiga. E mafai foi ona i ai le tagata i se nofoaga e lē mautu se fale, pei o se tagata sulufa’i. Ae afai e i le Atua le loto o lona tagata, e ta’ua lona nofoaga o le aiga. Auā o le aiga moni o le nofoaga e nofo ai le Atua i totonu o le loto.

O le olaga o le Isaraelu, o le olaga ua masani i le ola fa’atāfetafea solo. Peita’i, o fea lava sa o latou fa’atafea ai, sa i ai lava faatasi ma le Atua. O le soifua fai aiga lelei lea o le Atua i ona tagata. Ma o le ala lea o le ta’ua ai le Teuteronome lenei e 6:4–9, o le “Shema” o le upu muamua i le gagana Eperu o lona uiga “fai, faalogo”.

E le gata o se tatalo masani a tagata Iutaia i aso uma, ae o le faavae o le faatuatua i le Atua e to’atasi.

O le autu o le Shema, “Le Isaraelu e, faalogo. O le Alii lo tatou Atua, o le Alii e to’atasi. Ia e alofa atu i le Alii lou Atua ma lou loto atoa, ma lou agaga atoa, ma lou malosi atoa.” O lenei poloaiga e le na o se mea e faitauina i le gutu, ae o se valaau e faamau i le loto. O lona uiga o le olaga uma, o le aiga uma, ma le nuu atoa, e tatau ona faavae i le alofa i le

Atua. E le o le fale e fai ai le “aiga”, ae o le loto e tumu i le Atua. O le fa’amanatu foi lea mo i tatou i lenei aso Sa. O le va feagai ai o le tagata ma le Atua, o le va feagai lava le faa-le-aiga. E tatau i le tagata ua talitonu ma alofa i le Atua ona tumau ai ma fa’amoemoe i ai mo le manuia o lona olaga, a’o maua le malosi. O i tatou uma foi o tagata, o fanau a le Atua i le lalolagi nei. O lona uiga, e moomia le fa’alogo ma usita’i i lo tatou Atua, ma alofa ia te Ia i taimi ma aso uma. O le nofoaga moni lena o le aiga, o le loto o le tagata ua fa’amaoni ma tumau i le Atua e fa’avavau.

GALUEGA FAATINO:

A: FA’AMATALAGA O LO’U AIGA

Ia tuu le avanoa i le vasega, e fa’amatala ai lona lava aiga, o ona matua, ma tagata uma o lona aiga. O tiute o tagata ta’ito’atasi, ma le tulaga e tatau ona ola ai tagata uma o lona aiga.

A mae’a, ona taumafai lea o le faiaoga e fa’afeso’ota’i i le va nonofo ai o le tagata ma lona Atua.

E: TUSIGA SOLO: AUTU: “O LO’U AIGA”

Tusi se solo e fa’atatau i le lua aiga ma lou Atua. E pule le tagata i le umi o lana solo.

PESE: O le aiga e maua ai le loto malie

A’OA’OGA:

1. Ia fa’avae o tatou aiga i le Atua e manuia ai.
2. O i tatou o fanau a le Atua i le lalolagi nei.
3. E te fiu e saili solo se mea e malie ai le loto, ua na o le aiga moni.

.....

ASO SA: 22 MATI 2026

MATAUPU: AGAI ATU I LE POGISA
(Towards Darkness)

SINI: Ia malamalama le vasega, e le mafai e se malosi faaletagata ona taofia fuafuaga ua finagalo i ai le Atua ina ia faataunuuina.

TUSI FAITAU: Mataio 16: 21 – 28

FESOASOANI MO FAIAOGA:

O le agai atu i le pogisa, o le agai atu lava lea i tiga ma faigata ogaoga o lenei soifuaga. O mafatiaga e oo mai ai le lē mautonu ma le fememea’i o lagona ma manatu. E le toe i ai se mautinoa, ae avea foi ma auala e oo mai ai le vaivai i le tagata. E le gata i lea, e ono oo ai foi faaiuga fai a le tagata i se tulaga e le tatau ona oo i ai.

I le amataga mai o le mafutaga a Iesu ma ona soo. Sa i ai lava le talitonuga i le su so'o, o le a umi se taimi latou te mafuta ai ma Iesu. I le ma le isi itu, e tupu le loto tetele, e tupu le malolosi ma le mafanafana o le au so'o, o le i ai o Iesu i mea uma latou te i ai. e tusa ai i le molimau a le au faievagelia. O Iesu, lea sa fai ma pa pupuni, po o le olataga lea mo le au so'o i le faasagatau mai o taitai Iutaia e talepe le talaiga lea na afio mai ma Iesu lea ua latou mulimuli i ai.

E i ai le talitonuga, o le ala tonu lea na oo mai ai lagona fememea'i ma le lē mautonu i le au so'o, ma osofa'i mai ai Peteru i lana osovale masani ma taofia Iesu, ina ua Ia fetalai ma faailoa atu, e tataua ona alu o Ia i Ierusalem, e faatigaina foi i mea e tele e toeaiina ma le au faitaulaga sili, ma le au tusiupu, e fasiotia foi o Ia, e faatuina foi o Ia i le aso tolu.

O lea ua faailoa e Iesu le taunuuga o lana feau ma le galuega na finagalo lona Tamā i le lagi e afio mai ai i le lalolagi. O Ia o le malamalama na te faamalamalamaina le pogisa o le oti. E fai foi lea ma manumalo ma le faaeaina mo le au faatuatua i le faatuina o Ia i le aso tolu. O le faaolataga mo tagata uma.

O le mea ua mautinoa, i le mau faa-feagaiga tuai, e fanau mai le oti ina ua matua le agasala. Ai lava o le tulaga lea e avea ai puapuaga ma tiga o le oti ma pogisa ogaoga i le tagata soifua. Atonu foi o le ala lea na oso faalava ai Peteru ma tetee atu i le fetalaiaga a Iesu.

A o le pine lea o le mau faa-feagaiga tuai, ina ua fetalai Iesu ia Peteru, "Satani e, ina alu ia oe i tua, ua fai oe ma mea ou te tausui ai, aua e le o mea a le Atua ua e loto i ai, a o mea a tagata." Silafia lelei e Iesu, o le a'a lea o le tuinanauga uma

ma le agasala o tagata. O le pogisa sili lea ona faigata i le tagata i le lalolagi ma avea ai le oti ma faafitauli ma mea e matatau ai tagata soifua. Peitai, o se su so'o ina a lē lelei le faalogo i le faaiuga o le fetalaiaga a Iesu, e faatuina foi o Ia i le aso tolu. O lona uiga, e le tanumia ai pea i le pogisa o le tuugamau, ae liaina i lona malamalama sili ina ia faamalamalama ai le tagata, ma ia maua ai le ola. Ua iloa tino ai foi, e lē mafai lava e se malosi o le tagata po o lenei lalolagi ona taofia fuafuaga mamana a le Atua, ona o lona alofa tunoa mo le tagata ina ia ola.

GALUEGA FAATINO: Fa'aaliga manatu

Tusi mai sau tautinoga, ia le silia ma le tasi le laupepa (A4), E faailoa mai ai ni ou lagona, pe afai ua e manatu, o le fuafuaga a le Atua mo oe, ia avea oe ma foma'i po o le faiaoga i le lumanai.

PESE: Pese ma Viiga: 5

A'OA'OGA:

1. E le mafai e se malosi faa-le-tagata ona taofia fuafuaga mamana a le Atua
2. O mea ua fetalai mai e le Alii, e taunuu lava.
3. O Iesu le malamalama sili mo tagata uma.

.....

ASO SA: 29 MATI 2026

MATAUPU: MALOSI MA LE AUAI
(*Force and Presence*)

SINI: Ia malamalama le vasega, e le o le malosi
faa-fitafita na afio mai ai Iesu, ao le loto
maulalo ma le filemu.

TUSI FAITAU: Mataio 26: 47 – 56

FESOASOANI MO FAIAOGA:

E mafai ona magalua le faauigaina o le malosi pe a o tatou mafaufau loloto i ai i le malosi faa-le-lalolagi, ma le malosi na afio mai ai Iesu e aumai i le lalolagi e faailoa ai le auai o le Atua i so'o se mea e faia e le tagata.

O le tala sa faitauina, o le faalataina o Iesu e Iuta le Sekara, o se tasi o ona so'o, e toasefulu ma le toalua a'i. O lo o manino ai le malosi faafitafita ma le lalolagi o tagata tete'e ia Iesu, e pei ona taua ai pelu ma uatogi, o se sogi le manaomia, o le pueina ma le ave faapagotaina. I se isi faamatalaina, o le faaogaina lea o lea malosi e faatauina ai le mea o loo i le loto o le isi tagata e tuu maualaloina ai lagona o le isi tagata. O le faaogaina foi o le pelu, e faaleagaina ai pe faamanu'alia ai le isi tagata. O le taumafai lava lea, ina ia faafetoai le malosi faa-le-tagata i le isi malosi faa-le-tagata. O se gaioiga e faatupulaia ai le feitagai ma tupu ai taua. O ni foliga vaaia e matuā mataga e molimauina

ai, ona o le faamaligi toto. O le pogisa o le ola faalata ma isi faatinoga e faailoa ai le malosi ae lē o le mea sa'o e ao ona faatino.

I le ogatotonugalemu o nei mea o lo o tutupu i lenei tala, i le avea o Iuta ma aupega e faamalosia ma faamalieina ai faufauga a taitai o tagata Iutaia mo Iesu ma ona so'o, ua iloa ai le faia e Iuta o se faaiuga e matua sese lava. E le gata i lea, a o le taumafai foi o se tasi o so'o o Iesu (Simona Peteru, e pei ona ta'ua e le evagelia a Ioane) e tali atu ia Iuta ma tagata na latou o mai, e moni o loo i ai lona itu lelei, peitai, o lo'o faailoa ai lava lona faia o faaiuga sese e le taimi sese, e le o gatusa ma aoaoga a Iesu. O lo'o filemu ma to'amalie ai le Alii o Iesu, le Alo o le Atua.

O lona to'amalie lea, ina ua Ia silafia ua oo mai taimi o ona puapuaga, na ala ai ona i ai lana malaga faatupu i Ierusalema, ma le faataunuuina o le finagalo o le Atua le Tamā. O lea na Ia fetalai tuusa'o ai ia Iuta. "Sole, se a le mea ua e sau ai?" ua fetalai manino ai o Ia ia Iuta, afai o lau filifiliga ma lau faaiuga lea, ina faataunuu ia. E faapena foi i se tasi o ona so'o na tipieseina le taliga o Maliko, o ni upu na faailoa ai lona lē talia o lea faatinoga, aua e le o le tali sa'o lea e tatau ona tali atu ai. o le tali lava lea e tasi na Ia momoli atu ia i latou uma na o mai e pu'e faapagota ia te Ia. Ua Ia avatu i ai se lu'itau, pe aisea lava ua latou filifili ai e faatino lea faamoemoe, a'o lea sa a'oa'o ma faatino lana galuega i le malamalama. E mafai lava ona Ia aioi atu i lona Tama ma aauina mai agelu e sili ona toatele e lekeona e sefulu ma le lua ma faaumatia ia te i latou. Peitai, o Lana

feau ma le galuega na afio mai ai, e le faatinoina i se malosi faafitafita, a o le malosi faa-le-agaga.

O le ala lea o le faalupe o Ia, o le Tupu loto maulalo, ina ia ofoina mai lona soifua e fai ma togiola mo tagata uma. O le faataunuuina lea o mea na valoia e perofeta, e afua mai i le pulea o le loto, ae lē o le a'ea o le olo, i le ma le isi, o le moni o le soifua ofoina atu mo isi. O mea ia, e le mafai e le malosi faafitafita ma le loto ita ona ausia ma faatino.

GALUEGA FAATINO: GROUPING

E manaia ae vaevae le vasega i vaega e lua

1. Faamatala mai po o le a le uiga o le malosi faa-le-tagata, ma le malosi faafitafita? Ae o le a foi ni foliga e oo i ai pe a fa'aaoga nei malosiaga e tali atu ai i faafitauli o le ola nei? (Vaega muamua)
2. Faamatala mai po o le a le uiga o le malosi faa-le-agaga, e pei o le pulea o le loto ma le moni o le ola ofoina atu mo isi? Ae o le a foi ni foliga e vaaia pe a fa'aaoga lea malosiaga e tali atu ai i faafitauli o lo'o feagai ma tupulaga i nei aso? (Vaega lua)

PESE: A tumau ia Iesu

A'OA'OGA:

1. E sili le na te pulea lona loto, nai lo lē na te a'ea le olo
2. Ia fai faaiuga uma ma le loto maulalo.

ASO SA: 5 APERILA 2026 (ASO SA TOETU)

MATAUPU: E MONI UA TOETU (*Risen Indeed*)

SINI: Ia malamalam le vasega, o le iuga o le galuega a Iesu i le lalolagi, o le amataga lea o le galuega a le tagata mo le faaolataga.

TUSI FAITAU: Mataio 28: 1 – 20

FESOASOANI MO FAIAOGA

O le mataupu o lenei Aso Sa o le Toetu, “*E moni ua Toetu.*” O se molimau ma se tautinoga mausali e faamaonia ai le vaai o mata, o le pa'i atu o lima, o le tutu ai o vae, o le auai ai o le tino, aemaise o le lagonaina i le loto; o le moni ma le faamaoni o le Toetu. E le toe tau fesiligia, pe toe vailiiliina e se poto faaletagata, le moni ma le faamaoni o lenei molimau i le Toetu manumalo o lo tatou Alii Faaola o Iesu Keriso, e pei ona molimau i ai le au fai evagelia ma le au aposetolo.

O le tala ave lea na o ma Maria le Makatala ma le isi Maria, ina ua uma ona la molimauina o mea uma i le tafa o ata o le uluai aso o le vaisapati na o ane ai e asiasi i le tuugamau o Iesu. I lea lava taeao, na la mua'i molimauina ai le malosiaga ma le misiterio o le matautia ma le Silisili ese o mea e faia e le Atua; e ala i le mafui'e na luluina, o le tuugamau avanoa, o le agelu na tietie i le ma'a na pupuni ai le gutu o le

tuugamau e pei o le uila lona tino mai. Aemaise o e na leoleo i le tuugamau, ua liua e pei o tagata ua oti. E i ai le talitonuga, o le taimi tonu lea o le fiafia ma le olioli o le loto ona o nei mea ua molimauina; ae faapea foi ina ua faailoa ane e le agelu i tina nei le faamoemoe na agai atu ai ina ia sailia Iesu, ae le o toe i ai o Ia aua ua toe tu mai nai e ua oti. Peitai, na matata'u i laua aua ua faateia le vaivai o le tagata i le ofoofogia o mea ua tutupu, aua e lei tupu muamua i le tala faasolopito o tagata soifua nei mea uma. I le taimi lava lea, ua aveai i laua ma ulua'i molimau i le Tala Lelei i le toetu mai o le Alii Faaola.

E mai totonu o nei mea o loo folafolaina ia te i laua, le faatonuga na tuuina mai e le agelu i tina nei, o lea faatonuga na faaluaina e Iesu ia te i laua ina ua latou fetaiai i le ala. O atu ia i le au soo ma logo atu i ai, ua toetu Iesu. I le faamaoniaina o lea feau, na pai atu i laua i aao o Iesu, na faalogo foi i laua i lona siufofoga, ina ia faamausaliina ai i ona soo po o ana uo, o lona aiga i le faatuatua lava lea ina ua talitonu ma mulimuli ia te Ia; ina ia o ane ma molimau mo i latou lava ia i Kalilaia e pei ona fetalai atu ai iesu ia te i latou a latou mafuta.

O Kalilaia lava le nofoaga na amata mai le galuega a Iesu ma ona soo lea na toe feiloai ai, na latou molimauina ai le faamaoni o le tala na avatu e tina e toalua ia te i latou. Na fetalai manino ai Iesu i le galuega o le a feagai ma i latou. Ia latou o atu ma fai nuu uma lava ma soo, papatiso atu I le suafa o le Tama, ma le Atalii, ma le Agaga Paia. Ia aoao atu ia tausia e tagata uma e oo i ai lenei papatisoga mea uma lava na Ia aoao atu i lona au soo. Ua maea lona taimi ma le

feau na afio mai ina ia faataunuu e tusa ma le finagalo o lona Tama i le lagi. O lea ua tuuina atu ia te i latou mo le faaaauaina; peitai, mo le saga faamafanafanaina o i latou mo le feau; ua fetalai manino ai Iesu, e lē o le mutaaga lea o le latou mafutaga. E i ai pea ia te i latou e pei ona i ai muamua ma e faaaauu pea mo aso uma e oo i le faavavau, ma o le uiga foi lea o lona suafa Emanuelu e pei ona i ai i lona fanau mai. O le faamoemoe lava o Iesu mo ona soo, o le faamoemoe lava lea e tasi mo i tatou, pe afai tatou te talitonu ma faatuatua faamaoni i le faaolataga ua Ia saunia e ala I lo tatou salamo faamaoni. Po o le a foi le faamata'u mai o le fili ma ana au, ina ia faaleaogaina lo tatou ola auauna mo le Alii, tatou te manumalo pea pe afai tatou tumau i le mafutaga ma Ia e ala i le Agaga Paia lo tatou fesoasoani sili, ma saga faalautele atu ai lenei Tala Lelei ia Iesu ma lona Toetu manumalo mai le oti ma le tuugamau; ua fai fatu o le soifuaga o le au faatutua.

GALUEGA FAATINO: FAATINOGA

Ia faaaogaina le fanau mo le faatinoina o lenei tala. Ia faatinoina lava e tusa ma mea uma o loo tutupu i le tusi faitau o loo faatatau i ai lenei mataupu i le molimau a Mataio.

PESE: Pese ma Viiga: 381 Pe a ou faitau i lena Tala Lelei.

A'OA'OGA:

1. Ia fai i tatou ma auauna o le Tala Lelei.

2. Ia faailoa atu e moni ma faamaoni le faaolataga ua saunia mo tagata uma.
3. Fa'aaoga lo tatou ola mo Iesu.

.....

ASO SA: 12 APERILA 2026

**MATAUPU: O LE LAULAUFAlVA
FA'ASAlSILI (*The Boastful tongue*)**

SINI: Ia malamalama le vasega, e lē finagalo le Atua i le tagata e fīafia i le laulaufaiva fa'asausili, auā e faaseseina ai isi tagata. E le gata I lena, a o le laulaufaiva e puna mai ai upu faamaualuga, faaleaga ma taitaisese ai manatu lelei.

TUSI FAITAU: Salamo 12:1 – 4

FESOASOANI MO FAIAOGA:

E manino ma malamalama i le tāua o le laulaufaiva i le tagata. O se vaega o le tino e moomia e le tagata soifua. A leai se laulaufaiva i le tagata, e lē mafai e lenā tagata ona tautala. O lona uiga, e tāua tele le laulaufaiva i le tagata, ma e moomia ona tausi fa'apelepele i ai. O le upu fa'asausili, e aiga tutusa ma le fa'amaualuga, mimita, leai se fa'aaloalo. O lona uiga, o le laulaufaiva fa'asausili, o le tautala

fa'amaualuga ma le lē amana'ia o le isi tagata. E mafai ona fa'atatauina i le tagata ua aunoa ma le loto mauualalo, ae sili ai le leai o se fa'aaloalo i le Atua.

O le Tusi o Salamo e pei ona tatou iloa, o se tusi e aofia ai pese, o tatalo, o auega ma tagi a le tagata lotu i luma o le Atua. E lē o iloa tonu le taimi tonu na tusi ai e Tavita le Salamo sa faitauina, auā e tele taimi ma mea na tutupu i lona olaga, e mafai ona feso'otai ma le uiga o lenei Salamo.

O le olaga o Tavita, e masani i taua ma fa'afitauli. Peita'i a manino i upu o le Salamo, o loo atagia mai ai le feagai foi o Tavita ma se isi ituaiga o taua. O le taua fa'asaga i upu lē aoga, o le tala pepelo, ma le faiga fa'atuputala a ē e taufa'aleaga.

“Le Alii e, ia e fa'aola mai...” O upu amata lava ia o le Salamo e 12, lea o loo i ai le mataupu o lenei aso Sa. O fesili e tula'i mai, **“O le a le mea o loo tupu ia Tavita? E fa'aola mai o ia mai ia te ai?”**. O le vaega lea o loo manatu ai nisi, o le Salamo e 12, o loo fa'atatauina i tagata ua o latou fa'atupu tala leaga ma tala taufa'asesē e uiga ia Tavita, ina ia tu'umauualaloina ai lona tulaga ma lona tagata, ma ia fai ma ala e fa'atupu tele ai le ita atu o tagata ia te ia.

Peita'i, e foliga mai i upu o le Salamo, o loo iloa lelei e Tavita le lē mafai ona puipuia e se tasi lona igoa, a o salalau tala pepelo faasaga ia te ia. E lē aoga fo'i le tau fa'asaga i nei tagata, nai lo o le tuuina o lona faafitauli i le Atua. E foliga mai sa fīafia lava Tavita pe ana tau i pelu ma talita, nai lo le tau i laugutu pepelo ma loto fa'alua fesasi o tagata. O lona uiga, o le Salamo e 12 e pei ona i ai le faitauga o lenei Aso Sa, o le tatalo a Tavita i le Atua ona ua foliga mai ua

leai ni tagata amiotonu i lona vaitaimi. O loo ia tagi atu i le Atua ona ua tumu le lalolagi i upu pepelo, ma tagata e fa'amaualuga i a latou upu e tautatala ai.

Ua foliga mai i le tatalo a Tavita, o loo to'atele i totonu o Isaraelu ni tagata ua fa'aaoga le laulaufaiva e fai ai mea pepelo ma le fa'asausili. Ua latou fa'aaogaina o latou gutu e fa'afoliga e lelei, ae o totonu o latou loto e pepelo ma pi'opi'o. O nisi fo'i ua fa'aaoga upu e fa'asese ai isi, o nisi ua fai ma ala e fa'amaualuga ai, ma taumafai e pulea manatu ma lagona o le toatele. O nei faiga, e le gata na fa'aleagaina ai le nuu, ae na mafua ai fo'i le lē fa'atuatua ma le vavaeeseina o tagata mai le upu moni a le Atua. I le manatu o Tavita, o le laulaufaiva e le na o se vaega o le tino, ae o se mea faigaluega e fa'aalia ai le loto o le tagata. Auā o upu ma tala e tautala i ai le tagata, o le fa'aleoina mai lea o mea o loo i le loto.

O le fuaiupu e 3 o le Salamo sa faitauina, o loo fa'apea “*E vavae ese e le Alii o laugutu molemole uma lava, ma le laulaufaiva e tautala i mea fa'asausili.....*” O loo lagona e Tavita lona lē gafatia e tau faasaga i nei tagata e tautala amioleaga, ma o lona sulufaiga ua na o le Alii, lea na ia tatalo ai i le Alii. O lona uiga, o le vavae ese o le laulaufaiva, o le tiute lena o le Alii. O lana fa'amasinoga tonu lea i le tagata e tautala fa'amaualuga, ma o le i'uga lea o le laulaufaiva fa'asausili.

E leitioa foi Benjamin Franklin ona saunoa fa'apea, “Talu ai e le mafai ona ou pulea lo'u lava laulaufaiva, e ui o loo i totonu o o'u lava nifo, e faapefea la ona ou fa'amoemoe e pulea laulaufaiva o isi tagata?” O le uiga o le manatu, e oo

lava foi i le tagata e ona le laulaufaiva, e faigata lava ona ia pulea lona laulaufaiva.

Ua maoa'e le televavave o faiga i nei aso, ona ua saoasaoa le tekonoosi ma faiga fa'aonapo nei. Ua so'o foi le lalolagi i auala o feso'ota'iga ma polokalama (digital platforms like Facebook, YouTube, Google Classroom...) ua fa'aaogaina e tagata e feso'ota'i ai, ma ua sa'oloto ai le so'ona lalafo o upu lē talafeagai, ma le fa'aleagaina e le isi o lē tasi.

E pei o le social media, o se tasi o nofoaga e faigofie ona fa'aalia ai le faasausili, le pepelo, ma le faamaualuga i upu. E toatele e fa'aaoga a latou upu e fa'aleaga ai isi, e fa'aali ai lo latou mamalu, pe fa'asese ai tagata ina ia maua ai le viiga po o le mamalu. O nei ituaiga fa'amatalaga e mafai ona faatupu tiga, lotovaivai, ma le vaeluaina o tagata. Ae mafua uma lava, o le laulaufaiva fa'asausili.

O le mea lea, e taua tele ai le lapata'iga a Tavita, o le Atua e silafia mea uma, ma e fua e la upu ma gaoioiga a tagata uma. O le laulaufaiva e mafai ona fa'amanuia ai, ae e mafai foi ona fa'aleagaina ai. O le mea lea, e ao ona tatou fa'aaoga lelei o tatou laulaufaiva, i le alofa, o le amio pulea ma le faamaoni.

GALUEGA FA'ATINO:

A: Fesili Fa'atalanoaga mo le Vasega

1. O le ā le uiga o le “laulaufaiva fa'asausili”?
2. O ā ni mafuaaga e tatou te fa'asausili ai i a tatou upu?

3. E fa'aapefea ona e iloa le eseesea i le va o le fa'aaloalo ma le mitamita?
4. E fa'aapefea ona fesoasoani le Tusi Paia ia i tatou e taofiofi o tatou laulaufaiva?
5. O le ā se tasi auala e mafai ona e fa'aaogaina ai le laulaufaiva e fa'amalosia ai isi i lenei vaiaso?

E: Tala Fa'ata'ita'i (Role Play): “Upu e Fa'amalosi au, Upu e tau-Fa'aleaga”

Vaelua le vasega i ni vaega se lua:

Vaega 1: Fausia se tala fa'ata'ita'i e fa'aalia ai se tagata e fa'asausili, e tautala pepelo, po o le fa'amaualuluga.

Vaega 2: Fausia se tala fa'ata'ita'i e fa'aalia ai se tagata e tautala i le loto mauualalo, agamalu, ma le alofa.

A mae'a, ona talanoa lea i le eseesea o uiga o tagata e lua. E mafua uma tala mai le laulaufaiva, i mea o loo i totonu o le loto.

I: “Upu e Ola Ai”

Tuu atu i tamaiti ta'itasi se pepa e tusi ai ni upu lelei e mafai ona latou fa'aaogaina e fa'amalosia ai se tasi (faata'ita'i: “E mafai ona e faia!/You can do it”, “E alofagia oe e le Atua/God loves you...”).

Tu'ufa'atasia i luga o se pepa tele ma fausia ai se “Pusa o Upu Lelei” mo le vasega atoa.

PESE: Ta'u mai tala ia Iesu (Tell me the stories of Jesus)

A'OA'OGA:

1. Ia iloa ona tautala ma le fa'aaloalo i taimi uma.
2. Ia fa'aeteete tagata uma i le fa'aaogaina ma le lē tatau o le laulaufaiva e mimita ai.
3. E fa'amsinoina e le Atua le tagata e laulaufaiva fa'asausili.

.....

ASO SA

19 APERILA 2026

MATAUPU:

O SE UIGA FA'AFIASILI (*An Attitude of Superiority*)

SINI:

Ia malamalama le vasega, o le uiga fa'asausili e lē aogā i le tagata ua fa'a-Kerisianoina ma fa'atuatua i le Atua.

TUSI FAITAU: Ioane 7:40–52

FESOASOANI MO FAIAOGA:

O le mataupu o lenei aso Sa, o loo laualuga ai le uiga fa'asausili. O le fa'asausili, o se uiga e lē lelei i le olaga o se Kerisiano. O se uiga e masani ai le tagata e ola fa'amauualuga, ma le va'ai mauualalo i le isi tagata.

O loo fa'aauau pea le faitauga o lenei vaiaso i le mataupu **“O le Mimita ma le Fa'aituau.”** Ae o le vaiaso lenei o loo taula'i i le vaega lona lua o le fa'aituau. O se uiga e mafai ona tutusa lona leaga ma le mimita. O le toatele o tatou ua feiloa'i i tagata e fa'aalia le uiga fa'afiasili, pe atonu fo'i o tatou ua fai fo'i ma tagata fa'apena i nisi o taimi. O le igoa (suafa), o tulaga (status), o le tamaoaiga, o tulaga tau a'oa'oga, o nofoaga o loo nonofo ai, po o tagata e masani ma tatou, o nisi ia o mea e fa'aaogā e fausia ai se aganu'u, e vaevae ai tagata i ni vaega ese'ese, ma fa'atupu ai le manatu e sili atu le tasi nai lo le isi.

O le leo o fesili a le au Faresaio o loo manino ai lo latou uiga fa'afiasili. E leai se masalosalo ma e lē faigata i le tagata faitau po o le tagata fa'alologologo i le auala na o latou manatu ai ia Iesu. O a latou fesili, sa o latou taumafai ai e fa'aali mai lo latou lē talitonu ia Iesu, ma o le auala tonu lea e tatau ona fa'ata'ita'i i ai isi tagata. Sa latou manatu o i latou o le pule sili i mataupu fa'aleagaga, ma sa o latou va'ava'ai i isi a'oa'oga uma, o se tau fa'asesē po o se fa'alavelave i olaga o tagata.

O le faamoemoe o le au Faresaio, o tagata uma e tatau ona usita'i i o latou manatu ma a latou tulafono. A fa'atuiese se tasi mai a latou tu ma aga, ona vave lea ona o latou faitio ma

faasā. Peita'i o a'oa'oga a Iesu, e masani lava ona fa'amapu'e ai i luga le tulaga o le tagata loto mauualalo, ae fa'atifatō i lalo le tulaga o le tagata mimita ma le fa'afiasili. Ma o le mafuaaga lea na mafua ai le tele o fevaevaea'iga, o le tete'e, ma le lē fia talitonu o tagata. O le fesili pe aisea, o le tali, ona o le fa'afiasili o le tagata.

E le'i mafai e taitai fa'alelotu ona talia le auala o loo a'oa'oina e Iesu. Peita'i, na sili atu ai le malosi o upu a Iesu nai loo a latou lava a'oa'oga. Sa tosina tagata ia Iesu, e le gata ona o Ia, ae ona o upu o le ola sa Ia saunoa ma fetalai ai. O le ono tupu ai o se toe suiga i le ola fa'aleagaga i totonu o ia tagata na tosina ia Iesu, ina ua faamata'u i le tulaga ma le malosi sa umia e nei ta'ita'i poo le au Faresaio. O le mafuaaga, ina ia puipuia la latou pule ma lo latou tulaga fa'aalologia i totonu o le sosaiete o le au Iutaia. O lo latou taumafai e fa'aleaga le igoa o Iesu, ma fa'aititia tagata e mulimuli ia te Ia, ina ia tumau pea lo latou fa'afiasili ma le pule i tagata.

O le mataupu lea o lenei aso Sa, o le va'aiga i le vaeluaga tele i manatu o tagata e uiga ia Iesu. Auā o nisi o loo talitonu o Ia o le Keriso moni, ae o isi o loo masalosalo ona e fa'alagolago i o latou lava manatu fa'a-le-tagata e uiga i le mea e tatau ona sau ai le Mesia. Manatua lelei, ua leva ona valoia e le au Eperu le afio mai o le Mesia, e na te fa'aola ma toe fa'atu mati'e le tulaga o Israelu e pei ona sa i ai le amataga.

O le au Faresaio, o ta'ita'i fa'alelotu a Iutaia i lea taimi. Sa fa'amauualuluga ma manatu e sili atu lo latou atamai nai lo isi. Sa latou va'ava'ai mauualalo i tagata, ma e oo lava ia Iesu.

O lo latou manatu, e lē aogā manatu o nisi tagata ona e lē o ni a’oa’o po o ni ta’ita’i. O lo latou uiga o le fa’afiasili ma le manatu fa’apito, i le manatu e leai se isi e mafai ona iloa le upu moni ua na o i latou.

O le va’aiga lautele o loo ta’oto i totonu o le mataupu o lenei aso Sa, o lo o atagia mai ai le tausolomua ia i latou ua ta’ua o ta’ita’i, o i latou o loo umia tulaga tofi mauualuluga, o le au mau mea (mauolao), ona maua i le uiga lea o le fa’afiasili. E lē tau fesiligia, o loo i ai pea lenei uiga i nei aso, i totonu o le Ekalesia ma le lalolagi atoa. E manatu nisi e sili atu ona lelei ona o le tulaga (status), o le tamaoaiga (wealth), o le tulaga i le a’oa’oga (education), o le igoa o le aiga, po o le tulaga i totonu o le lotu. Ae o le fetalaiga a Iesu, “O lē e sili i totonu o outou, ia avea ma auauna” (Mataio 23:11). O le uiga moni ma le matuā lelei i le Malo o le Atua, o le fa’amaulalo ma le auauna ma le alofa.

GALUEGA FA’ATINO:

A. Faitau ma Fa’atusatusa (Bible Reflection)

Vaevae le vasega i vaega laiti e tolu. Ia tofu le vaega ma le tusi faitau o loo tuuina atu, e su’esu’e ai uiga o le lotomaualalo ma le fa’afiasili:

1. Luka 18:9–14 – o le fa’ataoto i le tagata Faresaio ma le tagata ao lafoga
2. Filipi 2:3–8 – Iesu ma lona loto fa’amaulalo
3. Faataoto 16:18–19 – o le mimita e oo mai ai le mala

Fai atu i vaega taitasi e: faitau le tusi ua tuuina atu, talanoaina le uiga autu, ma tusia se auala e mafai ona latou fa’aaogāina ai i le olaga o aso uma.

Faai’u i le fefaasoa’i o manatu i luma o le vasega.

E: O le Ata o le Loto.

Ia saunia pepa ma peni ma tuuina atu i le vasega. Ia ta’itasi ma tusi ai se “ata o le loto” i ni vaega se lua:

Vaega taumatau: loto e tumu i le faafiasili (mimita, lē faalogo, faamaualuga).

Vaega agavale: loto e tumu i le fa’amaulalo (fa’amagalo, fesoasoani, fa’aaloalo).

Talanoaga tuufa’atasi: I le vaega taumatau ma le agavale o le loto, o a ni taunuuga e tutupu mai ai? O lē fea o nei vaega e saogalemu ma manuia ai?”

Faai’u i le fesili: “O le ā le vaega o lou loto e te fia tuputupu a’e ai?”

PESE: Atumau ia Iesu, tatou te filemu. (When we walk with the Lord)

A’OA’OGA:

1. Ia taumafai e aveese le uiga fa’afiasili mai o tatou olaga.

2. Ia fa'alogo ia Iesu e manuia ai, ae le o tagata finau vale.
3. Ia lagona le loto mauualalo ma ola i le fa'aaloalo i aso uma.

.....

ASO SA: 26 APERILA 2026

MATAUPU: IA PEI O IESU LĒ FAAMALOLO MA LĒ FESOASOANI (*Be like Jesus the healer and helper*)

SINI: Ia malamalama le vasega, o le ola taumafai mo Iesu e le faigofie; ae faalagolago i le musumusuga a le Agaga Paia ae le o tala a tagata.

TUSI FAITAU: Mataio 8: 28 – 9: 8

FESOASOANI MO FAIAOGA

O le avea o i tatou ma tagata Kerisiano, o lo tatou i ai lava lea i totonu o le auaiga o le Atua. Ua avea ai i tatou ma tagata ua mulimuli ia Iesu, aua ua tatou talitonu ma faatuatua i le faaolataga na Ia saunia; faatasi ma ana aoaoga ua fai ma taiala i lo tatou ola taumafai mo Ia i aso uma. O le faamoemoe lava, ia tatou lagonaina i o tatou loto, mafaufau ma agaga; le taua tele o lo tatou ola ofoina atu mo Ia ma lana

Tala lelei. Ia tatou galulue ma tutu faatasi e atia'e le malo o le Atua; e pei ona afio mai Iesu ma faailoa mai i le lalolagi nei o tagata.

O le upu moni, e leai lava se tasi o i tatou e tutusa ma lo tatou Alii Faaola; auā o Iesu lava Ia, o le Alo o le Atua soifua, a o i tatou lava o tagata agasala. E i ai o tatou vaivaiga ua fai ma auala masani a le fili, na te osofaia ai i tatou ma tatou solomuli ai. E le gata i lea, a o le tau faifai mai o isi tagata, ma le faasagatau atu i isi tagata; ua taotaomia ai le ola taumafai ina ia pei o Iesu, i le ofoina atu o le alofa moni ma galuega lelei e fesoasoani ai ia i latou o manaomia le fesoasoani, ma le faia o le mea e tataua ona fai e tusa ma le finagalo o le Atua le Tama. A o le ala lea e mata'ina ai fuafuaga tataua a le Atua, ina ua toe afio Iesu i le lagi ae auina mai lona Agaga Paia ina ia mafai ai ona tatou onosaia le pola motu mai tua, ae vili tonu le ifi a maina i le faamoemoe moni o le avea o i tatou ma soo moni o le Tala Lelei ma le galuega ua tuuina mai e le tatou Faaola mo i tatou.

O le agaga moni lea o le faamoemoe o Iesu, ina ua faaalua mai ia te Ia le pule a le Atua i tagata atoa ma temoni. Na iloa lelei e temoni o Iesu le Alo o le Atua ua afio atu ina ia tineia le pogisa o loo latou faaleagaina ai ia tagata e toalua. Na latou faia ai foi ma le faaiuga mo i latou ina ia auina atu i le lafu puaa, ma paū'ū atu ai i le tofe ma malelemo ai i le vai. Na le afaina ia Iesu le aioi a tagata Kerekese ina ia maliu ese mai lo latou nuu. A o le mea sili i lona finagalo, ua faatino lona alofa mo e sa faatigaina e nei temoni.

O le aga'iga lava lea o le galuega a Iesu, e maliu atu lava o Ia i nofoaga o lo'o i ai e o puapuagatia ma mafatia i faafitauli

eseese o le soifuaga nei, ina ia faasaoloto ma faamaloloina e le gata i le tino, mafaufau atoa foi ma le agaga. Ua fai foi ma masani a tagata lea tulaga i totonu lava o eleele o tagata Iutaia ua aofia ai ma tagata o nuu ese. O soo se nofoaga lava e agai i ai Iesu, ua lolofi atu ma momoli atu i ai o e mama'i ma manaomia le fesoasoani. E pei foi ona toe maluu ane o Ia i lona nuu ae avane ia te Ia le tagata o loo taoto i le ma'i supa. Peitai, ai lava ona o le tusi lenei o Mataio, e faatatau lava mo tagata Iutaia. Na ala ai ona fetalai Iesu i le ma'i supa, ua faamagaloina ana agasala; aua o le mau lea faa-Iutaia, po o le a lava le ituaiga ma'i, e mafua mai ona o le agasala. Na gaepu e lenei fetalai le taofi a le au tusiupu ma latou manatu ai, ua faifai Iesu i le Atua. Na silafia lava e Iesu o Ia o le Alo o le Atua e pei ona alaga ai temoni, ma ua ia te Ia foi le pule mai lona Tama e faatino ai lana galuega i le lalolagi. E lei mamafa tele i le finagalo o Iesu lea tulaga, ae o le naunauta'iga lava ina ia faamaloloina le ma'i supa; aua e pei lava ona ia fetalai, e lei afio mai ona o e malolosi, a o e o loo mafatia ma puapuagatia. O le faamoemoe lea o lana galuega na afio mai, ia talaia ma soloia i lalo pa vaeloto o le va feagai o tagata ua vaevaeina ai tagata i totonu o sosaiete. Ia faasaoloto ma lalagaina leo o lo'o taotaomia, ina ia tulaga tutusa tagata uma i manuia mai le Atua. O lona tumau atu i lona Tama na afua ai ona le mafai e tagata ona tineia lona faamoemoe, ina ia ola tagata uma i le alofa tunoa o le Atua le Tama. Ia faapea foi mo i tatou, a tatou tumau i le mafutaga ma le Atua e ala i lona Agaga Paia; ona mautinoa lea e le mafaia e se isi mea ona tineia lo tatou ola taumafai mo Iesu ma lona Tala Lelei, ina ia tele nisi agaga e ola ona o i tatou

ua avea ma soo moni e faatinoina le galuega e pei ona faia e lo tatou Alii Faaola.

GALUEGA FAATINO: TUSIGA SOLO

Tusi mai sau solo i le autu "O A'U O LE SO'O MONI MO IESU" Ia le silia ma le 2 fuaiupu, ae ta'i 4 laina i le fuaiupu.

PESE: Pese ma Viiga 177

A'OA'OGA:

1. Avea i tatou ma soo moni o le Tala Lelei ia Iesu.
2. Ofo atu galuega lelei e fesoasoani mo isi tagata.
3. A fia pei o Iesu, ia fai le amio lelei ma tumau i le Atua.

.....

ASO SA 3 ME 2026

MATAUPU: TOU TE MAUA LE MALOLOGA MO OUTOU AGAGA (*You will find rest for your souls*)

SINI: Ia malamalama le vasega, ua na o Iesu le Alii, e maua ai le malologa mo o tatou agaga, pe a tatou fa'aa'oa'o ia te Ia, i le agamalu ma le loto maulalo.

TUSI FAITAU: Mataio 11: 20 – 30

FESOASOANI MO FAIAOGA:

(v.28, 29) Ia outou omai ia te a'u, outou uma o e tigaina ma mafatia i avega, o a'u foi e malolo ai outou. Ia outou amoina la'u amo, ma ia outou faaa'oa'o ia te a'u, aua o a'u le agamalu ma le loto maulalo; ona maua lea e outou o le malologa mo outou agaga.

O le alofa tunoa o le Atua na afua ai ona auina mai lona Alo pele e toatasi, ina ia laveai ma faaola le lalolagi agasala. O le faamoemoe ola foi lea mo tagata uma ina ia salamo ma faatuatua i le Atua e ola ai.

O le tasi lea o galuega faaola a Iesu i le lalolagi pei ona faamauina e le tusi a Mataio; le mataupu e 11. 20 - 30. O le faaaliga o le Faamasinoga a le Atua e oo mai pei ona valoia e auga perofeta i le Feagaiga tuai. Peitai o lea ua oo atu lana talaiga i nuu i Kalilaia. Fai mai le tala ua faasa'i atu Iesu i aai uma na Ia faia ai vavega ma faamalologa i tagata, aua ua silafia e Iesu lo latou le salamo ai a latou agasala. Fetalai atu Iesu; Oi talofa ia te oe Koasini, oi talofa ia te oe Petesaita!. Se a le uiga o le sa'i a Iesu? Ua vaavaai atu Iesu ma le alofa i le sasao faa-afi o le ola agasala, leai se faamoemoe ola o i ai i ia nuu aua ua latou faia pea o le agasala tele, ua latou le ola i poloaiga ma tulafono, a ua faasili ia i latou le ola tuinanau, o le faailoga o le leai o se ola mata'u i le Atua e ao ona talitonu ma faatuatua i ai. A o le itu sili ona leaga, e tausolomua mai lava i taitai o nuu le faatupuina o le agasala i tagata. Ua leai lava ma se tu a le Atua i o latou olaga. Ua

matua'i oia le vatapuia faale-tagata ola i totonu o le lotoifale i aiga ma nuu. O lona uiga, pei o upu a Iesu na fetalai ai; E feoloolo Turo ma Saitonu i le aso faamasino ia te outou. E feoloolo foi le nuu o Sotoma ia te oe. Upu ia a Iesu e faatusaina ai le matautia ma le ogaoga o le agasala a o le malaia o le a oo i ai pe a le salamo mai a latou agasala.

Peitai, o lea ua faaii lava le galuega a Iesu i ia nuu, i lana faafetai atu i lona Tama e tusa o lana faasinoga ma le faamoemoe o le faaolataga mo le lalolagi, ae maise ai, ina ua natia ia mea i e popoto ma e atamamai, a ua faaaliga lava ia mea i tama valevale. Se a le uiga? O le faaaliga o le alofa tunoa lea o le Atua i tupulaga fou ua tutupu a'e ina ia latou iloa ma malamalama ai; o i latou ia e toe afua ai se taeao fou ma le ola fou ia Iesu le Alii o le Faaolataga. O i latou ia e tulai mai ma faasusulu le malamalama o le Malo o le Atua ma le faaolataga mo le lalolagi uma.

A o le ola pologa ma le ola saisaitia o agaga o tagata ona o le agasala, lea na fetalai mamnino lava i ai Iesu; "Ia outou omai ia te a'u, outou uma o e tigaina ma mafatia i avega, o a'u foi e malolo ai outou. Ia outou amoina la'u amo, ma ia outou faaa'oa'o ia te a'u, aua o a'u le agamalu ma le loto maulalo; ona maua lea e outou o le malologa mo outou agaga." O le auala lea ma le avanoa, toe pau lea o le faamoemoe ma le faasinomaga mo i latou uma, e maua ai le malologa mai mafatiaga ma avega mamafa o latou amoina pea. Ua na o Iesu le Alii o le Ola, e le gata e maua ai le malologa o latou tino, a ua faapea i le mafaufau ae maise ai o latou agaga. Fai mai le tatou mataupu, 'Tou te maua le malologa mo outou agaga. O le a le uiga? Ua na o Iesu lava

e mapu ma malolo ai i tatou uma mai le pologa o le agasala. Ae faapefea ona tupu o lea mea? Ioe, o le ala o le salamo ma fulitua i le leaga ma le pouliuli o faiga a Satani; ona tatou maua lea o le to'amalie ma le filemu moni mai le Atua, ma le Ola faavavau faatasi ma Ia i lona Malo filemu. Tatou o ma le mautinoa ia Iesu pei ona ia fetalai; Ia amoina lana amoa e mama ia; faata'ita'i ma faaa'oa'o ia te Ia aua o Ia le agamalu ma loto maulalo. Le ata atoa lena o le Atua alofa na faia e Iesu i le satauro na Ia amoina toatasi, ina ia tatou maua le Ola ma le Ola Faavavau e ala i le salamo ma le faatuatua faamaoni ia te Ia....Manuia le Aso Sa i le faatasi mai o lo tatou Alii.

Uiga o Upu:

- i) faasa'i - tautala faamalosi atu
- ii) ie talatala ma le lefulefu - o mea ia e faailoga ai le salamo
- iii) malologa - mapusaga, filemu moni.

GALUEGA FAATINO: FAATINO LE TALA

Faa-ata mai le fesagaiga a Iesu ma tagata o nuu.

PESE: Pese ma Viiga 135 & 125

A'OA'OGA:

1. Ua na o Iesu tatou te mapu ma malolo ai mai faigata.

2. E moomia le salamo pe a fai ua sese lo ta ola
3. Ia salamo ma faatuatua i le Ali, e malolo ai o tatou agaga.

.....

ASO SA 10 ME 2026 (ASO SA O TINĀ)

MATAUPU: MASALOSALOGA O MOSE
(*Mose's doubts*)

SINI: Ia malamalama le vasega, ina ia aveese le ola masalosalo, ae faalogo ma usitai i le Atua e maua ai le mautinoa i le ola faatuatua ia te Ia.

TUSI FAITAU: Esoto 4: 1 – 17

FESOASOANI MO FAIAOGA:

O le upu masalosaloga e faavae mai le upu masalo, o lona uiga o le le mautinoa, po o le le mautonu i se faamoemoe ua faalogo ma vaai i ai. O le tasi lea o lagona faale-tagata e tupu pea pe a oo ina feagai le tagata ma mea e tutupu i le olaga, e le masani ai. Aua o le siosiomaga o lo o ola ai le tagata i aso uma, e leai se masalosalo, a o le ola mautinoa i mea ua masani ai, o i ai le to'amalie ma le filemu i lona loto ma le mafaufau.

Peitai, o le faate'ia ai o Mose i le valaau mai o le Atua ia te ia e tusa ma lona finagalo, e alu e aumai le nuu o Isaraelu mai Aikupito, o se mea e fou i lona olaga e le masani ai. O le afuaga lea o le tupu ai o le lagona masalosalo o Mose, aua ua le mautonu, le mautinoa i lona loto pe talafeagai mo ia le feau ua faailoa mai. O le ala lea o lana tali atu e faapea; "Ona tali atu lea o Mose, ua faapea atu, Faauta, latou te le talia mai a'u, latou te le faalogo mai foi i la'u upu, aua o le a fai mai i latou, E le i fa'aali mai le Alii ia te oe." Ioe, o le tali a le tagata masalosalo, ua ta'u atu ai i le Atua lona le taliaina i lona mafaufau aua e le iloa po o le a le taunuuga e oo i ai. E talitonu le manatu, ai lava ua tomanatu ifo Mose ia te ia, o ia o le tagata agasala. O lona fasiotia o le tagata Aikupito na ala ai ona sola ese mai, atonu e lamatia ai lona ola pe a toe vaaia lona tino i Aikupito.

Silasila foi i le tali a Mose, o le tali atu i le Atua i le mea e gata ai tali. Muamua fai mai, 'latou te le talia mai; lua, latou te le faalogo mai foi i la'u upu. Tolu, aua o le a fai mai i latou, E le i fa'aali mai le Alii ia te oe.' Se a le uiga o upu a Mose ma lana tali? O le lagona o le le mautonu, lagona le popole vale ma le fefe ia Aikupito ma le tupu o Farao. Lua, o le a le talitonuina o ia e tagata aua o ia o le tagata agasala a o aumai i Aikupito. E le toe amanaia sana upu ma se tala e fai atu ia i latou. O lona uiga, o lo o tumau pea le mafaufau ma le olaga o Mose i le mea tuai, le olaga e le suia lava; o lo o ola i se olaga le mautonu ma le popole; e mamao lava ia ma le Atua i le ola faatuatua.

Peitai, o lea ua fa'aogaina e le Atua mea faatauva e pei o le tootoo e fa'aalia ai lona mana fai vavega ina ia suia ai lona

ola masalosalo i le Atua. Fetalai le Atua ia lafo le tootoo i le eleele, ona liu gata ai lea o le tootoo, lea na sola ese ai Mose ma le fefe. Toe faatonu e le Atua e aapa atu lona lima i le i'u ona toe liu ai lea i le tootoo. O le ata o le mea e leai se ola ae faatupuina ai e le Atua le ola. O lona uiga o le faamoemoe ua mate ae liliuina e le Atua i le faamoemoe ola ina ia ola ai le tagata le faatuatua. Ua faapena foi i le lima ua tuuina i le fatafata ae toina mai ua lepela, toe tuu atu i lona fatafata ma toe to mai ai ua toe lelei pei o lona tino. O le faailoga o le ola agasala na te liliuina i le ola mama ma faapaiaina mo le Atua. Ioe, ua oo lava foi i le toe augani atu i le Atua, o ia e le iloa fai lauga, e le iloa ona tautala. O lagona lava o le masalosalo ma le popole ma le fefe. Tali le Atua, na te avatu upu i lona gutu e gagana ai i luma o Farao atoa ai ma Isaraelu. O Mose foi o se tagata e foliga mai o lo o tumau i le ola toilalo ma leai se famoemoe ola, ina ua toe fai atu i le Atua, e auina atu se tasi e tatau ona auina atu. O le ala toasa lea o le Atua talu ai lona masalosalo vale, ma faailoa ai e le Atua ia Arona lona uso e fai ma fai lauga a o ia e fai ma Atua mo ia.

Fanau e, o le ola masalosalo o Mose i le Atua e tusa ma le valaauina o ia, o se tu ma se aga faa-tiapolo; ae maise lava pe a feagai ma feutaga'i ma le Atua. E a le Atua e faaali mai lona alofa ma lana amiotonu i le mea e tatau ona fai, ae a le tagata e masalosalo pea. O le fesili, E mafua i se a ona tupu o lea tulaga i le soifuaga faale-tagata? Ioe, ona o le le tumau i le faatuatua moni i le Atua e toatasi, o la o le afuaga o le Ola ma le Manuia o lana fanau a tagata. E le tatau la ona i ai se ola masalosalo pe faalotolotolua i tofiga ma valaauina mai

le Atua. Po o le a lava le faasinoga ma le finagalo o le Atua mo le tagata, i le faigofie po o le faigata, i le soua o le olaga ma tiga o faigata, pau lava lo tatou tiute tauave, o le faalogo ma usitai ma faatuatua i le Atua, ma fai loa le finagalo o le Atua. Ia faalagolago i lo tatou Atua e ala i lona mana fai vavega ma lona alofa tunoa, e taunuu ai i le manuia faamoemoega lelei uma. O le ola masalosalo, o lagona vaivai ia e fiafia i ai Satani; peitai e tupu mai ai le maasiasi ma le faalumaina. O le valaauina o Mose e le Atua e alu e taitai mai le nuu mai Aikupito, na taunuu manuia ina ua tuutasi i le Atua lona loto ma lona agaga atoa, na malosai ai ma lototele ai e faataunuu le finagalo o lona Atua, ma avea ai Mose o se uo moni a le Atua ma o se tagata ua maua'a lona faatuatua e taitai i lona nuu filifilia mai faigata ma puapuaga.

Uiga o Upu:

- i) masalosalo - le mautonu, faalotolotolua
- ii) faaali - ta'u mai le feau, faailoa mai
- iii) faailoga - vavega e faia e le Atua

GALUEGA FAATINO: TALIGA FESILI

1. Aisea na masalosalo ai Mose i le Atua?
2. E mafua i se a ona tupu le lagona masalosalo?
3. Aisea na toasa ai le Atua ia Mose? Faamatala auiliili mai le mea na tupu ai le toasa o le Atua.

4. Na suia lagona masalosalo o Mose i le la feutga'iga ma le Atua?
5. O le a se aoaoga taua mo i tatou e tusa o la tatou mataupu?

PESE: Pese ma Viiga 224

A'OA'OGA:

1. 'Aua le ola masalosalo
2. 'Aua le faatuatua itiiti
3. Faalogo ma usitai ma tumau i le faatuatua
4. A valaau mai le Atua, tula'i loa ma alu ma le faatuatua
5. 'Aua le fefe!

.....

ASO SA: 17 ME 2026.

MATAUPU: APERAMO (*Abram*)

SINI: Ia malamalama le vasega o Aperaamo o se tama faatuatua.

TUSI FAITAU: Kenese 12: 10 – 20

FESOASOANI MO FAIAOGA:

E i ai aafiaga o mea uma, o nisi aafiaga e tumau pea pe a mavae atu le tagata. Peitai e toatele nisi e le vaavaai mamao, a ua na ona ano i aafiaga pito lata mai o o latou gaioiga. Sa tataua ia Aperamo ona filifili i mea e 2: po o le tumau pea i le aai o Uro lea na aumau ai, po o le tapena o lona aiga ma ana mea uma, ae agai atu i se nofoaga fou na te le'i malamalama ai. Na o le tuleiga lava a le Atua na ia fa'alagolago ai, e fai ma taiala i le manuia. E talitonu e le'i manatu lava Aperamo po o le a se fesootaiga o lana filifiliga ma mea tutupu o le lumanai. A o lea ua tatou iloa o le loto usitai o Aperamo na faavaeina ai se vaega tele o le tala fa'asolopito o le lalolagi atoa, ma le soifuaga i nei ona po. O lana filifiliga lea na tupuga mai ai le nuu fa'apitoa o le Atua, le nuu na afio ifo ai le Atua i le lalolagi, ma faataunuuina ai le folafolaga mai anamua. Na taua mai ia Aperamo le manuia o le lalolagi atoa. Tatou te le iloa aafiaga tuutuumamao o mea tatou te faia i le aso nei, ae po o ni aafiaga manuia pe le manuia. Tau o lo tatou mautinoa, e i ai aafiaga o o tatou gaioiga i le lumanai. Ua lava foi lea tatou te manatunatu toto'a ai i o tatou filifiliga i le taimi nei, ma saili ai i le taitaiga a le Atua. Itu lelei. O lona fa'atuatua sa fiafia ai le Atua. Sa fai ma tama o le nuu o Israelu. Fa'aaloaloga e tagata, loto toa, sa finau mo le saogalemu o lona aiga.. E le gata o se tama alofa ma le agalelei i lona aiga, ae sa tali malo lelei foi. Fai lafu manu ma le lima malosi. Sa alo ese mai vevesiga ma feeseeseaiga, ae ina ua le toe mafai ona alofia, ona ia tuuina atu lea o le avanoa i le ua la fesagai, e fa'amautu aiaiga mo le foia o

feeseeseaiga Vaivaiga. Sa tautala sese ina ua tuliloa ma fa'afetaui atu e tagata Lesona tatou te maua mai lona olaga. E finagalo le Atua tatou te fa'alagolago ma fa'atuatua ia te ia – ae aua le fa'amoemoe i so tatou lava malosi. O le finagalo o le Atua mai lava i le amataga, o le fa'alauiloa o lona suafa i tagata uma o le lalolagi Fa'amaumauga autu. O le mea sa nofo ai: Fanau i Uro i Kaletaia, ae sa nofo i Kanana mo le vaega tele o lona olaga. O lana galuega: Fai lafu manu. O lona aiga: Uso: Nakori ma Arana. Tama: Tara. Toalua: Sarai. Tagata na ia tausia: Lota. Fanau: Isamaeli ma Isaako. Tagata sa feagai ma ia: Apimeleko, Mekitaseko.

GALUEGA FAATINO: Fesili ma Tali

1. O le a se tali a le Ekalesia ma tagata ia Aperamo?
2. I le faaiuga o le fuaiupu e 13, o I ai upu pei – e ola ai foi au ona o oe.”. o le a le uiga o ia upu a Aperaamo

PESE: Pese ma Viiga 111

A'OA'OGA:

1. Ia faatino galuega lelei.
2. Tumau le ola faatuatua
3. Faamalosi i lau galuega.

.....

ASO SA: 24 ME 2026.

MATAUPU: O LE AGAGA PAIA *The Holy Spirit*)

SINI: Ia malamalama i le vasega, i le fesoasoani mai o le Agaga Paia o le Atua, ua le gata ina tupu tupu ai lana Ekalesia i le lalolagi, ae faamanatu mai pea foi ia I tatou, le alofa tunoa ma le alofa mutimutivale o le Alii, ina ia tele pea nisi e fanaufouina ma toe foafoa mo le Alii.

TUSI FAITAU: Tito 3: 3 – 8

FESOASOANI MO FAIAOGA:

O le tusi a Paulo ia Tito; lona atalii faa-le-agaga. O le tusi e toe faamanatu ai ia Tito le faamoemoe na mafua ai ona tofia e Paulo e galue i Kereta. Ia tapu'e le faamoemoe o le Ekalesia i Kereta e ala i le Mana o le Atua. E lei faigofie le tau amataga o le faavaeina o le Talalelei i Kereta; le ala foi lea o le apoapoi o Paulo ia Tito; ia faamanatu i le au-kerisiano i Kereta le faamoemoe o lo latou valaauina e le Atua e avea ma kerisiano: ia faia galuega lelei ma le matagofie. O le tuanai o le au kerisiano i Kereta – sa leaga. Ae o le faigata foi lea o le galuega talai a le au aposetolo. Sa iloga Kereta i le **faatuiese**; sa malosi le tetee o tagata Kereta i pulega a le malo o Roma, o e sa o latou pulea le malo i ia

ona po. Sa iloga i le **faitaaga**; ona o se tasi lea o vaega o lo latou talitonuga faa-le-tapuaiga i lo latou atua tamaitai o Isa. Sa iloga Kereta i le **pepelo**. O le faiva masani lea o tagata o le motu. E saili mea e manuia ai i le tau faaoleole ma le pepelo – o le taleni e mafua mai ia Seu lo latou atua. A'o Kereta foi sa iloga i le vai o lo latou atua tamaitai o Isa. Faapea le tala, a fia faamagalo sau agasala ona o se mea leaga ua e fai – ona alu lea i le fale tapuai o Isa, o iai le vai – taua o le vai o Isa - e taele ai, ona magalo ai lea – o se taufaavalea lava ina a tele. Le tuanai lea o Kereta o lo o apoapoi ai Paulo ia Tito ina nei toe liliu i ai le au kerisiano. O le uiga o le faamanatu e Paulo o le tuanai lea o tagata Kereta – ina ia o latou manatua ai – o le manuia o i ai i le taimi nei – ona o le alofa o le Atua. Le alofa o le Atua na liua lo latou ola faatautee, e avea ma nuu usiusitai i tulafono o le malo, ma maua ai le filemu. A'o le alofa foi o le Atua, na tafi ese ai lo latou faitaaga, ae liliu mai e fai ma faataitaiga lelei mo Atenai. O le alofa foi o le Atua na liua ai lo latou faiva o le faaoleole; ae fai ma nuu amio tonu ma le faamaoni. O le alofa fo'i o le Atua, ua papatisoina ai i latou i le papatisoga i le Agaga Paia; lea ua toe fuataiina ma faafouina ai lo latou ola.

GALUEGA FAATINO: Tali Fesili

1. O ai le igoa o le perofeta sa ta'ua i le tatou tala?
2. O fea sa i ai Paulo a o feagai Tito ma le galuega?
3. O le a le tau i o le galuega a Tito?

PESE: Pese ma Viiga 274

A’OA’OGA:

1. Faamoemoe i le Agaga Paia.
2. Manatua le Atua i taimi uma.
3. Ola i le taitaiga a le Agaga Paia.

.....

ASO SA: 31 ME 2026.

MATAUPU: O SE IE UFIUFI UA TOESEINA
(*A veil removed*)

SINI: Ia malamalama le vasega, o le galue mai
o le Agaga Paia I o tatou tagata agasala,
e mafai ona aveesea ai mea leaga uma,
ae talia Iesu le faaola I o tatou olaga.

TUSI FAITAU: 2 Korinito 3.7 – 18

FESOASOANI MO FAIAOGA:

O le a sau vaai faale faatuatua ia Israelu i le taimi nei? Po
o ua galo ea ia te i latou lo latou Atua po o ua atua i e o fai
ma o latou taitai? Pe le faapea foi ua tele le poto ma le
tamaoiga ua maua ua faapea ai ua na o latou ma le lalolagi?
Ailoga e sa’o ia faamatalaga. Tasi lenei o faafitauli o lo o

tulai mai i Korinito. O talaiga sese o lo o tausolomua ai
tagata Iutaia. Ua avea lea ma mea ua tosina i ai nisi. O le
mafuaaga lea o lo latou fesiligia o Paulo i se tusi e faailoa ai
ona agavaa. Peita’i, ua fofola manino e Paulo, e le manaomia
se tusi faamaonia. Lea ua molimau atu ai le aposetolo ina ia
maua e nisi tagata lena ola. O lo o fa’aaogaina i le mataupu
lenei, faiga masani o tusitusiga a Paulo, e talanoa i le
faafeagai o upu. Pei ona atagia i le vaega sa faitauina. O lo
o talanoa ai Paulo i papatusi maa, ma papatusi aano o le loto,
o le tusi e fasioti, ao le agaga e faaola. O le feagaiga fou ma
le feagaiga tuai, O le sauniga na oo mai ai le oti, ma le
sauniga na oo mai ai le Agaga. O le mamalu e faaumatia ma
le mamalu e tumau. E foliga mai o lo o ave le faamamafa a
le aposetolo i le galuega a le Agaga na te aumaia le ola fou.
I le fuaiupu ua fai nei ma matua, o lo o manino mai ai, ua
avea le faataua e Paulo o le Agaga, ma mea pei ai ua le taua
tele le tusi. Aua “**O le tusi e fasioti, ao le Agaga e faaola.**”
O lo o atagia mai i le taumafai o Paulo e Faatusatusa le
feagaiga tuai ma le feagaiga fou. O le feagaiga tuai, o lo o
faamamafa ai lava le talanoa a Paulo i tulafono a Mose. O
tulafono na faavae ma lima taitaina ai le nuu o Israelu. O le
manatu o le aposetolo e le mafai e le tagata na
tauamiotonuina i le tausiga o tulafono. E leai foi se tagata e
mafai na atoatoa le tausiga o tulafono. Aua o le tulafono ua
i loa ai e le tagata le agasala. E ese mai lea i le feagaiga fou.
O le feagaiga e le tusia i papa maa, ae tusi i papaaano o le
loto. E le tau faitau pe tau autilo foi. Aua ua tamau e le agaga
paia i le loto. Mea lea ua tupu Israelu ma le va nonofo ai
ma isi atunuu, ua avea ma mea ua le toe faataua ai mea sa

tusitusia. Ua mulimuli atu ai uma ma atunuu o le Pasefika i le pogisa. O le feagaiga na saunia e Iesu Keriso, e tumau ma nofo i le loto. O le tagata foi e taitaina e le Agaga o le Atua ua i ai le ola e tutusa ai tagata uma. Isaraelu ua toeseina ona o le faamaualuluga o ona tagata. Le Ekalesia ua tauau ina mou ese ona ua amata ona o pogisa i le vala lea. E le o faaleaogaina e Paulo le tulafono, leai. Ao le manatu o le aposetolo, sa i ai lava le mamalu i le tulafono, peitai, ua faailoa mai le feagaiga fou na te tauave ma faaauau le mamalu lena o le Atua. O lona uiga, sa i ai foi le mamalu i tulafono a Mose, ae o le faatuatua i le mana o le faaolataga na aumaia e Iesu, e le toe manaomia ai le ola i tulafono a Mose na tusia i papa maa. Ae ola i tulafono a le Atua ua tusia i papa aano o le loto. Le loto ua tauamiotonuina ina ua soifua ai Keriso. O le vaavaalua o le tagata ma le Atua, o le mautinoa lea ua ia te ia le ola.

GALUEGA FAATINO: Fetufaa'i le vasega i le fesili lea.

1. O le a ua faatusaina i ai le ie ufiufi ua toeseina?

PESE: Pese ma Viiga 190

A'OA'OGA:

1. Tineia le Ola Taufaaaleaga
2. Faamuamua le Atua e manuia ai.
3. Tuu le tago i mea e agasala ai.

ASO SA: 7 IUNI 2026.

MATAUPU: **O MAI IA, SE I TATOU SOALAUPULE** (*Come now, let us reason*)

SINI: Ia malamalama le vasega, e ao lava ina tatou talia le galue mai o le Agaga o le Atua, ina ia ttou tumau ai I le faatuatua i lona finagalo paia.

TUSI FAITAU: Isaia 1.10 – 20

FESOASOANI MO FAIAOGA:

O le mea lea e masani ona fai e le tele o aiga; soalaupule ma faatalatalanoa se tasi e finagalo i ai le aiga. E 2 mea e moomia mo so o se talanoaga; ia lelei le tautala, ae ia sili ona lelei le faalogo. O le ala foi lena na faamanino ai e Isaia i le nuu le taua o taliga e faalogo ai, faapena tatou i lenei taeao, na o tino tagata ae leai ni taliga. O valoaga Isaia i le malamalama, e faatatau tonu ia Iesu Keriso, pe a fua i le auala na faamau ai e Mataio 4: 13-14; *Ua tuua e ia le aai o Nasareta, ua maliliu atu o ia ma nofo i Kapanau mi ua tu matafaga i le tua oi o Sepulona ma Nafatali, ina ia taunuu ai le upu a le perofeta o Isaia.* Na faitau faatasi Iesu ma tagata o Kalilaia o nuu ese, o ina na lauiloa ai o ia i lana galuega o le alofa, na maua ai e tagata le malamalama ma le olioli moni. Na vaai mamao le perofeta, i le afio faalua mai o le

Keriso, e faatu lona malo amiotonu; o lena e fia suia ai tatou mo lona malo fou. O lo latou fiafia, e pei o e sele saito pe a tele le seleselega; e pei o fitafita ua tufatufa vete o le taua ina ua manumalo mai; e pei o le pologa ua gauia lana amo ma lona sasa. O le a le toe i ai se fetauai, leai se atuatuvaale o le nuu; O seevae ma ofu ua lilo ia i le toto, o le a susunuina, e fai ma fafie o le afi, o le a le toe aoao foi le nuu i ni taua, o le a ola fealofani tagata uma, pe a suia tatou uma i le malamalama o Keriso. E iloa ua tatou ola i le malamalama o Keriso, ina ua o tatou galulue faatasi. Malamalama o Keriso na ia faamaualalo ai o Ia i ona mamalu, ae faatino ana galuega mo le lelei o isi. Aua ua fanau mai mo i tatou le tama; Ua foaiina mai mo i tatou le atalii; Le atalii lea fai mai Isaia; e i lona ua le malo; O ia o le silisili ese; O le faipule; O le Atua malosi; O le Tama o le faavavau; O le Alii o le filemu. Afai o le silisili ese, e leai la se mea e faanenefu ia te ia. Faipule; o lo o i ai le poto/atamai e pulea ai mea uma. Atua malosi, o i ai le Afioga/Tofa e faataunuu ai ana fuafuaga atamai. E faapena le mea sa oo i le nuu o Isaraelu; O le nuu sa savavali i le pouliuli, sa valea, sa ola i le agasala; o e sa nonofo i le nuu o le ata o le oti. Tagata sa feola ma nonofo i le nuu, ae lafoia i ai le ataata o le oti; e nonofo ma aumau i le nuu, ae lia tino i le ataata o le oti, e leai se fiafia, e atuatuvaale i taimi uma. Pau o lea, faafetai aua ua o latou iloa le malamalama tele, ua pupula mai ia te i latou le malamalama. O le malamalama lea o lo o molimau iai Luka 1:78-79; *Ona ua mutimutivale le alofa o lo tatou Atua, ua asiasi mai ai le malamalama mai luga, e faamalamalama ai i e nonofo i le pouliuli ma le ata o le oti, e taitai i o tatou vae*

i le ala o le manuia. O le malamalama e taitaiina i tatou i mea tatou te manuia ai.

GALUEGA FAATINO: Talanoa le Mataupu.

PESE: Pese ma Viiga 73

A'OA'OGA:

1. Ia faatino galuega lelei.
2. Ia maua le ola fetausiai
3. Fai ma le tonu au faaiuga fai.
4. Manatua le Atua i a outou talanoaga.

.....

ASO SA: 14 IUNI 2026

MATAUPU: **O LATOU, E LE O TATOU**
(Them, not us)

SINI: Ia malamalama le vasega, e le tataua ona tatou vaai maulalo i isi uso a tagata, ae ia tutusa tagata uma i lau vaai

TUSI FAITAU: Isaia 10:1 – 4

FESOASOANI MO FAIAOGA:

O le amio leaga o tagata o loo faa-ulutalaina ai le Mataupu 10 o le Tusi faitau, o le finauga i le va o ē o loo umia le pule ma tagata e vaivai le tamaoaiga o le sosaiete o Isaraelu i le vaitau o le Perofeta o Isaia.

O le vaitau lea o le tupu o Esekia i le malo o Iuta ma ana pulega sauā, o faiga le sa'o, o faiga le tutusa ma le pi'opi'o. Ua tigaina ai le toatele o tagata matitiva, ma tagata e le taualoa i le saofaiga i totonu o le nuu o Isaraelu ma Iuta, ae fiafia le au mauoa. Ua faateleina ai oloa a ē mauoa, ae ua atili ai ona matitiva ma oi nai tagata e vaivai le tamaoaiga

O le ala lea o le taualaga ma le faamanatu o le perofeta o Isaia i tagata o loo pulea le nuu, ina ia fai ma se alofa i tagata auā o loo silafaga le Atua, na te taui mai nei amio leaga o loo latou faia i tagata lautele.

E i ai le faamasinoga o loo mulimuli mai a le Atua mo i latou o loo avea ma pule. O tulafono ua latou faia ma le le tonu, e toe aafia ai lava latou. O le a avea foi a latou oa ua maua, e faoa e nisi tagata ese. Lea o le a oo mai le taimi, e oo mai ai pulega e malosi atu a Asuria, o le taui lea mai le Atua

A'o se faamalosi'au foi mo tagata lautele o Iuta ma Isaraelu, ina ia aua nei faavaivai ai le ola taumafai, e le gata i le atinaeina o aiga ma le laufanua, ae ia pipii pea i le Atua ma lona finagalo paia, e manuia ai a latou taumafaiga uma o loo fai

O loo aumai ai foi ma se faamalosi mo i tatou le fanau i lenei taeao, ua maua loa le pule ma le malosi e ta'ita'i ai, ua galo loa le alofa e tataua ona faamuamua. E tataua lava ona

faamuamua le Atua i mea uma, ona manuia lea o le ola o le tagata

O tatou uma o auauna le aogā, ua na o le Atua lava, e ana le pule aoao, ua tatou maua mai ai mea lelei uma o lenei lalolagi, o loo tatou soifua ai. Ae faamaualuga loa le tagata, ona le fiafia lea o le Atua.

GALUEGA FAATINO: Fa'aaliga Manatu

Tuu le avanoa i le vasega, e fa'aali mai ai ni o latou manatu, i le uiga o loo aumai e le tusi faitau ma le autu- O latou, e le o tatou. Poo ua tusingilima ea le autu?

PESE: Pese ma Viiga 368 - Fai mea tonu...

A'OA'OGA:

1. Ia e alofa atu i tagata matitiva
2. Ia pule ma le alofa
3. E tauia e le Atua tatou, i mea ua tatou faia

.....

ASO SA: 21 IUNI 2026

MATAUPU: UA FAAVASEGAINA *Working it out*)

SINI: Ia malamalama le vasega, e silafia e le Atua mea uma tatou te faia, ua uma foi ona Ia faatulagaina mea uma mo le tagata

TUSI FAITAU: Iona 4:1 – 11

FESOASOANI MO FAIAOGA:

O se tala malamalama le tala ia Iona le perofeta, na valaauina e le Atua, e alu i Nineva, e ta'u i ai lona finagalo, ae ua ia sola ese, na sola i se vaa ma na lafoaina i le sami, ma folo ai e le i'a na saunia e le Atua. A'o le avanoa lona lua lea mo Iona mai le Atua, ina ua toe luai e le i'a i le laueleele matutu. Ae foliga mai e i ai se mea ua le fiafia ai Iona i le Atua, ua ita ma ua tatalo ai i le Atua, e aveese le ola mai ia te ia, ua sili ai le oti

Pei ua ita Iona i le Atua, ona ua le faataunuuina lona toasa ia Nineva, ae ua toe faasaoina mai, ina ua uma lana talaiga sa fai i le aai. Ua manatu faapito Iona, e tatau lava na o latou e alofa i ai le Atua. A'o lenei ua alofa fua foi ia Nineva, o se nuu o loo fai ma o latou fili i lea vaitau

Ua manatu Iona i manatu faa-le-tagata, ua galo i le perofeta, o manatu o le tagata, e ese mamao ma le finagalo paia ole Atua. O le Atua foi, o le Atua e alofa fua i tagata uma, aemaise lava le tagata agasala ua toe salamo vave lava, ma toe foi i le Atua. Ua manao lava Iona ia faaoo pea le malaia ia Nineva ae aua le toe faamagaloina.

A'o le faavasegaina lelei lea pei ona aumai e le autu o lenei taeao. E fiu le tagata e taamilo solo ma taumafai e suia se mea, ua maea tapena lelei ma faavasegaina e le Atua mea uma.

Ua faamanatu mai foi e Iona se aoaoga tāua mo i tatou uma i lenei taeao. Ua fia pule Iona i lona ola, o lona manao ua sili ai lona oti. Ae o lo o finagalo le Atua, e alu e fai se galuega lelei, mo nisi o ona uso a tagata.

Sa tapenaina uma e le Atua, auala na uia e Iona, e lei fano ai le ola o Iona, ae sa faataunuuin uma i le manuia, auā o loo mulimuli ai pea le alofa o le Atua ia te ia.

GALUEGA FAATINO: Tali Fesili

Tali mai fesili nei

1. O le a sou manatu, sa usita'i Iona i le Atua?

Tali: Leai, sa sola ese Iona, e le'i usita'i, ua fai lona loto

2. E faafia ona valaau le Atua ia Iona?

Tali: Faa 2

3. O ai le igoa o le aai na to'asā ai le Atua?

Tali: Nineva

4. Aisea na le taunuu ai le to'asa o le Atua ia Nineva?

Tali: Ona ua salamō ile talaiga a Iona

5. O le a sau aoaoga fou ua maua mai i le tala?
Tali: Ia tatou faalogo ma usitai

PESE: Pese ma Viiga 234 Pe a ita tele mai

A’OA’OGA:

1. Ua maea tapena e le Atua mea uma mo le tagata
2. Faalogo ma usitai
3. Aua le fia pule i le ola a le Atua

.....

ASO SA: 28 IUNI 2026

MATAUPU: FA’AAOGA SESĒ LE PULE
(*Abuse of power*)

SINI: Ia malamalama le vasega, e finagalo le
Atua ia faaaoga tataua le pule ua Ia tuuina
mai i le tagata

TUSI FAITAU: 2 Samuelu 12:1 – 10

FESOASOANI MO FAIAOGA:

O le tasi lenei o tala malamalama ia Tavita le tupu o Israelu,
i le taimi o ana pulega ma taitaiga o le nuu o le Atua. Sa lelei
mea uma, sa ia faamoemoe foi i le Atua, auā le taitaiga o le

nuu. Ae peitai, ua i ai le mea ua tupu, ina ua faaosoosoina
Tavita e fai le agasala. O lona mana’o ia Patesepa le fafine
lalelei, le avā a Uria le sa Heti, e fai ma ana avā. Lea ua solia
ai e Tavita le tasi o tulafono a le Atua, aua e te mulilua.

E pei ona i ai le Tusi faitau o lenei Aso Sa, ua auina e le Atua
Natano le perofeta, e ta’u ia Tavita le mea o le a tupu ia te
ia. Ua amata ai i le faamatalaina o se tala faa-faataoto, e
leiloa e Tavita lona uiga moni.

Na matuā ita le tupu i le faataoto na faamatalaina e Natano,
ae e te’i le tupu, ua faiatu Natano, o ia tonu lea e faatatau i
ai le iuga o lenei faataoto. Ioe, o le iuga lea o le tagata ua i
ai le pule, ae ua faaaoga sese, ma ua faagalo le Atua ma lana
silafaga ati

E telē le aafiaga na oo i ai Tavita e tusa o lona faaaogā sesē
o lana pule, lea o loo i le fuaiupu 10. Ua iloa foi e Tavita
lana agasala, o lea sa ia faatoese ai loa i le Atua. Sa faamalosi
ma fautua pea i ai le perofeta o Natano

E matuā le agasala na fai e le tupu o Tavita, o le avā a Uria,
ae ua fai foi se auala vave, ina ia oti ai Uria i le taua, le toalua
o Patisepa. Ae o le mea sili ma lelei, na vave lava ona ia
lagona lona sese ma faatoese loa i le Atua,

Ae le’i nofonofo ai le Atua i lana foi faamasinoga tonu i le
tagata, na iu lava ina oti le pepe a Patisepa ma le faasalaga e
le mavae le pelu ai lou aiga e faavavau. Lea lava ua aafia
uma atu ai ma nisi tupulaga o le aiga, talu le faaaoga sese o
le pule

O se faamanatu mai lea o le tatou tala i lenei taeao, ia tatou
faia se faaiuga e sa’o ma lelei, e tusa o mea e tutupu i lo tatou
soifuaga nei. E i ai foi le malosi o le faaosoosoga, ae ia tatou

faamoemoe i le Atua, e aumaia le malosi sili atu, e faasino mai ai mea lelei, tatou te faia.

Ia oo mai le taimi e avea ai tatou ma tagata matutua, ua lava tāpena ma saunia tatou uma, e fesaga'i ai ma luitau ma faafitauli o le olaga i le lumanai. Ia tatou toaaga e faitau le Tusi Paia ma auai i le Autalavou Laiti, ma faalogo ma usitai i le Faifeau ma mātua, e le pine o le a telē se aogā, mo oe i le lumanai

GALUEGA FAATINO: Faasoa Manatu

I le tatou Mataupu sa faamatalaina, e telē se taua ua a'oa'o mai mo i tatou uma. O le a sau faasoa i se manatu tāua e te fia faailoa mai?

PESE: Pese ma Viiga 259 O oe le Tupu moni

A'OA'OGA:

1. Ia faaaoga tataua le avanoa ua maua
2. Faamoemoe i le Atua, ae aua le faia faaiuga sese
3. E silafia e le Atua mea uma tatou te faia

.....

ASO SA: 05 IULAI 2026

MATAUPU: O LE FAATUATUA E VAAI
MAMAO AI (*The faith to dream*)

SINI: Ia malamalama le vasega, e faia e le Atua mea ofoofogia, mo le tagata e faatuatua moni ia te Ia

TUSI FAITAU: Roma 4:13 – 25

FESOASOANI MO FAIAOGA:

O le faatuatua- o lou talitonuina lea o mea e te le o vaaia e mata faa-le-tino. O lou talitonu foi lea ma le loto atoa i le Atua i lona fesoasoani mai i a'i tatou uma. Ua e talitonu atoatoa lelei foi, e taunuu se mea lelei, o loo e mafau fauina e tupu i le lumanai.

O le tatou tusi faitau o lenei taeao, o loo toe faamanatu mai ai e Paulo, le faatuatua o le toeaina lenei o Aperamo, o loo faamauiina e le tusi o Kenese, i le taimi na valaauina ai, seia oo ina faamanuia ai le Atua. Lea lava ua faamausali ai lona faalupega- “O le tamā o le au faatuatua”.

Pe a tatou toe tepa ia Aperamo ma lona valaauina e le Atua, na tuua mea uma e masani ai, ae alu leiloa ai lava po o fea o le a alu i ai. O le 100 tausaga o Aperamo, ae fanau lona atalii o Isaako, le tama o le folafolaga. Ae toe valaau ai foi le Atua e ave lona atalii, e osi ai le taulaga, a'o i tonu lea, na faamaonia ai, le moni o le faatuatua o Aperamo i le Atua. (*Ken 15:8*)

A'o le faatuatua faamaoni lea o Aperamo i le Atua, na mamao ai lana vaai aga'i luma, e lei va-itiiti pe pu-moomoo le vaai a le toeaina. Lea e molimau ma finau malosi ai le Aposetolo o Paulo, e faamaonia ai, le telē o le eseese o le

ta'uamiotonuina i le tulafono ma le ta'uamiotonuina i le faatuatua

O le faatuatua foi lea, e tatau ona maua e tagata uma, ina ia fai ma faamalosi 'au ma ta'ita'itama i lo tatou soifuaga i aso uma. Po o a lava o tatou mana'oga ma moe-mitiga o i ai, ia tatou tatalo ma tuu atu i le Atua, o Ia lava na faia mea sili mo le tagata faatuatua

O tofiga a le Atua, e leiloa e se tagata, ae ia tatou iloa lelei, e tofiga le tagata ma lona valaauina faapitoa, ua mae'a tapena e le Atua i le lumana'i, e auauna ma galue ai. Lenei vaitau o loo aooga nisi, ua faigaluega nisi, aua lava nei galo le Atua i a tatou fuafuaga.

O manuia uma na folafola ia Aperaaamo le tamā o le au faatuatua, lea lava o loo tuu-faasolo mai mo i tataou uma, pe afai, tatou te faalatalata pea i le Atua, e ala i le faatuatua. Ia aua foi nei galo ia i tatou le fanau, e leai se mea e faigata i le Atua.

GALUEGA FAATINO: Fa'aaliga Manatu

1. Toe faitau lelei ia malamalama le f17- o le a sou manatu, o ai e faatatau i ai le faaupuga lea-“ua ou tofia oe e fai ma tamā o nuu e tele”
2. O le a sou manatu, aisea ua tatau ai ona tatou faatuatua ia Iesu Keriso le Alo o le Atua?

PESE: Aperaaamo tamā, ma lana fanau

A'OA'OGA:

1. E mafaia mea uma i le faatuatua i le Atua
2. Ia tuu atu i le Atua mea uma tatou te manana'o ai

.....

ASO SA: 12 IULAI 2026

MATAUPU: OLA I LE AGAGA (*Life in the Spirit*)

SINI: Ia malamalama le vasega, o le ola i le agaga, o le ola faatasi ma Keriso i le faatuatua i le faaolataga na maliliu ma toetu ai Iesu. Ma o i tatou lava o sulii o Iesu i le lalolagi.

TUSI FAITAU: Roma 8:1 – 17

FESOASOANI MO FAIAOGA:

Na tusia e Paulo lana tusi lenei i Roma i le taimi na feagai ai le Ekalesia ma le fete'ena'iga i le va o tagata Iutaia ma tagata nuu ese. O tagata Iutaia sa tausi ma ola ai pea i le Tulafono a Mose, ae o tagata o nuu ese sa ola i le saolotoga moni e ala i le faatuatua ia Iesu Keriso. Ua faamanino e Paulo, e le mafai e le tulafono ona laveai, ae o le Agaga Paia o Keriso e aumaia le saolotoga ma le ola fou.

I totonu lava ia o le anofale o lenei faitauga o lo o manino mai ai lava i lona faataotoga. I le fuaiupu 1-4, o lo o manino ai lava e leai se fa'asalaga o i latou ua ola ia Keriso ua leai se fa'asalaga, auā ua faasa'olotoina i latou e le “tulafono o le Agaga, o le ola.” I le fuaiupu e 5 i le 11, o loo manino ai le ata o le ola i le tino po o le ola i le Agaga. O lona uiga, o le mafaufau o loo pulea e le tino e tau i le oti; o le mafaufau o loo pulea e le Agaga e tau atu i le ola ma le filemu. I le fuaiupu e 12 i le 17, o lo'o ua avea ma fanau ma sulī a le Atua. O lona uiga, e le toe avea i tatou ma pologa i le agasala, ae ua avea i tatou ma fanau a le Atua e mafai ona tatou valaau atu “Abba, Tama.”

O lona uiga, o le ola i le Agaga e fa'aailoa mai ai le sa'olotoga moni, le fa'asinomaga fou o i tatou o fanau a le Atua, ma le fa'amoemoe i le ola e fa'avavau.

FAATINOGA O LE MATAUPU: Tusiga solo'

Ia tapena e lau susuga i le fai mataupu ni pepa poo ni api, o peni e faaoga e fanau, e tusi ai a latou solo. Ia aofia i le solo le eseese o le ola i le agaga, ma le ola i la le tino

PESE: Pese ma Viiga 187

A'OA'OGA:

1. Ia talitonu ma le faatuatua, ua faamagaloina i tatou e Keriso.

2. Ia aua ne'i faatagaina le tino ma le agasala e pule i lou olaga.
3. Iesu i la le agaga.

.....

ASO SA: 19 IULAI 2026

MATAUPU: A O TATOU VAIVAI?
(*When we are cast down*)

SINI: Ia malamalama le vasega, e tele mea o le lalolagi e faavaivaiina ai i tatou. Ae aua nei muta le faamoemoe ma tatalo i le Atua, e tupu ai pea le faamoemoe ola.

TUSI FAITAU: Salamo 42:1 – 11

FESOASOANI MO FAIAOGA

O lenei salamo na peseina e le fanauga a Kora. O loo fa'aalia ai le mafatia tele o tagata lotu, ona o le te'ena o i latou mai totonu o le malumalu i taimi o tapuaiga. Sa manatu lava i latou, o le malumalu o le nofoaga tonu lea o le Atua, o le tulaga lea o lo o fa'anoanoa ai i latou ina ua lē mafai ona auai i le tapuaiga.

I totonu o le anofale o lenei faitauga, o loo aumai ai i le fuaiupu 1-2, le Mana'o tele i le Atua: Ua fa'atusaina lea i

lona fia inu i le Atua e pei o le tia fia inu i le vai, o lagona o le tagata mafatia ua galala i le fia maua o manuia o le Atua. I le fuaiupu e 3-4, o loo ta'ua ai Loimata ma mafatiaga: Manatua ai aso fiasia i le malumalu, ae o lea ua avea ma aso e mafatia ma tagi ai. I le fuaiupu e 5-11, o loo taoto ai le tasi vaega taua, o le Fai atu i lona agaga: O lona uiga, e ui i le loto nutimomoia, ae ua ia pulea lona lava loto: *“Ia fa’amoemoe i le Atua.”* Aua na o le Atua lava e maua ai le faamoemoe ola, po o le a lava le malosi mai o le lalolagi ma ona fili, aua lava nei galo le alofa o le Atua. O le alofa e tu i le noa, na te laveai, ma faatupu le fiasia ma le manuia i ona tagata mafatia.

O lona uiga, o le olaga faatuatua, e le sologa lelei ai pea le folauga, e i ai taimi e nutimomoia ai le loto ma le agaga. Ae e ao ona tatou faailoa atu ia tiga i le Atua, ia ta'utino atu i o tatou loto le fa'amoemoe, ma ia manatua le alofa o le Atua e le suia, e tumau e oo i le faavavau.

FAATINOGA O LE MATAUPU: Faatalanoa

Tuu le avanoa i fanau e faasoa mai ai so latou foi lagona ma le iloa faa-tagata faatuatua i le Atua, poo a taimi e oo mai ai le vaivai, poo a foi ni faafitauli o le ola e afua ai ona tau tutupu lagona o le faavaivai. Ma faailoa mai ni auala e tataua ma onomea ona faatupu ai se faamoemoe, ma ia faaauau ai pea le faamoemoe ia manuia.

PESE: Pese ma Viiga 166

A’OA’OGA:

1. Fa’ailoa i le Atua ou lagona, e ala i le tatalo.
2. E alofa mai pea le Atua i aso uma.
3. Ia tupu pea le faamoemoe, auā o loo soifua le Atua, na te silafia meauma..

.....

ASO SA: 26 IULAI 2026

MATAUPU: UA TE’ENA IESU (*Jesus rejected*)

SINI: Ia malamalama le vasega, e fesiligia foi lo tatou tupuaga ma le sootaga faa-le-tagata, pe a oo ina valaauina i tatou i so o se feau ma le galuega ua manao i ai le Atua. Avea ma ala e teena ai e i latou so tatou faatauva, ae aua nei muta ai, tumau pea le faatuatua, ma faaauau galuega lelei.

TUSI FAITAU: Mataio 13: 53 – 58

FESOASOANI MO FAIAOGA:

Faimai le tala, na alu Iesu i lona nu’u o Nasareta ma aoao i le sunako. Ae na te’ena o Ia e tagata o lona lava nu’u ma lona aiga. I le aganu’u faa-Iutaia, e taua tele le tala’aga o se

tagata; ae peitai, e teena lava e tagata Iutaia, ona o Iesu o le atalii o le tufuga, e lē mafai ona avea ma perofeta po o se Mesia.

Faimai le tala, na ofo tagata i le poto o Iesu, ae na lē talitonu ona o lo latou masani tele ia te Ia. Aua latou te iloa lona sootaga faa-le-tagata, ma lona tupuaga. Ma e tupu ai foi lagona o le teena pea e afua mai i le vaaiga faa-le-tagata. I le fuaiupu e 55-56, o loo Fesiligia ai lona tupuaga: Ta'ua lona aiga – Maria ma ona uso ma tuafafine – ma faapea, “O ai ea lenei e fai mai ua i ai le mana?” O le ata lava lea faa-le-tagata, e manatu faatauva ma vaai maualalo ai i le tagata, ae le o le vaai i la le agaga. I le fuaiupu 57, o loo te'ena ai: e pei ona faamauina “E le mamalu se perofeta i lona lava nu'u.” I le fuaiupu e 58 o loo faailoa ai Lē tele galuega na Ia faia: Ae latou te lē talitonu lava.

O lona uiga, e fa'ailoa mai i lenei tala, e oo lava ia Iesu, na te'ena o Ia e i latou na ola faatasi. O lona uiga, e mafai foi ona te'ena i tatou ona o lo tatou fa'atuatua. Ae o le mea taua, e lē taofia ai le galuega a le Atua.

FAATINOGA O LE MATAUPU: Faasoa

Fai le faasoa ma nai fanau e faalatele ai le taua o lenei mataupu i le ola ai i le soifuaga lautele ma ona lava tagata sa o latou tutupu ma ola ma nonofo faatasi. A oo mai ni valaauina faapitoa mai le Atua, i le soifua ma le ola tautua, aua nei galo e fesiligia lava lona sootaga faa-le-tagata i le valaauina. Ae aua nei muta ai le faaauau o galuega lelei, tusa

pe teena ai. Aua e le mai tagata lena valaauina, ae mai le Atua.

PESE: Pese ma Viiga 175

A'OA'OGA:

1. A te'ena ona o lou fa'atuatua, ia manatua o Iesu foi na ua te'ena.
2. Aua le faamasino i le tala'aga o se tagata, auā e mafai ona fa'aaoga e le Atua soo se tagata i lana feau ma lana galuega i soo se ala..
3. Ia faatuatua pea, auā o le faatuatua e galue mai ai le Atua i lou olaga.

.....

ASO SA **02 AOKUSO 2026**

MATAUPU: **O LE LILIUESEINA O IESU**
(The transfiguration)

SINI: Ia malamalama le vasega, o le liliuina o Iesu, o le ata lea o le Atua, ua atoa i ai mea uma, i le tulafono ma perofetaga. O lona mamalu e mai le Atua ia.

TUSI FAITAU: Mataio 17:1 – 13

FESOASOANI MO FAIAOGA:

Ina ua mae'a ona faailoa atu e Iesu i ona soo, e tatau ona Ia puapuagatia ma fasiotia, ona ave ai lea e Ia o Peteru, Iakopo ma Ioane i luga o le mauga. O iina na fa'aalia mai ai lona mamalu moni, e fa'amalosia ai lo latou fa'atuatua.

Fai mai le tala, na susulu foliga o Iesu e pei o le Ia, o lona ofu e pa'epa'e e pei o le malamalama. O le faailoga o le mamalu o le Atua soifua. I le fuaiupu e 3 o loo taua ai Mose ma Elia. O fa'ailoga ia o le Tulafono ma Perofeta, ua fa'ailoa mai ai o Iesu o lo o fa'ataunu'uina ai ia mea uma. Ona faapea mai ai lea o le Atua: *"O lo'u Alo pele lena, ia outou faalogo ia te Ia."* Ona tupu ai lea o le Fefe, ma faapa'uu ifo ai soo, ae na pa'i atu Iesu ma faapea atu: "Aua le fefe." Ae o le fefe ma le matata'u lea o le au-soo ua manino ai i fetalaiga a le Atua, e ogatotonu mea uma lava ia Iesu. Ma fa'amatala manino ai lava e Iesu, o Ioane le Papatiso o le Elia na valoia, ae na te'ena.

O lona uiga, o le liliuina o foliga e fa'aalia ai: O Iesu o le Alo moni o le Atua. O Ia o le fa'ataunu'uga o le Tulafono ma Perofeta. E tatau ona tatou faalogo ia te Ia. E muamua ona oo i le puapuaga ona oo mai ai lea o lona mamalu silisiliese, e fai ma faaola mo le lalolagi uma.

FAATINOGA O LE MATAUPU: Faasoa

Tuu pea le avanoa i fanau e faasoa mai ai so latou iloa ma so latou lagona e uiga i le taua o le mataupu i lenei taeao. Aemaise lava le faaatoaga o tulafono ma perofetaga o loo

ola ai le nuu o le Atua. Ma ia aumai ain i faataitaiga lelei mo le soifua ofoina atu mo le Atua o loo ola ma tupu ae ai i totonu o lana Ekalesia.

PESE: Pese ma Viiga 11

A'OA'OGA:

1. Ia fa'atuatua ia Iesu ma le atoatoa.
2. A oo mai faigata, ia manatua le mamalu o Iesu, ma le
3. fa'amoemoe i le toetu, ona saoloto ai lea.
4. Faalogo ma usitai i le upu a Iesu ma ola i ai.
5. Aua le fefe, auā e le tuua oe e Iesu.

ASO SA: 09 AOKUSO 2026 (ASO SA O TAMĀ)

MATAUPU: UA LĒ MANOFONOFO, UA LĒ MAFAI ONA TAOFI (*Too busy to be bored, too busy to stop*)

SINI: Ia a'oa'oina le Vasega ina ia malamalama ia lē manofonofo ma lē taofia le faia o mea lelei, a ia ola tapenapena ma magafagafa mo mea e tutupu mai.

TUSI FAITAU: Failauga 3:1 – 8

FESOASOANI MO FAIA'OGA:

Sa a'oa'oina Solomona i le gasologa o mea na tutupu i lona olaga. A o talavou, sa ia tusia ai le tusi i Fa'ata'oto, se'ia o'ona ua amata ona matua ma ia tusia ai le Pese a Solomona, ae ina ua toea'ina na ia tusia ai loa le tusi lenei i Failauga. O le uiga lea o ana upu o le taimi ma le mea e tupu ai, ma e le tatau ai ona nofoa'i le tagata, ae ia tapena ma sauniuni. Ua fa'apea mai le fuaiupu 1 o le mataupu lenei e 3 a Failauga: O le mea ma lona tausaga i mea uma, ma ona lava po i mea uma lava i lalo o le lagi.

E fa'atauaina mai le Tusi Faitau le (f.6). O ona po e saili ai, ma ona po e tu'u ai ua le iloa; o ona po e tausi ai, ma ona po e lafoa'i ai; (f.7). O ona po e saei ai, ma ona po e su'i ai; o ona po e fa'alologo ai, ma ona po e tautala ai.

O le fa'apea mai o le ulutala: Ua le manofonofo, ua le mafai ona taofi, ua fa'ailoa mai ai le tatau i le tagata ona galue i taimi uma, aua e le fa'atalia i le tagata le taimi a le Atua e tutupu ai mea. E le tatau ai ona manatu māmā le tagata i le gasologa o mea tutupu, talu ai ua uma ona fa'ata'oto e le Atua taimi fuafuaina mo mea uma. O le ola mai o tagata uma i lenei olaga, e tofu uma tagata ma le vala'auina. Ae o vala'auina ua fa'avasegaina ona taimi e galulue ma fa'atino ai e tagata uma, e tali atu ai i le foa'i ola ma le fa'aali mai a le Atua i ona taimi. O so'o se tagata galue lava, ia le faifaiaga, pe pi'opā, pe faifai amio i lona tiute ma ana matafaioi fa'atonuina, aua e afaina ai le taimi ma lē 'a'u le fa'atinoga o tiute ma faiva. O lona uiga, o le taimi, o se meaalofo taua e ao ona fa'aaogaina tatau, ma ia lē fa'atalale

i lona fa'aaogaina lelei. Ia le manofonofo, ne'i le aoga pe fa'amaimauina ma fa'aaluvaleina le taimi, aua o ona po ma le mea e tupu ai. Ua mautinoa e Solomona na ia fa'aaoga sese le taimi o lona aveia ma tupu e fai ai ana amio fa'avalea. Sa nofo i le nofoalii ma ta'ita'i le nu'u o le Atua, ae ifo i tupua ma osi taulaga i atua fa'apaupau o nu'u o ana avā. Ua manofonofo le mataala, ae toe iloa ane ua malepe lona va'a folau i luga o a'au o faigata. Sa tatau ona sogasoga e saili le finagalo o le Atua, ae ua ia lafoa'i le mafutaga ma le Atua i vaitau o lona vala'auina. Faimai o ona po e saili ai, ma ona po e tu'u ai ua le iloa; o ona po e tausi ai, ma ona po e lafoa'i ai; ua ta'u mai ai ua toe malamalama ane ae ua le aoga. Ua toe saili atu i le Atua, ae ua lafoa'iina o ia e le Atua.

Faimai foi, o ona po e saei ai, ma ona po e su'i ai. O lona loto tagitu'i i le saeia o lona malo e pei ona vavaloina e le perofeta o Akia le Sailo, o le a tauia ana agasala i le taimi e tula'i mai ai Reopoamo lona atalii, ma sasae'eseina ai e le Atua ituaiga e 10, ae ua ia mautinoa ai foi e toe su'i e le Atua lena saeia, aua ua fa'ailoa mai e le perofeta o le a fa'atumaui lava le ituaiga e tasi o le malo ona o le alofa o le Atua ia Tavita lona tamā.

Vasega matutua, o le a'oa'oga taua o lenei mataupu, aua le fa'atamala ma aua le ola fa'asamasamanoa. Ia fa'aaoga tatau taimi uma, auā e te nofonofo loa, ona osofa'i mai lea o fa'aosoosoga ma fa'afitauli e fa'aseseina ai. Aua le taofia le mataala ma le sauniuni, nei o'o mai taimi a le Atua, e te toe taumafai atu ae ua leai se aoga. Ia manuia tele outou.

Uiga o Upu:

- i) taufaitagitui – fetagisi ma tagiaue i le fa’anoanoa.
- ii) sasa’a – sisiva ma fiafia.
- iii) saei – o le sasaeina o ofu o ositaulaga ona o le fa’anoanoa.

GALUEGA FA’ATINO:

Ta’u mai upu fa’afeagai o lo’o ta’ua i le Tusi Faitau.

- 1. totoina – lia’iina.
- 2. saili – tu’u ua leiloa
- 3. fasioti – fofo ai.
- 4. saei – su’i
- 5. fa’alologo – tautala.

PESE: Pese ma Viiga 177.

A’OA’OGA:

- 1. Ia fa’aaoga tatau le taimi.
- 2. Aua le fa’atalale ma nofoa’i.
- 3. Ia fa’alogo ma usita’i.

.....

ASO SA: 16 AOKUSO 2026

MATAUPU: TATAU ONA FA’AALOALOGIA LE GALUE MALOSI (*Hard work deserves respect*)

SINI Ia a’oa’oina le Vasega ina ia malamalama e taua le galue malosi ma fa’atino galuega e fa’aaloalogia ai e tagata.

TUSI FAITAU: 1 Timoteo 4: 7b – 16

FESOASOANI MO FAIA’OGA:

Pe a manumalo se tasi e avea ma faipule o se itumalo, e talia ma fa’aaloalogia e le itumalo ina ua filifilia. Ae pe afai e le galue malosi ma fa’atamala le faipule i ona tiute, ona amata loa lea ona le amana’ia ae ua manana’o tagata e le tatau ona toe tula’i mai. O lona uiga, e maua le fa’aaloalogia e le faioule pe a galue malosi ma fai ma le fa’amaoni lona tiute mo le lelei o lona itumalo.

I le tusi atu o Paulo le aposetolo ia Timoteo lona atalii fa’aleagaga, e le faigofie le fetaia’iga ma a’oa’oga sese o lo’o ta’amilo i totonu o le ‘a’ai o Efeso, aemaise o ona talatu’u e mitamitavale ai. E le fa’aliliueseina gofie la loto o tagata Efeso mai mea fa’aletino, aua o lo latou mausa lea o mea fa’alelalolagi ma o latou viiviiga fa’aletagata. O le tulaga i le a’oa’o atu ma lauga atu le finagalo o le Atua, e le

itiiti lona taua ma le aoga tele, ae peita'i, e sili ona manatu le aposetolo o Paulo i le taua tele o le va'aia e tagata o le galue malosi e molimauina ai e tagata le tino o upu ma a'oa'oga.

I le soifua tala'i o Paulo lava ia, e ui ina malosi lana a'oa'o atu i mataupu fa'aleagaga, peita'i sa tumau i loto o tagata tala logologoa o lona sauia i le Ekalesia. Peita'i, ina ua molimauina e tagata le malosi o lona fa'atuatua i le fetaia'i ma sauaga, lona fetogia i ma'a, sasaina i la'au ma lafoina i le falepuipui ona o le mau ia Iesu Keriso, o iina na tosina ai o latou loto ma fa'aaloaloga loa lana tala'iga.

O lona uiga, ua fa'aaloaloga le aposetolo ona o lona galue malosi. O le mea moni sa galue malosi Paulo mo Iutaia a o avea ma Rapi ae ina ua liliu, sa fa'aaogaina lona galue malosi e tautua ai le Tala Lelei ia Iesu le Alii. O naunauta'iga foi ia o Paulo ma Timoteo lona atalii fa'aleagaga, ia galue malosi ma aua le fa'avaivai. Ae ia galue ma finafinau ma le fa'amoemoe i le Atua Soifua, o ia o le Fa'aola o tagata uma, aemaise lava o e fa'atuatua. Ia fa'amalosi ma ia alualu i le fa'atuatua. O le tasi apoapoa'iga mo Timoteo, ia le inoino se tasi i lona taule'ale'a, a iai e ua fa'atuatua, i le upu, ma le amio, ma le loto ma le fa'atuatua ma le amio mama. Ia faitau le Tusi Pa'ia ma a'oa'o atu, ia alualu i luma, ma tumau ai e ola ai ia ma fa'aolaina ai o e fa'alologoa ia te ia. Vasega Matutua, e le na ona a'oa'o atu, a ia galue malosi ma fa'atino a'oa'oga ua folafola atu, ona maua lea o manuia o le Tala Lelei.

Uiga o Upu ma Fuaitau:

- i) fa'amasani i le amio Atua - to'aga e fai amio lelei.
- ii) mea ua folafolaina mai: - o mea ua ta'utino mai o le a taunu'u
- iii) atali: - o mea e fa'atalitali i ai o le a tutupu i le i'uga.

GALUEGA FA'ATINO: Fesili ma Tali.

1. O fea sa galue ai Timoteo?

Tali: O le Ekalesia i Efeso.

2. O ai na tusi atu ia Timoteo?

Tali: O Paulo le aposetolo o Nu'u Ese.

3. O le a le uiga o le amio Atua?

Tali: O le amio fa'atuatua ma alofa i le Atua.

4. Aisea e tatau ai ona alualu i luma?

Tali: O le fa'aailoga o le tumau ma talia le Tala Lelei.

PESE: Pese ma Viiga. 257

A'OA'OGA:

1. Ia galulue malosi mo le Alii.
2. Ia olaina a'oa'oga a le Tala Lelei.

3. Aua le tau o upu ma tala ae leai ni fua.

.....

ASO SA: 23 AOKUSO 2026

MATAUPU: O SE LOTO UA SAILI I LE ATAMAI.
(A heart seeking wisdom)

SINI: Ia malamalama le vasega o le loto ua saili i le atamai mai le Atua, e faamaoni ma fiafia e a'oa'o i poloaiga a le Atua.

TUSI FAITAU: Salamo 119: 33 – 40

FESOASOANI MO FAIA'OGA:

O lenei vaiaso ua fa'atauaina ai le manatu ta'ita'i e fa'apea o le Atamai o le Atua. O le atamai po'o le poto le masu'esu'eina lea o le Atua na toina mai fa'apitoa mo i latou na saili atu ai mo lea mea. Ua ta'ua i le Feagaiga Tuai ma le Feagaiga Fou le anoanoa'i o a'oa'oga tau le atamai o se meaalofoa a le Atua na foa'i i perofeta ma tagata va'ai, fa'apea foi tupu ma alii o le nu'u o Isara'elu, aemaise ai o le au aposetolo ma so'o o le Alii Fa'aola. I le lalolagi malamalama, sa fa'aaogaina foi e o tatou auga tama o gagana ma upu fa'atusa e fa'amatalaina ai le atamai, ae tele ina fa'alilolilo ma taumatemate uiga o ia mea. Ua tatou iloa le tele o le eseese o le iloa fa'aletagata, ma le poto po'o le

atamai fa'ale-Atua. Ae taualuga ma manino mea uma, ina ua tatou va'aia le loloto ma le maualuga o le atamai ma le mana o le Atua, e pei ona fa'aalia ia Iesu Keriso lo tatou Alii, ma ua vala'auina ai tatou e mulimuli atu ma ola ai i le poto ma le atamai silisili ese o Keriso.

O le lautusi lenei o le Salamo e 119 o se tasi lea o tusitusiga e uiga i le poto po'o le atamai. Ma ua a'oa'o manino mai le tusi faitau lenei o le ala i le atamai, o le fa'amaoni lea i le poloa'iga ma tulafono ua fetalai mai ai le Atua. Ua aumaia i le fuaiupu e 33 le mea lilo e maua ai le atamai po'o le poto, e pei ona ta'ua "Ia e a'oa'o mai a'u i le ala o au tulafono." O upu taua o le a'oa'o, ta'ita'iina, fa'aui, liliueseina, fa'atumaui, fa'aololaina. E le o le mulimuli atu i ni tulafono ua tusitusia, ae o le loto e fa'atuatua i le Atua o le ala tasi lea e vavalalata ai le mafutaga ma le Alii, ma iloa atili ai lona finagalo. O lo'o fa'aailoa mai e lenei lautusi le naunauta'iga o le fai-Salamo po'o le tagata ina ia galue mai le Atua ma fa'aailoa mai lona mamalu i lona olaga. I le tali mai a le Alii, ua a'oa'o ma aumai lona poto ma lona atamai mo le tagata, ua fa'aailoa mai iinei le tauto ma le folafola atu e le fai-Salamo o lona sauni e tausi ma mulimuli ma le fiafia i poloa'iga a le Alii. O le a le pine ona a'oa'o mai e le fai-Salamo lea atamai i le aufaitau uma e fiafia i lenei tusiga, ma fa'atuputeleina ai le ola matata'u i tagata uma.

Vasega matutua, a o tou sauni atu i a'oa'oga ma fe'au ua vala'auina ai outou, ia manatua ia folau ma le loto tatala, e talia ai ma tumau i le atamai o le Atua e manuia ai lou lumana'i.

Uiga o Upu:

- i) Ta'ita'iina — ina ua fa'asinoia tatou i se mea e tatau ona faia.
- ii) Fa'aua'i — pe a fai ua tatou loto atu ma gauai atu.
- iii) Fa'atumauiina — ia le toe suia pe toe alu ese mai se mea ua talitonu i ai.
- iv) Fa'aolaolaina -- ina ua tapu'e pea ma fa'atuputeleina.

GALUEGA FA'ATINO:

Ta'u mai upu e fa'afeagai ma upu nei:

- 1. Fa'aua'i — fa'atu'iese
- 2. Fa'atumauiina — fa'aumatiaina, talepeina.
- 3. Fa'aolaolaina -- fa'aleaogaina, soloiaina.

PESE: Pese ma Viiga 14.

A'OA'OGA:

- 1. O le atamai e manuia ai.
- 2. Ia saili i le Atua le potu.
- 3. O le malamalama e ola ai.

.....

ASO SA: 30 AOKUSO 2026

MATAUPU: VIVII I LE ALII (*Praise to the Lord*)

SINI: Ia malamalama le vasega, e ao i tagata uma ona viia le Alii, i lana puipuiga mana ma lana leoleoga agalelei mo i tatou i taimi tuma.

TUSI FAITAU: Isaia 25: 1 – 12

FESOASOANI MO FAIA'OGA:

O se toe tepa i tua i se va'aiga ofoofogia ina ua aofa'i mai malo o le Taupulega i Samoa nei, sa auai mai ta'ita'i o malo e to'atele ma sa fa'atumulua Samoa i se taligamalo muamua mo le Fono a Ulu o Malo o le Taupulega ua faia mai i le Pasefika. Sa fa'apea foi ona auai mai le Fa'auluulu o le Taupulega o le Tupu lea o Salesa III ma lana Masiofo o Kuini Kamila. E silia ma le 4,000 tagata na asiasi mai ai i Samoa mo lea fonotaga taua tele. O se va'aiga matagofie le teuteuina o 'a'ai uma o Samoa i atumotu eseese o Upolu, Savaii, Manono ma Apolima. Sa va'aia le teuteuina o auala ma tafaala e fa'afeiloai ai aumalaga mai atunu'u eseese sa auai mai. Sa matauina le felanulanua'i o teuteuga a nu'u ta'itasi aua sa talimalo nu'u i atunu'u na auai, ma sa fa'aagiagia ai fu'a ma tagavai a malo e 56 sa auai mai. Ina ua mae'a lea fa'atasiga tele, sa saunia loa e le Malo o Samoa se sauniga aloa'ia e fa'afetaia ai le fa'aiuina manuia o le

taligamalo a le atunu'u aoao. Sa momoli ai le viiga ma le fa'afetai i le Atua ona o le manuia o le Fonotaga sa feagai ai.

I le faitauga fa'apitoa mo lenei vaiaso, ua tatou va'aia ai le fa'amanuiaga a le Atua mo lona nu'u o Isarta'elu. I le mataupu la o lenei Aso Sa, o le viiga lea ma le fa'afetai i le Atua ona o le puipuiga mana ma le leoleoga agalelei a le Atua mo lona nu'u o Isara'elu mai ona fili ma e na agaleaga mai. O lea alaga fa'afetai na taualuga i le Tausama'aga po'o le aiga fiasia a le 'au fa'atuatua i le Atua ina ua fa'aalia lana puipuiga malu mo ona tagata fa'atuatua. O le fe'au tau molimoli lea a le perofeta o Isaia, ia le aunoa le fa'atalitali ma le fa'amoemoe o Isara'elu i le Alii le Atua, aua na te le tu'ulafoa'iina i latou mai faigata ma puapuaga. O le uiga o le igoa o Isaia, "o le Atua o le Fa'aolataga" sa avea ma fa'atumutumuga mo le viiga o le Atua. Aua o le agalelei fa'aola o le Atua, o le fa'amoemoe tutasi lea o le nu'u o Isara'elu e manumalo ai ma toe fa'afouina ai lona avea ma nu'u filifilia o le Atua. E ao ai ona lalagi le viiga ma le fa'afetai e pei ona fai mai le fuaiupu e 9: O lea aso e fa'apea ai, Fa'afetai o lo tatou Atua lenei, sa tatou fa'atalitali ia te ia, ua ia fa'aolaina foi i tatou, o le Alii lava lenei sa tatou fa'atalitali ia te ia, tatou te fiasia ma olioli i lana fa'aolataga. Vasega matutua, o le fe'au foi lena o la tatou mataupu i lenei taeao. E ao ona sii le viiga ma le fa'afetai i le Atua aua sa tatou pei o le nu'u o Isara'elu sa fa'atalitali i ana fa'amanuiaga mo le ola ma le malosi e fa'ataunu'u ai o tatou tiute ma faiva eseese. O galuega ma a'oa'oga, aemaise foi o faiva o matua ma ta'ita'i o le atunu'u aemaise o Auauna a le

Atua. Sa fa'apei foi tatou o Isara'elu le nu'u o le Atua, le tele foi o fili ma mailei a le ti'apolo sa lu'itauina ai tatou, ae sa le tu'ulafoa'iina lava tatou e le Atua. O le mea lea e tatau ai le viiga ma le fa'afetai mo le Alii i lona alofa tausisi ma lona agalelei le fa'atua'oaia mo tatou.

Uiga o Upu ma Fuaitau:

- i) Fa'ane'ene'e - viia ma fa'afetaia
- ii) Faupu'ega ma'a - o ni ma'a ua fa'aputupu ia maualuga
- iii) Fa'aputuga nasu - o ni mea leaga ua fa'aputupu
- iv) Fa'agatasia - fa'amafolafola.

GALUEGA FA'ATINO: Tali mai fesili.

1. O a ni taimi o lo tatou olaga tatou te viia ai le Atua?
2. Aisea e tatau ai ona tatou viia le Atua pe a manuia mea tatou te faia?
3. O le a le upu taualaga a Isaia mo Isara'elu e tupu ai lo latou fa'amoemoe?

Tali: O le fa'atalitali ma fa'atuatua i le Alii.

PESE: Pese ma Viiga 92.

A'OA'OGA:

1. Ia le aunoa le viiga i le Atua
2. O le Atua o lo tatou fa'amoemoe
3. Ia fa'atalitali i le Atua e ola ai.

.....

ASO SA: 6 SETEMA 2026

MATAUPU: TO'AMALIE MA LE FILEMU.
(Quietness and Peace)

SINI: Ia malamalama le vasega, o lo tatou faalogo ma usitai i le Atua, ma fai le amiotonu, ona tatou maua lea o le to'amalie ma le filemu.

TUSI FAITAU: Isaia 32: 9 – 20

FESOASOANI MO FAIAOGA:

"O le mea e tupu i le amiotonu o le manuia lea; e tupu mai i le amiotonu le filemu ma le saogalemu e faavavau"

O loo o tatou i ai i le lalolagi ma mea o tutupu ai mai lea taimi i lea taimi, i lea tausaga ma lea tausaga. O le uiga o le manatu, e i ai mea lelei ma le mananaia, o fa'aaliga o manuia ma mea matagofie e taua mo lo tatou ola. E i ai faatasi foi

ma mea leaga po o mea e le lelei, e mautinoa e aafia ai lo tatou ola, ma oo atu ai i tatou i puapuaga ma faanoanoaga, tatou te le manaomia. Peitai, o mea lelei ma mea leaga e tutupu mai, e mafua lava ona o le tagata ma lona olaina o le lalolagi a le Atua, e tusa o ona manaoga ma le saolotoga. Ua le gata o le soifuaga i la le tino, a ua faapea foi i le soifua faaleagaga.

O le afuaga lea o le valoaga a le perofeta o Isaia mo le nuu o Isaraelu, aua o lea ua iloa e Isaia le nuu e ola faafilemu ma ola faatalanoa. O lona uiga o loo foliga Isaraelu i se ola o se laau e tu ae oia, e ola fua ae ua leai se faamoemoe ola. Aisea? Ua ola agasala ma ola noa e tusa o mea e nanau ma faamalieina ai o latou loto. O lona uiga ua matua mamao o latou loto ma le Atua; ua le faalogo ma le usitai i lo latou Atua, e ala mai ai le manuia ma le filemu. O tagata ua le loto atu i le Atua ma lona alofa tele; ua le manatu ifo o lo latou Atua lava le faavae ma le afuaga o lo latou ola ma le manuia. O lea e pei ona faatusaina ai e le perofeta le manuia o le nuu i le fuata vine e i'uvala ma lē fua mai. O le taimi ma le itu aso e oo mai ai lo latou lē mautonu i le faamasinoga a le Atua. E feagai ma puapuaga ma faigata e pei ona faatusaina i le to ese o ofu ma faasau ma lavalava i ie talatala. O lona uiga, o le a lē toe i ai se manuia e toe maua e i latou; faatasi ai ma ona tagata e puleesea ma faapologaina. O o latou faasinomaga e tuufua ma Ierusalema le aai ua latou lafoaiina. O le faailoga o le mamalu o le Atua ua aveesea mai ia i latou.

Peitai, fai mai upu a le perofeta i le fuaiupu 17, "O le mea e tupu i le amiotonu o le manuia lea; e tupu mai i le amiotonu

le filemu ma le saogalemu e faavavau". Ua faailoa mai e le perofeta, e i ai le faamoemoe ma le finagalo paia o le Atua mo lona nuu. E finagalo le Atua ina ia salamo ma liliueseina mai le agasala; ia fulitua i le leaga ae foi atu ia te Ia i le loto salamo ma le faamaoni. O lona uiga, o le valoaga i le Mesia ua folafola mai; o le a afio mai na te faatumauina ma faamausaliina le faamoemoe o lona Alofa Tunoa tele, o le manuia ma le faaolataga mo Isaraelu ma le lalolagi atoa, o le finagalo paia lea o le Atua, e ao lava ona faalogo ma usitai i ai tagata uma.

O le feau lea o le Talalelei mo i tatou uma o tagata faatuatua o le Atua. E le gata mo Isaraelu lava ia i lo latou va feagai ai ma le Atua, ae o le faamalosi tāua lea mo oe le tama ma le teine talavou. O le feau foi lea mo le lalolagi atoa, i le tele o faafitauli ma faalavelave ua tutupu mai i aiga, nuu, malo ma atunuu. O le upu moni, e finagalo le Atua ina ia tatou faalogo ma usitai, ma maua le mafaufau lelei, ina ia tatou galulue ma le faamaoni, ia faia mea uma ma le lelei ma atoatoa e gata mai ai lo tatou malosi, ma le faamoemoe i le faasinoga mana o le Atua i o tatou loto, tatou te faia ai mea uma i Lana Amiotonu, ona mautinoa lea o manuia e tele tatou te oo i ai. A o lona Amiotonu, e tatou te savavali ai pea ma le faatuatua i luma o lo tatou Atua, e ala mai ai le Filemu ma le Saogalemu e faavavau. O lea lava na taunuu valoaga i le Mesia e afio mai; le Alo pele e toatasi o le Atua le Tama, le Alo ma le Agaga Paia, na Ia saili ma faaola i tatou o tagata agasala, o Lana amiotonu ma lona faalogo ma usitai i lona Tama, lea na Ia manumalo ai mai le oti ma le agasala, ina ia

maua e i tatou Lona Filemu ma le Saogalemu e Faavavau. Ia i le Atua pea le viiga ma le mamalu.....Amene.

Uiga o Upu:

- i) faatalanoa - faasamasamanoa ma le manafanafa
- ii) gatete - lē mautonu
- iii) vao lafulafua - laufanua vaoa
- iv) faamasinoga - sutesueina
- v) uato'a - timu malosi

GALUEGA FAATINO: (Fa'aaliga manatu)

Faaali mai sou manatu i le taliina o le fesili lenei. Ia anoa manatu ma pine faamau: O fea tonu ae po o a auala e te maua ai le to'amalie ma le filemu?

PESE: Pese ma Viiga 180 E lelei mea uma.

A'OA'OGA:

1. Ia faalogo ma usitai pea i le Atua i taimi uma.
2. Tula'i i luga e fai mea sili mo le Atua ae le o le ola faatalanoa.
3. Ia tutumau i le Atua ona tatou maua lea o le filemu ma le saogalemu.

.....

ASO SA: 13 SETEMA 2026

MATAUPU: MUAMUA I E TUTUSA
(First among Equals)

SINI: Ia malamalama le vasega, ia manatua le Atua e faamuamua i so o se mea tatou te i ai i lenei ola.

TUSI FAITAU: Teuteronome 17: 14 – 20 .

FESOASOANI MO FAIAOGA:

O le tusi o Teuteronome na tusia e Mose o le auauna filifilia a le Atua na taitaiina mai le nuu o Isaraelu mai Aikupito. A o le uiga lea o le igoa o le tusi o Teuteronome; usitai i le Atua. (obeying God). O le tatou mataupu la o lenei Aso Sa pei ona i ai le faitauga i le vaega o le tusi lenei o Teuteronome, o lo o tautala ai Mose i le taua o se avea ma taitai i se nuu. O lona uiga o se taitai e na te faatāua faiga-faavae lelei tainane o tu ma aga mamalu o lo o soifua ma ola ai i aso uma.

Auā o le tofiga taitai o le valaauina faapitoa mai le Atua i se tagata, e ao ona aloaia, amanaia ma faamuamua i loto ma finagalo, e faatau ai auaunaga faavae lelei ma mautu, auā le manuia lautele o tagata, ae le o le faamuamua ona saili ai o lona manuia ma le tamaoaiga. O le fuaiupu 14 ua faamatua i ai le mataupu, o lo o faatauaina ai ma faamanatu mai ia i tatou le faamalosia ma faamamafa i so o se taitai ona

ta'ialaina ona tiute faa-taitai i le poto, o le amiotonu ma le ola mafuta vavalalata ma le Atua.

Peitai o loo aumai i le faitauga lenei le ulua'i faaalua ai o le ituaiga pule ma le taitaiga e pule malosi i le tulaga le talafeagai ma le faavae aemaise ai e le o faavaeina ma lima taitaiina i ala ma tulafono a le Atua. O lea la le faamoemoe maua ma le faasinoga tonu o le tofiga faa-taitai, o le saili ma le mautinoa i le finagalo paia o le Atua, e faailoa mai le tulaga ma le tofiga faa-taitai, ina ia o gatusa ma ala lelei ma faiga-faavae faale-Atua, e taitaiina ai tagata uma. O le fuaiupu foi lenei 14 o lo o faamanatu mai ai le tulaga o le pule tonu ma le lelei, e mai le Atua lea. O le pule e lē mai tagata ma o latou manaoga faale-tagata, po o se tulaga lauiloa ma ta'uta'ua o le tagata, pei lava ona mananao ai o Isaraelu i so latou tupu.

O le sini la ma le tāua o la tatou mataupu o le avea ma taitai po o le avea ma tupu i le nuu ma le malo, o le usiusitai ma faalogo i le Atua; o lona uiga ia ola mata'u i le Atua i taimi uma ma aso uma. Ia mafuta ma le Atua e lē aunoa, e ala i le usitaia o tulafono ma ola ai. Afai o lena le faamoemoe, o le a lē pine ona tino mai lana taitaiga ma lana pule lelei ma le tonu e fai ai faaiuga tatau ma le tāua, ina ia maua e tagata uma le to'amalie, le filemu ma le manuia. O taitaiga sili na faale-Atua e amiotonu, alofa ma faamaoni, e faaeaina ai le tagata, ae sili ai ona maua le viiga o le Atua. O lea la pei ona fai mai le tatou mataupu; Muamua i e tutusa (First among equals), O le faamoemoe lea o le feau o le Talalelei mo i tatou le fanau, po o a tofiga ma valaauina faa-ta'ita'i i le lalolagi lenei, i aiga, nuu, e oo lava i le malo ma le atunuu,

ia manatua, o le Atua o le faamuamuaga o mea uma lava. O Ia o le Atua e filifili ma tofofi o tatou tagata e tusa ma lona finagalo, i so o se ala o feau ma galuega tatou te galulue ma auua ai. O Ia foi tatou te saili i ai ma le faamaoni o tatou loto, e faasino ma faatonu mai lo tatou vaivai ina ia faia ai mea uma i le alofa ma le faamaoni. O lana amiotonu e faataunuaina ai le faiva faa-tupu, ma le tofiga faa-ta'ita'i. O le tofiga ma le valaauina e pule mai le Atua ma taitaiina i tatou e ala i lona Agaga paia; e mua'au ma muli'au i ala uma tatou te agai i ai, ona tatou pale lea i ona manuia ma le ola fiafia. O le tatou savaliga foi faale-faatuatua o faia i le ola nei, e faamuamua lava le Atua i o tatou loto ma manatu, e ala i le faalogo ma usitai i lona fetalai mai, tatou te ola ma manuia ai. Ia manuia le Aso Sa paia o lo tatou Alii, Amene.

Uiga o Upu:

- i) mo'u - mo a'u
- ii) vagavagai - siosiomia
- iii) tulu'i - faaopoopo

GALUEGA FAATINO: (Faaliliuga)

Faaliliu mai le fuaitau lenei i le gagana faaperetania sa'o.
 "Pe a e oo atu foi i le nuu e foaiina mai e le Alii lou Atua ia te oe, ma e fai mou, ma e mau ai, ma e faapea ane, Ou te faia se tupu mo'u, e pei o nuu uma lava e vagavagai mai ia te a'u."

Faaliliuga: When you have come into the land that the Lord your God is giving you, and have taken possession of it and settled in it, and you say, 'I will set a king over me, like all the nations that are around me...'

PESE: Pese ma Viiga 82. Avatu i le Tupu.

A'OA'OGA:

1. Ia faamuamua le Atua i lou olaga.
2. E pule mai le Atua i o tatou tofiga faa-taitai.
3. O pule uma lava e mai luga.

.....

ASO SA: 20 SETEMA 2026

MATAUPU: NOFO POLOGA - O LE TAU O LE POLOGA (*Slavery - The cost of slavery*)

SINI: Ia malamalama le vasega, o le tumau i le faatuatua i le Atua, e aveesea ai tiga o le nofo pologa, i le faaeaina ma le ola saoloto.

TUSI FAITAU: Teuteronome 20: 1 – 14

FESOASOANI MO FAIAOGA:

"A e alu atu e tau ai se taua ma lou fili; a e iloa atu solofanua, ma kariota, ma le nuu e sili ona toatele ia te oe, 'aia ne'i e fefe ia te i latou; aia o ia te oe le Alii lou Atua, o le na aveina a'e oe ai le nuu o Aikupito."

O le tatou mataupu o lenei Aso Sa ua faatatauina i le nofo pologa o le tagata ona ua pulea ma le malosi e isi tagata; a o le faamoemoe ma faalagolago i le Atua, e faacaina ai, ma maua ai le saolotoga moni. O le tapenaga lea a le Atua na ia faia mo lona nuu i le agai atu i le nuu folafolaina; talu ona o ese mai Aikupito, o le nuu sa nofo pologa ai. O le ata lea ma le faatumutumuga o le finagalo alofa o le Atua i lona nuu o Isaraelu pei ona ta'ua i le mataupu 20 o le tusi o Teuteronome. Ua tautino e le Atua lona iai faatasi pea ma ona tagata pe a fetaia'i ma nuu e sii taua mai ia i latou. I le fuaiupu ua 'au'au i ai le tatou mataupu, ua faapea mai; "A e alu atu e tau ai se taua ma lou fili; a e iloa atu solofanua, ma kariota, ma le nuu e sili ona toatele ia te oe, 'aia ne'i e fefe ia te i latou; aia o ia te oe le Alii lou Atua, o le na aveina a'e oe ai le nuu o Aikupito." O lea ua apoapoa'i le Atua a fetaia'i ma le fili, 'aia ne'i fefe i se mea e tasi pei ona ta'ua. Aisea? Fetalai le Atua, ".....auā o ia te oe le Alii lou Atua, o lē na aveina a'e oe ai le nuu o Aikupito" Ua faamanatu mai ai e le Atua le latou feagaiga na osi. O upu o le feagaiga - "O a'u o le Alii, ou te aumaia outou i lalo o avega mamafa a Aikupito; ou te lavea'i mai foi ia te outou ai a latou galuega, ou te faaolaina mai foi outou i le lima faaloaloa ma sala tetele. Ou te faia outou mo'u nuu, e fai foi a'u mo outou Atua...." O upu

o le faamoemoe ma le manuia e oo i ai Isaraelu pe afai e tumau lo latou faatuatua ia te Ia. Ua tautino lava ma le faamaoni e le Atua ana folafolaga e taunuu auā e tau le Atua ma i latou i e faasagatau mai. O le poto ma le malosi faafitafita o le fili e mautinoa e toilalo ma faiaina i le malosi ma le mana o le Atua, faatasi ai ma le malosi o le faatuatua o Isaraelu, e tau ma manumalo ai. E na o le pau lea o le faamalosi ma le faalototele a le Atua na ia tuualalo ai i lona nuu; 'Aia ne'i e fefe ia te i latou...'. O lea lava e toe ta'ua le faalototele lea i fuaiupu 3 ma le 4; 'Aia ne'i faavaivai o outou loto, 'aia tou te fefefe, 'aia tou te matata'u, 'aia foi tou te gatete ia te i latou; auā o le Alii lo outou Atua tou te o ma ia, na te tau ai la outou taua ma o outou fili, na te faaolaina outou." O le ata o le Atua na te aumai le onosa'i ma le lototele, o le Atua e faamalosi pe a faavaivai le tagata, le Atua na te aumai le mautinoa i le loto e tau ai ma aveese ai le mafaufau o lo o pologa i le lē mautonu ma le fefe. O le faalototele a le Atua i le tagata o lo o nofo pologa pea i manatu ma uiga faale-lalolagi, o mea o lo o fai ma faamata'u i le ola; lea ua Ia lu'itauina ai ona tagata ina ia tuu ese mea vāivai ia faale-tagata, ae faaulufale i loto ma finagalo le auupega sili o le faatuatua ma faatatauina le faamoemoe o lo latou Atua e manumalo ai, e faaolaina ai ma faasaolotoina i latou mai le ola pologa. E talitonu le manatu o lo o faapena le lalolagi o lo o o tatou i ai nei. E lē masino le toatele o tagata o lo o nofo pologa pea i faiga lē alofa a isi tagata. A e ā pulega a nisi o nuu ma malo o le lalolagi? Ioe! e mata'utia ma ogaoga le faapologaina o le toatele o nai tagata i tu ma aga faa-tiapolu ua saisaitia ai lo latou ola. O nai tina ma

tamaitai ma fanau iti ua oo i ai faiga sauā ma le lē alofa. Ua le gata ina sauaina ma tuulafoaiina, a ua faaoo i ai le oti, o le ata o le lalolagi ua faapogisaina e le agasala, tatou te lē manaomia. A o le feau lea o le Talalelei mo i tatou; ia avea i tatou ma toa o le Talalelei e tula'i mai ma le faatuatua moni i le Atua, tatou te tauina ai taua faatasi ma le auai mai o lo tatou Atua, ina ia faatoilalo uma fili ia o lo o faasagatau mai. 'Aua tatou te fefefe, 'aua tatou te matata'u e tau ma le faamaoni e fai le amiotonu a le Atua, ina ia laveai ma faaolani nisi o nofo pologa pea ona o faiga a le alii o le lalolagi. Ioe! tatou te maua le tau i le nofo pologa e ala i lo tatou tumau i le faatuatua i lo tatou Atua e tau ma i tatou, e mautinoa lo tatou faaeaina, lo tatou manumalo lena ma faasaolotoina ai i tatou i lona Alofa tunoa. O le faamoemoe ola foi lea na faia e Iesu e tusa o lana galuega faaola, na Ia lē fefe pe mata'u ai i faiga faa-lē-alofa a le lalolagi agasala; lea na Ia faalogo ma usitai lava i le faamalosi mai a lona Tama, ua aveesea ai le pologa o le lalolagi agasala e ala i le faatuatua, ma ua faaolaina ai i tatou uma i lona alofa tunoa tele ma maua ai lo ta saolotoga i lona malo faavavau. Ia manuia le Aso Sa, Amene.

Uiga o Upu.

- | | | | |
|------|-------------|---|--------------------------|
| i) | fili | - | o ē tetee i le Atua |
| ii) | feagaiga | - | uputuu-mavaega |
| iii) | ola le taua | - | leai se taua ae faalelei |
| iv) | vetea | - | fāoa |
| v) | mou | - | mo oe |

GALUEGA FAATINO: (Faatalanoaga / Class Discussion)

Faitau fesili taitasi nei ia malamalama ai ona faatalanoa lea ma le vasega, e maua ai ni meataua mo i tatou.

1. O le a po o a mafuaaga e ala ai ona ta'ua isi tagata o pologa?
2. Faamatala le eseese o le upu pologa ma le upu auauna. Aumai ni mau mai le Tusi Paia e pine ai lou manatu.

PESE: 175. Omai ia faamalosi.

A'OA'OGA:

1. E faasaolotoina e le Atua i tatou mai lo tatou nofo pologa.
2. O lo tatou tumau i le faatuatua i le Atua, e faaolaina ai.
3. 'Aua le fefe ma faavaivai ae faatuatua ma faamalosi, tatou te manuia ai.

.....

ASO SA: 27 SETEMA 2026

MATAUPU: O SE POLOGA - PO O SE UO
PELEINA? (*A slave or a beloved brother*)

SINI: Ia malamalama le vasega, so o se tasi ua faapei o se pologa, ia avea o ia ma au uo peleina ia Keriso Iesu.

TUSI FAITAU: Filemoni 1: 8 – 18

FESOASOANI MO FAIAOGA:

O le ta'u-pologaina o se tagata i totonu o se sosaiete, o se ta'u faatauvaaina foi lea o lena tagata i lona tulaga ma lona siosiomaga o ola ai. Aua o le pologa o se ta'u lea o se tagata o loo fai ma auauna po o se meafaigaluega a le isi tagata. E lē ola saoloto ae alu uma lona taimi ma lona ola i le faia o feau ma galuega a lona matai o lo o pule ia te ia. O lona uiga o se tagata e ola mafatia ma tigaina. E faasinoesea lona tagata mai le li'o o tagata o lo o ola lelei ma ola manuia. Peitai, o le tatou mataupu i lenei Aso Sa, o lo o ta'ua ai e Paulo i lana tusi ia Filemoni le uso auauna a le Alii; le pologa lea e suafa ia Onesemo lea e faapea o le pologa a Filemoni. O Filemoni lava ia o le tagatanuu o Roma ua liua ma avea ma ave feau o le Talalelei a Keriso ona o Paulo ma lana galuega tala'i. A o saisaitia Paulo i le falepuipui i Roma, na le'i gata ai lona fia mafuta pea ma tusi atu ia Filemoni e tusa

o le sola ese mai ai o Onesemo mai ia te ia. Ua nonofo ma Paulo i le falepuipui ma auauna mo ia pei o se pologa. O le ala lea ua manatu alofa ai Paulo ia Onesemo le atalii ma tusi ai ia Filemoni i lona tulaga faa-tama alofa i fanau; pei ona i ai le fuaiupu lea ua faamamafaina: "Auā atonu o le mea lea na te'a ese ai o ia i sina itu aso, ina ia e toe maua o ia e faavavau; e lē toe faapei o se pologa, a e sili i le pologa, o le uso pele ia ia te a'u lava; e le sili ea ona faapea ia te oe i la le tino atoa ma la le Alii?" O se vaega taua o upu a Paulo na tusi ai ia Filemoni; o le tāua o le alofa faale-uso moni i la le talalelei a le Alii. Fai mai Paulo, e lē toe faapei o se pologa, a e sili i le pologa, o le uso pele ia ia te a'u lava; e le sili ea ona faapea ia te oe i la le tino atoa ma la le Alii. O le manatu o Paulo, ua ia molimauina le faamaoni ma le alofa moni o Onesemo ia te ia i le la mafutaga, ma atonu ua iloa ai e Paulo lona salamō moni i lana mea sese sa fai, ua suia ai lona olaga ma ua ta'uaogāina ai lona ola mo le Alii ma lana talalelei. O le aotelega lena ma le tusi atu o Paulo i lona atalii faaleagaga o Filemoni, ina ia alofa ma talia o Onesemo, ma faamagalo ma avea o se uso peleina i le talalelei ia Keriso. O se feau tāua lea mo i tatou le fanau peleina o le talalelei. O sē ua tatou ta'u faatauvaaina i o tatou manatu ma lagona pei o se pologa, o le faamanatu, ia tatou talia, amanaia ma avea o se uso po o se uo peleina i o tatou tagata i la le tino atoa ma la le Alii. E ese le tāua o lenei tulaga i le soifuaga faale-tagata pei ona o tatou i ai; auā foi na faia i tatou uma e le Atua i lona faatusa paia. O lona uiga po o le a lo tatou tutupu mai i lenei lalolagi ma eseese o tatou tulaga ma le tamaliiaga faale-tagata e oo i ai, pau lava le faamanatu, e tutusa tagata

uma na faia e le Atua, ma e lē faapito lona alofa. E tutusa tagata uma i lana silasila aemaise lona Alofa tele e fusia ai i tatou tusa lava po o le a lo tatou vaivai ma le faatauva, e fa'aaogaina lava i tatou mo ana feau, o fanau pele ma uo pele i lana Talalelei ma lona Malo ua faailoa mai. Ia manuia tele le sapatu paia o le Alii; o Iesu na afio mai pei o se pologa, o la tatou uo peleina ua tatou maua ai le ola, ma le ola faavavau, Amene.

Uiga o Upu:

- i) poloa'i - faatonu
- ii) noanoatia - le saoloto
- iii) pologa - tavini
- iv) i la le tino - ola faale-tino

GALUEGA FAATINO: (Taliga fesili)

1. O le a le tāua o le avea ma tagata pologa? Aumai ni mau mai le Tusi Paia.
2. O le a le tāua o le avea ma tagata auauna? Aumai ni mau mai le Tusi Paia.
3. I le mataupu, o ai sa fai ma vaa faaola o Onesemo?
4. Pe na talia pe na teena e Filemoni le manaoga o Paulo?
5. O le a sou lagona i se tagata pologa ae te'i ane ua avea ma au uo peleina?

PESE: Pese ma Viiga 74 Toatasi Lē ua sili.

A'OA'OGA:

1. O sē ta'u pologaina, ia avea ma au uo peleina ia Keriso.
2. Ia amanaia ma talia isi tagata o ni au uo moni i le Talalelei.
3. O Iesu o le tatou uo sili.
4. E liliuina e le Atua o tatou tagata agasala ma uo pele i lona Suafa.

.....

ASO SA: 4 OKETOPA 2026

MATAUPU: E LEAI NI TUA'OI O LE AGALELEI (*Generosity has no bounds*)

SINI: Ia malamalama le vasega, o le alofa o le Atua e lei faatuaia.

TUSI FAITAU: Mataio 20: 1 – 16

FESOASOANI MO LE FAIAOGA:

O le mataupu o lenei taeao, e taula i le faataoto a le Alii Faaola e pei ona tatou faitauina mai le Mataio e 20. E faatusatusa i ai le malo o le Atua i le matai ma lana tovine. Sa fai lana au faigaluega, sa asiasi le matai ma maitauina le

toatele o loo tutū e lē o faia ni galuega. E faapena foi ina ua tutonu o le la, ua fai ane le pule o le tovine, pe aisea ea ua na o le tutu ai e leai ni galuega o faia. Ona tali ane lea o i latou “E leai se na fai mai ia te i matou.” Ona faatonuina lea e le matai o lana auauna e valaau i le au faigaluega, ua avatu ia te i latou o latou tauai, ua tutusa uma lava le tauai o i latou na galulue, mai lava i e na muamua sei oo i e na mulimuli.

Ua muimui e i latou na muamua le matai ona o le tutusa o le latou tauai ma latou na mulimuli, peitai o le tali ane a le matai, na iloa ai, o lona alofa ma lona agalelei i le aufaigaluega, e tutusa uma lava i latou.

E pei foi lava o nei aso, ua tatou molimau ma vaavaai i le vevesia’i o aiga ma ua le maua se nofo filemu ina ua manatu le tagata i lona taimi ma ona sao i mea fai. Faapena foi i totonu o aoga, e i ai tamaiti e le fiafia pe afai e fou atu se isi tamaititi ae alofa i ai le faiaoga, e tele ai lava ina tuufesili, amea ea ua alofa le faiaoga ia te au ua leva na ou aoga. Faapena foi i le mafutaga a fanau ma matua, e i ai lava tamaiti e lagona le manatu lea, pe a vaai atu ua sili le alofa a matua i le isi ona uso poo lona tuafafine, i lo ia.

Peitai o le aoaoga lelei o le tala lenei, ua faaali manino ai, e tutusa le alofa a le matai i lana aufaigaluega atoa, tusa lava po o le a le taimi na amata ai. E faapena le alofa o le Atua, e leai ni ona pa puipui poo ni tuaoi e ono vaoia ai lona alofa mai mo i tatou. E i ai le tasi upu masani ai le faalogo “e tutusa lava aso e tele, ma le aso e tasi i luma o le Atua”. O lona silasila lena i lou soifua ma lo’u ola ao tatou galulue ai i lana tovine i totonu o tatou aiga, o nuu ma le Ekalesia. E manatu foi e ao ona tatou alolofa atu e faapei ona alofa mai

o le Atua, aua nei o tatou vaai ma saili masei, pe alofa faapito foi, ae ia tutusa uma tagata i la tatou vaai. O tagata malolosi ma tagata mama’i, faapena foi i lou alofa i lou uso ma au uo. E faapena le ata na faapupula mai e le tatou Alii Faaola, ina ua ia afio mai le lagi, ma militino faatasi ma tagata o le lalolagi, e lei faapito le alofa o Iesu i soo se tasi, na oo lava i tagata vaivai ma matitiva, na alu lava i ai Iesu e saili mai ina ia faaola ia te i latou. Na ofoina lona soifua, ma maliu ai luga o le satauro, na Ia saunia ai le faaolataga ua tatou ola ma magalo ai. Ia aua nei faatuaioia lo tatou alolofa atu ma faatino galuega lelei mo e oloo manaomia le fesoasoani.

GALUEGA FAATINO: DEBATE / FEFINAUAIGA

Faamolemole susuga i faiaoga, vaelua le vasega i ni vaega se lua, o le tasi itu e AGREE (Lagolago) a o le isi e DISAGREE (Tetee).

Itu lagolago:	E LEAI NI TUA’OI O LE AGALELEI
Itu tete’e:	E TATAU ONA IAI TUA’OI O LE AGALELEI

PESE: 370 (Pese ma Viiga)

A’OA’OGA:

1. Ia tatou alolofa atu i isi tagata e faapei ona tatou alolofa ia te i tatou lava.
2. E tutusa uma lava i tatou i le silafaga a le Atua.

3. Aua tatou te muimui i isi tagata.

.....

ASO SA: 18 OKETOPA 2026

MATAUPU: O PUAPUAGA (*Suffering*)

SINI: Ia malamalama le vasega, e i ai le Atua i taimi e lofia ai i tatou i puapuaga o le ola.

TUSI FAITAU: Iopu 1: 13 – 22

FESOASOANI MO LE FAIAOGA:

Faimai upu a se tasi tusi pese iloga o Horatio Spafford “It is well; it is well with my soul” o le tatou mataupu o lenei taeao, o le tala ia Iopu ina ua tofotofoina lona faatuatua e le Atua i le tele o faafitauli na feagai ma ia, ae lei foi ai le toeaina.

O Iopu, o le tagata mai le nuu o Usa, o se tagata sa tonu ma sao lana amio i luma o le Atua. E toafitu ona atalii ma ana fanau teine e toatolu. Faimai ua oo i se tasi aso, ua fasia ona manu uma faatasi ma ana auauna, ma ua faoa foi e tagata Seepa o latou fanua, a o le mea matautia, o le maliliu ai o le fanau a Iopu ina ua agi le matagi ma pau ai le latou fale.

O ni tiga ina matua matuitui le maliliu o lona fanau aemaise ua aveesea mea uma sa ia te ia. Ai lava o le uiga tonu lava lea o le upu PUAPUAGA, e faamatala i le olaga ua poia ma

ua aveese mea sa fai ma faamoemoega a aiga. O le tulai a Iopu ma saeia ona ofu, o le faailoga o le aveesea o mea uma sa ia te ia, peitai, o lona toe faapau i le eleele, o le ata o le tagata ua lagona lona faatauva, le tagata ua gaogao ii, le tagata ua fia maua le filemu, peitai o lana tautinoga, na iloa ai, na te lei tuuaia le Atua i nei mea uma, ma ua loto, e alu lava ma le leai o se mea i le lagi o faatali mai.

A o le upu manaia lea o lo o taua ile faitauga lea, fuaiupu 22, faimai “E lei agasala Iopu i na meauma, ua na le ta’u valeina foi le Atua.” E lei foi le faatuatua o le auauna a le Atua, na loto lava e inu le oona ma le tiga, ae lafo pea lona faamoemoe i lona Atua ma lona mautinoa, e faatasi mai le Atua i taimi faigata o lona ola.

E faapena foi lo tatou ola, o mea uma ua tatou maua, e i ai le taimi e muta ai, e i ai le taimi e gata ai, ae totoe ai na o taua ma le Atua. A o taimi sili ia, tatou te lagona ai le mafanafana o aao pai mai a lo tatou Atua. Ioe le fanau e, e faapena le tagata e moni lona mulimuli ia Iesu, e na te le lagona se tiga o puapuaga, ae atili fiafia ma filemu ai, ina ua ia iloa, e fesoasoani mai le Atua mo i tatou. Ia tatou faapei o Iopu, e lei pele ia te ia mea o lenei olaga, na oo lava i lona ola, na ia lafo lava i le pule a le Atua, afai e ave, lelei, a leai foi, lelei. Tamaiti, e lelei mea uma ona o le faatasi mai o le tatou Alii o Iesu, na te tu lava mo i tatou, i taimi o aoga, i taimi o suega, faapea foi taimi e faaletonu ai lo tatou taumafai. Manatua Ia tatou taumafai pea, ma lagona le filemu pai mai o le Atua. Ia manuia outou le fanau.

GALUEGA FAATINO: FAASOA

Faamolemole susuga i faiaoga, ia faatino se faasoa a le vasega, o ni mea o lo o fai ma faafituli ia te i latou, o ni mea foi o lo o mamafa ai o latou mafaufau. Faasoa ma fesoasoani i ai e ave le faamalosi ina ia maua le fiafia i le fanau.

Faasoa mai o outou lagona i ni vaega o lo o fai ma faafitauli i mafaufau (aiga, galuega, aoga ma isi nofoaga.)

O a ni mea o mamafa i o outou mafaufau, e tatau ona maua ai se fesoasoani?

PESE: IT IS WELL WITH MY SOUL

A’OA’OGA:

1. Ia tumau lo tatou faatuatua i le Atua.
2. Ia tatou faamafanafana atu i e o lo o mafatia.
3. Onosai ma lototele i taimi o puapuaga.

.....

ASO SA: 25 OKETOPA 2026

MATAUPU: **OLIOLI O LE TOE FOI MAI**
(*A joyful comeback*)

SINI: Ia malamalama le vasega, o lo o faatali mai aao alofa a lo tatou Atua mo i tatou lana fanau.

TUSI FAITAU: Luka 15: 11 – 32

FESOASOANI MO LE FAIAOGA:

Talofa tamaiti, o le tatou mataupu i lenei aso Sa, o le tala i le uii faamaumau ‘oa, lea sa na ia faatoga atu i lona tama ina ia aumai lana vaega ‘oa. Sa faatino lava e le tama le manaoga a si ona atalii, ua ia avatu ana vaega oa ma ua alu ma faaoga i mea a le lalolagi, ua malaga i nuu mamao ma tafafao ma ana uo ma fai le fiafiaga o le lalolagi, mulimuli ane ua lē o toe i ai se vaega o ana ‘oa o totoe, ona oge tele ai lea o ia ma ua leai se mea e ola ai.

Peitai ane ua alu ma nofo i se tasi tagata ma ia galue ai e fafaga puaa a lenei tagata. Ua toe to manatu le tama i le leaga o lana mea sa fai, auā ua mamao ma lona tama. Na aai faatasi ma puaa, ona tonu lea i lona manatu e toe foi i lona tama ma lona aiga. Ona faapea lea ona fai, ua iloa mamao mai e le toaina si ona atalii, ma ua tamo’e mai e faafetaui ma ua toe feiloai fiafia ma ia.

E lei suia le alofa a le tamā i lona atalii, peitai ua tagi lona atalii ma tautino e avea ia ma auauna ae aua nei toe avea ma sona atalii. E lei avea lea ma mea e aveese ai le loto a le toaina i lona atalii, a ua faaofu i le ofu tatapuvae, ma ua ave foi i ai le mama, ma fasi povi peti e fai ai le aiga tele e faafeiloai ai lona atalii.

E ui lava ina ese le manatu o le uso matua i lona vaai atu ua fiafia le toeaina ma lona uso laititi, ae na faamalamalama lava i ai e le toeaina, ma fai ane i ai; “Ua tatau foi ona tatou fiafia ma olioli, aua o lou uso lena na oti, a ua ola mai; na le iloa foi, a ua maua”

Tamaiti, o le feau lea o le faataoto a Iesu, ina ia fai ma faamanatu le olioli ma lona taua i totonu o mafutaga i le va o matua ma fanau. Po o le a lava le faalogogata ma le ola faatuiese a tatou le fanau, e le suia ai le alofa moni o tatou matua mo i tatou. E tusa lava po o le a lo tatou taumamao, ae a toe foi mai i le aiga moni, e tamo’e atu lava le tamā ma le tinā ma fusi, ma sogi, o le faailoga, o le alofa faamatua. E faapena lo tatou Atua, po o le a lo tatou o ese ma Ia, pe taumamao foi, ma pau i le agasala, e tatou te toe foi mai lava, ae o lo o faamafola atu ona aao alofa, e talia ma sapaia le tagata na leiloa. O le uiga o le olioli, o le fiafia e sau mai le loto, e lagona ina ua toe maua sootaga ma ua toe sosoo se mafutaga na motusia talu le agasala ma faiga a lenei lalolagi. Ia ta manatua, o lo o faatali mai pea le Atua, i le taimi tatou te lagona ai le salamo mai mea a lenei lalolagi, ma toe foi atu i ona aao. Tatou alolofa i nai o tatou matua, e le faigofie lo latou tautiga ma galuega alofa ua latou faia ina ia ta maua le manuia ma le filemu.

GALUEGA FAATINO: TUSIGĀ SOLO

Ia tusia mai e tamaiti ni o latou solo, pe na o le 5 laina, faatatau i le “Uii ffaamaimau oa”

A vave le galuega, ona faasolo lea e faitau mai.

PESE:

Lo’u Tamā, ua ou sese
I la’u filifiliga sa ou fai
La’u vaega tupe ia aumai
Se’i ou tiu ai i le lalolagi

Ua ou iloa nei, e lē aoga
Ola e soona fai, leai se tapasa
Manatu ifo ai, ua sili ita
O le iuga lea, o le puapuaga

Tali:

O a’u le tagata agasala
Se avanoa, to maia mo ita
Se atalii, ua fia auauna
E foi atu ai, ile aiga

Original by: Rev. Pro. Vaitusi Nofoaiga
fati: Pacific love band; Le Atua talia mai a’u.

A’OA’OGA:

1. Ia aua nei galo le alofa o matua
2. Aua nei ta naunau i mea a le lalolagi e pala
3. O le Atua e alofa mo i taua.

.....

ASO SA: 1 NOVEMA 2026

MATAUPU: O Ë UA FILIFILIA I LE ALOFA TUNOA (*A Remnant chosen by grace*)

SINI: Ia malamalama le vasega, e taua tagata uma i le Atua

TUSI FAITAU: Roma 1: 1 – 12

FESOASOANI MO LE FAIAOGA:

O le tatou mataupu i lenei taeao, o le tusi a Paulo na tusia ma ave i tagata o le Ekalesia poo tagata Kerisano o lo o aumau ma nonofo i Roma. O lea tusi o lo o ave ai se faamalosi au a le Aposetolo i nei tagata Kerisiano i lo latou va nonofo ma tagata o nuu ese o lo o fia liliu e avea ma tagata kerisiano.

Fuaiupu e 7 o lo o taua ai e Paulo tagata nei, o tagata ua alofaina, ma o le tusi lenei o lo o faamatalaina ai e Paulo lana mataupu silisili “AMIOTONU O LE ATUA”, faatatau lea ile natura o le Atua, o le Atua tausi feagaiga. E faatau e Paulo lea vaega ona talu ai o le va o tagata Iutaia ma tagata o nuu ese, e manatu lava tagata Iutaia ua na o latou lava o tagata o le feagaiga, e ala i le peritomeina. Peitai ane e lē o lea le finagalo o Paulo, o lona manatu, o tagata uma e mafai ona avea ma itutino o le feagaiga pe afai e talitonu ma faatuatua i le Atua ma tausi poloaiga uma.

O le tasi foi o manatu a le Aposetolo, o tagata ua alofaina, o tagata lava nei ua filifilia e le alofa tunoa o le Atua e fai ma tagata paia. Peitai o le faaogaina ole upu “O e” i le faaperetania “remnant” o lona uiga o nisi o totoe, e faaauauina se faamoemoe. E faatau e Paulo tagata nei, ona o i latou nei e tatau ona faaauauina le feau a le Talalelei, ma e le tatau ona ma i le feau ma le Talalelei. Ma e le taua le ta’ua o tagata Iutaia o tagata o le feagaiga ae le o tausia le feagaiga, peitai o le loto ua ofoina e tautua ai mo le Atua, o lou lava lea sao ma e tauamiotonuina tagata e alolofa moni i le Atua ma lana Talalelei.

O i tatou foi o tagata nuu ese, o tagata ua alofaina, o e ua filifilia e faaauauina le Malaga faatuatua, ma e taua lou sao, e ala i le faatuatua ma tausi poloaiga a le Atua, o lo tatou lea ala i le Tala o le feagaiga. O Paulo foi na te faatauaina le peritomeina o le loto ma le agaga, i lo le tau faatali i le peritomeina o le pa’u ae palapala ma eleelea o tatou loto. Peitai o le ofoina o tatou tagata e fai ma tagata o le Atua, e faia ma le faamaoni faatasi ai ma le le faalogologotiga, ae talitonu ma mulimuli, o ala na o tagata ua filifilia i le alofa tunoa.

Na fa’aalia e Iesu lona alofa tunoa ina ua ia faia le taulaga sili e ala i le ofoina o lona soifua e faatinoina le faaolataga o tagata agasala uma.

O le feau taua lea tamaiti, o oe ma a’u, o tagata ua alofaina e le Atua, ua fia ni taimi tatou te feagai ai ma faafitauli ae laveai lava taua e le Alii, o le ata lena o lona alofa. E taua lo tatou sao e ala i le faia ma faatino feau ma galuega uma i le

faamaoni, ma ava ma usitai i matua, ma ia toaga e tatalo i le Atua e foai mai le filemu ma le poto ma le atamai.

GALUEGA FAATINO: TUSIGA TALA

Faamatala mai le uiga o le Alofa tunoa o le Atua mo i tatou, i ni au fuaiupu se lua pe tolu.

PESE: Pese ma Viiga 138

A’OA’OGA:

1. O i tatou o tagata ua filifilia e le Alii e fai lona finagalo.
2. Ia ava ma usitai, ma tausi poloaiga uma a le Atua.
3. E alofa le Atua ia te oe ma a’u.

.....

ASO SA: 8 NOVEMA 2026

MATAUPU: AUA LE FAAMASINO ATU
(*Do not judge another*)

SINI: Ia malamalama le vasega e tutusa tagata uma i le silafaga a le Atua.

TUSI FAITAU: Roma 14: 1 – 12

FESOASOANI MO LE FAIAOGA.

O lo o atagia mai i le tusi faitau se fe’ese’esea’iga o manatu ma lagona o tagata, ona o fa’aiuga fai. E tupu lenei mea ina ua tatou faavasegaina tagata ma o latou tulaga i se faalapotopotoga. E i ai tagata e tele le tamaoaiga, o tagata na e tu lelei ma malolosi. A o tagata e lima vaivai e taua i latou na e matitiva. Peitai fai mai le mataupu, aua tatou te faamasino atu. O le feau a le Aposetolo o Paulo i lana tusi i Roma, e le o le finagalo lena o le Alii tatou te faamasino atu i isi tagata, ae ia tatou iloa ona talia ma alolofa atu i e ua vaivai, pei o le tasi upu, aua tatou te faamasino atu, ina nei faamasinoina mai i tatou. O lona uiga, ia tuu ese lo tatou faailoga tagata ma le tusitusilima, auā e le tuulafoaina e le Atua ona tagata, ia tutusa tagata uma i la tatou vaai, a o le faia o le faamasinoga, e le o se mea lena a tatou, ua nao le Atua lava e faia le faamasinoga tonu.

O le mafuaaga lea na tusi ai Paulo i le Ekalesia i Roma e taumafai ina ia fofu le faafitauli o lo o feeseeseai ai tagata Iutaia ma tagata kerisiano o nuu ese, mafua mai i le eseese o talitonuga ma tulafono faapea foi ma aganuu, pei o le faatatau i le tasi aso e sili i le isi aso, o meaai foi mo le faaaogaina, ua latou vaai maulalo ai i tagata vaivai ma taufaatauvaa ai i latou e ‘aina mea e ola i le ele’ele, ua latou faamasinoina ai le foai a le Atua. A o le faatuatua a le kerisiano nuu ese, ua latou filifili ai e talia le talalelei o le alofa tunoa o le Atua, ma o le saolotoga lena e talia ai mea uma ua foaiina e aunoa ma se faamasinoina pe fesiligia, latou te talitonu foi e tutusa aso uma na faia e le Atua. O a

lava foi mea tatou te maua, ia faasoa atu i isi tagata ma talia i latou, ae aua nei o tatou faamasino atu ma ta'ueseaa i latou, aua ua talia i latou e le Atua ma faamanuia i ai. Ia tuu ese na feeseesea'iga a ia tutu faatasi ina ia tumau e fai ma molimau i ekalesia, na faailoa ai foi e Paulo le aoaoga sili, e tineaia ai le faamasino atu ma le faamasino mai, i le manatu e faapea, ia tatou talia soo se tagata, e faapei o Keriso na ia talia i tatou ina ia viia ai le Atua. O lea foi le faamanatu mo le au faatuatua uma, tatou te ola ma oti mo le feau a le Atua, aua o le maliu ma le toetu manumalo mai o Keriso mai le oti na faamausali ai lona tulaga Atua e talia ai le ua faatuatua ia te ia ma tagata uma lava.

O le faataua foi lea o lenei vaitau o le Etiveni, o le faamoemoe ola ina ia tapenapena ai loto ma agaga o tagata uma, ia faamama ma faatalitali i le afio mai o Iesu Keriso, o le faamasinoga tonu lena a le Atua ma lona alofa tunoa e mausali ai faatuatuaga o tagata talitonu uma. E le o a tatou aganuu, po o talitonuga, po o a foi mea tatou te faia, ia tatau lava ona tatou faaogatotonu Keriso i o tatou ola, ma olioli ona o lona filemu ma lona afio mai, o le faataunuuina foi lena o le poloaiga a le Atua. E amata atu ia i tatou, ia tuu ese lo tatou faamasino atu o isi, ona fai lea o i tatou ma faataitaiga i isi tagata, aua tatou te laulaututu uma i luma o Keriso ma faailoa atu a tatou amio i le Atua. Ia luitauina i tatou i le agalelei o le Atua, ina ia tatou fausia ai o auala o le femalamalamaa'i, ae le o le ati'ina o se Pa e fai ma faamasinoga.

GALUEGA FAATINO. Debate

Vaelua le vasega i vaega se lua, o le tasi e Ioe poo le itu lagolago i le manatu, a o le isi vaega, o le itu tetee, latou te le lagolagoina le manatu. O le a faaaogaina ituaiga talitonuga e lua o loo atagia i le tusi faitau, o loo faamasinoina ai e tagata Iutaia mea latou te maua ma fa'aaogaina ma mea e tatau mo tagata o nuu ese.

O le vaega muamua o le kerisiano Iutaia, latou te lagolagoina tu ma aga a Iutaia faapea ma tulafono sa aoaoina mai ai.

O le vaega lona lua, o le kerisiano nuu ese, ua latou talia le talalelei ia Iesu Keriso.

PESE. Pese ma Viiga 368

A'OA'OGA:

1. Aua tatou te faamasino atu, ina nei faamasinoina mai i tatou
2. Ia e alofa atu i le lua te tuaoi e pei o oe lava ia te oe
3. Ia tatou maua le agaga fesoasoani atu, ina ia atagia ai le alofa laveai o le Atua i mea tatou te faia

.....

ASO SA: 15 NOVEMA 2026

MATAUPU: USITA'I IA TE IA E TE OLA AI
(Obey him and live)

SINI: Ia malamalama le vasega o le usitai i le Atua ma tausī ana poloaiga e maua ai e le tagata ana faamanuiaga ma maua atili ai le ola.

TUSI FAITAU: Teuteronome 26: 16 – 19

FESOASOANI MO LE FAIAOGA.

O le mataupu o lenei taeao o lo o aumai manino lava i le gagana faigofie ona malamalama ai le fanau, e peiseai o se faatonuga e tataua ona fai e tagata uma aua o lo o aumai ai foi ma le mafuaaga e ala ai ona faia, o le usitai i le Atua e te ola ai, aua a le usitai, ona le maua lea o le faamanuiaga ua faailoa mai. E faapena foi i le olaga nei ua tatou iloa ma vaaia i va o matua ma fanau, e a'oa'i e matua latou fanau ina ia faalogo ma usitai ina ia fai ma tama ma teine lelei ma alofagia ai e tagata, ae a le usitai loa le fanau, ona afaina lea. Aua o le usitai o le fanau i matua, o le usitai foi lea i le Atua. Ona o gatusa ai lea ma le molimau faa Teuteronome, a usitai Isaraelu i le Atua, ona faamanuiaina lea, ae a le usitai loa Isaraelu, ona oo mai lea o faigata ma puapuaga.

O le mafuaaga foi lena na faailoa ai e Mose i tagata Isaraelu lea faamanatu taua, a o sauniuni e ulufale atu i le nuu o le

Folafolaga, na ia faapea ai, o lo latou manuia ma le ola, e le faalagolago i lo latou malosī po o le atamai, leai, e mafua ona latou maua le manuia ma le ola pe a latou usiusitai i le Atua, a o le usitai i le Atua, o le ola lea i ana faamanuiaga ma lana puipuiga. A tatou usiusitai i le Atua, o le ata manino lea o lo tatou tali atu i lona alofa ma lona faamaoni, e faaalai ai foi lo tatou faasinomaga o i tatou o tagata o le Atua, ona tatou mauaina lea o faamanuiaga faapea foi ma le ola atali. O le tausī feagaiga lena a le Atua, o ana poloaiga uma foi e le faasamasamanoa, a e faataunuuina lava. O le usitai, o le auala lea a le tagata faatuatua ma talitonu ona e mafua mai ina ua latou lagona le alofa, ae le ona o se fefe. O le ala i le usitai lea na lauiloa ai Isaraelu i ia ona po, pei ona folafola mai o le Alii i le aso nei, o outou o lona nuu, o lana oloa taua, afai e ta'ua i tatou e le Atua o ona tagata, e tataua foi ona atagia la tatou sootaga lea ma Atua i o tatou olaga.

O le upu e faapea o le tagata usitai lava ia e maua le mea lelei, o lea foi le fetalaiga a le Atua mo lona nuu, e faavae lea i faamanuiaga ua uma ona ia folafolaina, a usiusitai o Isaraelu ona ia faaeaina lea o i latou ma faamamaluina foi ma viia e nuu uma lava. O ina ua tatou iloa ai, o le le usitai, e tapunia ai le faitotoa i faamanuiaga, ae o le usitai tatou te talisapaia ai le lasi o faamanuiaga e toina mai mo i tatou. O lea le faamamafa, usitai ia te Ia e te ola ai, o lona uiga, ia tatou alolofa ia te Ia ma o tatou loto ma agaga atoatoa, ia savavali i ona ala i aso uma, ona tatou maua ai lea o le ola ma maua atili ai lava.

GALUEGA FAATINO. Taliga fesili.

Ua tatou manino ma malamalama i le mataupu ma le uiga o apoapoa'iga a Mose ia Isaraelu i le taua o le usitai i le Atua e maua ai le ola. O lea ua tapenaina mai ai ni fesili mo i tatou e faasoa mai ai, ma faalaua'itele ai foi le taua o lenei mataupu.

1. O le a le uiga o le usiusitai i le Atua “ma lou loto atoa ma lou agaga atoa”?
2. E faapefea ona fa'aalia e le usiusitai ua ia i tatou, o i tatou o ni tagata o le Atua?
3. O a nisi o faamanuiaga e oo mai e ala i le usiusitai?
4. Aisea e te manatu ai e faigata i nisi tagata ona usiusitai i le Atua i aso nei?

PESE: Here I am Lord (see youtube)

A'OA'OGA:

1. E le vale le tauai o le tagata e faaloga ma usitai
2. E tupu le faatuatua i le tauologologo

.....

ASO SA:

22 NOVEMA 2026

MATAUPU:

O SE FAATA'ITA'IGA I E UMA UA TALITONU (*An example to all the believers*)

SINI:

Ia malamalama le vasega, o le avea o i tatou o loo omai i le Aoga Aso Sa e fai lea ma faataitaiga i isi tamaiti ua faavaivai, ina ia fiafia e auai i le aoga, tatou te malamalama ai i mataupu tau i le Atua

TUSI FAITAU: 1 Tesalonia 1: 1 – 10

FESOASOANI MO LE FAIAOGA:

E masani ona tatou faalogoina le faaupuga lea ‘o le faata'ita'iga’, e fa'aaoga ina ia tau faamalamalama atili ai se mataupu poo se vaega e le o malamalama ai se tagata. E masani foi ona faalogo i matua pe a fai se aoaiga pe apoapoa'i mai foi ina ia lelei o tatou olaga, ma faapea mai, ‘ia fai outou ma faataitaiga lelei i isi tamaiti, ae le o le tausolomua ia outou le faia o faataitaiga le lelei,’. O lona uiga o a tatou amioga ma gaioiga tausaaafia e fai, e avea ma itu taua e fesoasoani ai i isi tagata. E faapena foi ia te i tatou, e i ai taimi e avea ai isi tagata ma faataitaiga lelei ia i tatou ma aoaoina ai foi tatou i mea tatou te le o atoatoa ai.

E faapena foi le uiga o le tusi lenei a Paulo i le Ekalesia i Tesalonia, ao o i ai faatasi ma Sila ma Timoteo, e faafetaia ma faamalosi ai lo latou faatuatua. O le alofa ma le faamoemoe, ma faamalulu ai ona o le utiuti o le taimi pe a fua i ai, na latou afea ai le aai o Tesalonia i le vaitaimi o le AD 50, poo le 50 tausaga ua tuanai le maliu o Iesu. Mo nai vaiaso e 3 ma aoao ai le Talalelei ia Iesu ma liua ai nisi ina ua latou lafoai o atua sa talitonu i ai, a ua liua ma talia le talaiga e uiga ia Iesu ma auauna i ai. Peitai ina ua teena i latou e nisi o tagata Iutaia sa faalogo i ai ma tuuina atu ai ina ia faasalaina ma motusia ai la latou talaiga, ae ua avea i latou na liua e fai ma faataitaiga i e ua talitonu ina ia faasusulu atu i lenei itulagi le feau o le faatuatua. O ina na tupu ae ai le manatu alofa o le Aposetolo ia i latou na mafua ai ona ia tusia lenei tusi.

E amata lava le faafetai a Paulo i le Atua ona o tagata Tesalonia ma faafetaia lo latou faatuatua ma le faamalosi i le alofa ma lo latou tumau pea i le faamoemoe tasi o le avea o Iesu Keriso ma o latou Faaola, ma Faavae ai lo latou olaga faakerisiano. O le manatu o Paulo na mafua ona atia'e lo latou faatuatua ona o le malosi ma le mautinoa e ala i le Agaga Paia ae le na o le upu. Peitai ua latou lagonaina le puapuagatia na oo ia Iesu, atoa ai ma le afaina o Paulo i faigata, o ina na faamautuina ai lo latou naunau ma talitonu, ma faaosofia ai le fiafia ma talia le talalelei, ma na avea ai i latou ma faataitaiga mo isi ekalesia i Maketonia ma Akaia. Manatu Paulo, e le toe aoga ona ia toe talai atu le upu ia i latou, aua o lo latou lava faatuatua na latou liua mai ai i tupua ae auauna ma auauna i le Atua soifua ma faatalitali ia Iesu e

na te laveaina i latou mai le aso faamasino. E lei tau ina faalogologo tagata Tesalonia i aoaoga o le Talalelei, ae na latou olaina le upu, sa malosi lo latou faamaoni, sa naua'i foi lo latou alofa, ma sa le'i mafia foi ona faalavelaveina lo latou faamoemoe, e oo lava i taimi faigata, sa avea ai i latou ma faataitaiga mo isi. Faapena foi ia i tatou, e mafia ona avea ma faataitaiga i leola faamaoni ma le fiafia, lototetele ma le alolofa atu i tagata.

GALUEGA FAATINO: Fefaasoa'i manatu.

Ua saunia ni manatu e tuuina atu i le vasega, ia filifili sau manatu se tasi, ona e faasoa mai ai lea i ou manatu, aua e taua lo tatou faalogologo i manatu fa'aalia a isi tagata, tatou te aoaoina mai ai ma fesoasoani ai foi ia i tatou lava.

1. O le avea ai o i tatou ma faataitaiga i nisi tagata talitonu, o le a se aoga mo i tatou a o le a foi se itu tatou te faateete ai.
2. E faapefea ona vaaia lo tatou faatuatua, alofa ma le faamoemoe i o tatou gaioiga i aso fai soo.
3. Afai o oe o se tasi o i latou mai Tesalonia na liuaina, faamata o a ni luitau na feagai ma outou i lea vaitau, ae faapefea ona outou tali atu i na faafitauli.
4. O ai se isi tagata ua mauaa lona talitonuga faakerisiano i nei aso o taulai iai lau vaai pe ua fai o ia ma faataitaiga mo oe.

PESE: Pese ma Viiga 380

A'OA'OGA:

1. Ia fai i tatou ma faataitaiga lelei mo i isi tagata
2. E tupu le faamoemoe ina ua tatou galulue ma le faatuatua i le Atua
3. Ia fai i tatou ma lamepa e faasusulu atu le malamalama o le Atua i agaga o i le pogisa

.....

ASO SA: 29 NOVEMA 2026

MATAUPU: APERAAMO MA ISAACO
(Abraham and Isaac)

SINI: Ia malamalama le vasega, e faamaoni le alofa o le Atua, e na te saunia foi mea silisili mo lana fanau faatuatua.

TUSI FAITAU: Kenese 22: 1 – 19

FESOASOANI MO LE FAIAOGA:

O lenei mataupu o le tala masani ia Aperamo ma lona atalii o Isaako, na fetalai ai le Atua e osi ai le taulaga. Fai mai le tala na silafia e le Atua le manaoga o Aperamo ina ua tagata matua, ae le i ai sona suli, ma na ia tatalo atu ai i le Atua mo se atalii, ma na tali le Atua I lana tatalo ma ia faailoa ia te ia e ala i le miti. O se faatinoga ina faigata ma le matuitui

o lenei mea mo i laua, ua matutua ao lea faatoa maua se atalii, ao lenei ua fetalai le Atua e ave e osi ai le taulaga mu. E ui I se naunau alofa o Aperamo ae ua ia faia lava e tusa ona fetalai mai le Atua. (O se tasi o fuaitau sili ona mamana I le Tusi Paia e faatatau I le faatuatua, usiusitai, ma le faalagolago i le Atua). O se tofotofoga matuai faigata lava ona talia gofie, e le ina ia faaumatia ai o ia, ae ina ia faamaonia ai le malosi o lona faatuatua, aua o Isaako o le atalii o le folafolaga peiseai o le mea lea ua matua tiga ai le poloaiga aua ua silafia e le Atua le mea sili ona alofa iai Aperamo.

Ua aunoa ma se faatuai, ae ua saunia o ia ma lona atalii ma ana auauna e toalua i le taeaopo, ina ua latalata i Moria, na ia faapea ane ai i ana auauna, e faatali atu ae sei o la o ma Isaako e tapuai ona toe omai ai lea. O le faailoga lea e iloa ai lona faatuatua pe toe faafoisia e le Atua Isaako. O se fesili e tali gata i le alofa faatama ina ua fesili Isaako, poo fea le mamoe e osi ai le taulaga, na ia faapea ane ai, e saunia lava e le Atua le mamoe e osi ai le taulaga. Ua silafia e le Atua le faatuatua o Aperamo ina ua ia le taofia lona atalii, na ia auina ane ai le agelu ia te ia ma taofi Aperamo ae tapena le mamoe poa ua saunia e sui ai Isaako. O lona mea na toe faafouina ai le feagaiga a le Atua ma Aperamo ma faamanuia ai le Atua o le a faatoateleina lana fanau e pei o fetu o le lagi ma le oneone o le matafaga. Aua o lenei tala o loo faaalua le galuega sili o le alofa, ina ua foai mai e le Atua o lona Alo e toatasi o Iesu e fai ma taulaga mo tagata, e pei ona lava ona le taofia e Aperamo o Isaako, e lei taofia foi e le Atua lona Alo mai ia I tatou.

GALUEGA FAATINO: Taliga Fesili

1. O le a le mea na tofotofoina ai e le Atua Aperaaamo, e ave lona atalii e osi ai le taulaga?
2. O fea le mea na o i ai Aperaaamo ma Isaako e osi ai le taulaga?
3. O fea sa mau ai Aperaaamo i lea tausaga na o ai e fai le taulaga i le Atua?

PESE: Pese ma Viiga 165

A'OA'OGA:

1. Ia faavae o tatou talitonuga I le faatuatua mausali i le Atua.
2. E tapenaina lava e le Atua mea sili atu mo i tatou uma lava.
3. E leai se mea e faigata i le Atua.

.....

ASO SA: 06 TESEMA 2026

MATAUPU: O LE A AFIO MAI (*He will come*)

SINI: Ia malamalama le vasega o le afio mai o le Atua, na te aumaia le filemu ma le mautinoa i tagata ua le mautonu i le pule soona fai a le fili.

TUSI FAITAU: Isaia 35: 1 – 10

FESOASAONI MO FAIAOGA

O le tatou mataupu i lenei aso sa, e foliga mai o loo i ai se tagata o le a sau e aumai se filemu ma se faamoemoe ola, i taimi faigata o le ola. E faapena le molimau a le perofeta o Isaia e faamalosi'au ai i le nuu o le Atua i le taimi o le tau faafefe mai o malo tetele, aemaise o Asuria. O lea e lei oo i le tafeaga peitai ua avea le malosi o le finau mai o Asuria ua tau faatuatuanai ai e Isaraelu lo latou Atua. O le uiga lea o le faamalosi'au a Isaia e tumau ma faamoemoe i le Atua, aua o le a afio mai o ia e na te faaola I lona nuu. O le afio mai o le Atua o le ata vaaia o le faafouina o mea uma o loo saisaitia ai lona nuu, faaoga ai ata faafaatusa o nofoaga e le amanaia ma tuulafoaina, o le vao lafulafua e puna ae ai le vai, e tafe foi le vaitafe i le toafa, e avea le serapi ma vailepa, o le nuunaumati e avea ma vailepa o mea e taoto ai lukio e avea ma nofoaga e ola ai le u ma le kome. O nofoaga ua leai se faamoemoe ua tuulafoaina ae ua puna ae ai le vai o le faamoemoe ola pe a afio mai le Atua. Peitai e le taunuu nei folafolaga pe a tumau pea le o ese soo Isaraelu mai lo latou Atua. Ao e o loo tumau pea I le Atua, e savavali i latou i le ala sa ma foi atu I lo latou Aii I Siona, e le toe i ai se fefe ma se faanoanoa ae nao o le fiasia ma le olioli e faavavau. O se feau foi mo i tatou le fanau, e lei faagaloina e le Atua lona nuu e ui i le tele o latou agasala, ae tulituliloa lava e le alofa laveai o le Atua ina ia toe faafoi lona nuu i le mea sa iai. E faapena foi ia i tatou e le tuulafoaina i tatou e le Atua,

poo le a lava lo tatou le usiusitai ae alofa pea le Atua ma puipui I soo se mea tatou te fai. O le afio mai o le Atua e ala ia Iesu Keriso na faataunuaina ai lana folafolaga na ia faaola I tagata feoti, ma faamalolo I tagata mamai, na ia ofoina foi lona ola e maliu ai i le Satauro ae na Toetu manumalo lea ua maua ai lo tataou avanoa i le malo e faavavau pe afai e salamo ma faatuatua i le Alii.

Uiga o Upu:

i) Serapi - Oneone Matutu

GALUEGA FAATINO: Faatalatalanoaga

Faatonuga:

Faatalanoa le vasega i ni o latou manatu faatatau i le folafolaga oi lalo.

O le folafolaga “O le a afio mai” o loo faatatau i le afio mai o Iesu Keriso, na fanau i Peteleema.

PESE: Pese ma Viiga: 143

A’OA’OGA:

1. Tumau ma faamoemoe i le Atua i taimi faigata o le ola.
2. Ua na o le Atua e maua ai le filemu moni.

ASO SA-

13 TTESEMA 2025

MATAUPU-

O LE POTO (*O Wisdom*)

SINI-

Ia malamalama le vasega o le poto sili e le o lou iloa o meauma ae o lou ola mata’u i le Atua.

TUSI FAITAU- 1 Korinito 1: 26 – 31

FESOASOANI MO FAIAOGA:

O le poto e uiga tutusa ma le upu atamai, o lona uiga o lou iloa ma lou malamalama i le faiga o soo se mea. E tele ona uiga o le mafai ona faamatalaina ai le tagata a’oa’oina lelei, tele faailoga i aoga maua luga, e mafai foi ona faamatala ai le tamaititi e usitai ma amio lelei, ma e mafai ona faasino I se tagata e mamao lana tofa toe ola fetuutuunai. E taua le poto ae sili atu ona taua le poto pe a sao ma tonu au faaiuga fai, ma ia ola ma mata’u i le Atua.

Le poto lena o lo o taumafai le Aposetolo o Paulo e faamanatu atu i le Ekalesia i Korinito. Ua tupu tele le poto ma ua vaevaeina ai le Ekalesia ma mulimuli ai lava le tagata i le failauga e fiafia ai. O isi ua faimai o latou o Sa Apolo, o isi faimai o Sa Kefa, ao isi ua faimai o i latou o Sa Paulo. Le ala lea o le faamanatu a Paulo i fuaiupu na tatou faitauina, o le poto i lalo nei ma le poto a le Atua e mamao lava lona eseese, pei ona i ai le fuaiupu 27, “a e peitai ua filifilia e le Atua mea valea a le lalolagi, ina ia faamaina e popoto, ma

mea vaivai i le lalolagi ua filifilia e le Atua e faamaina ai mea malolosi.” Ae o le ogatotonu lava o le feau a Paulo i le Ekalesia o Korinito, o le poto sili o le Atua na faaalua e ala i le faaolataga na saunia e Iesu i luga o le Satauro. Na manatu ai tagata o le faasatauroina o se tupu poo se faaola o se vaaiga mauualalo lava lea i totonu o le sosaiete, peitai o le faamoemoe o le Atua, o le Satauro o le ata vaaia o le poto sili o le Atua alofa mo tagata uma. O le uiga tonu lea o le poto ina ia viia ai le Alii ae le o tatou lava, fuaiupu 31” O le mitamita ia mitamita o ia i le Alii.

Ua aoao mai lenei tala mo i tatou, o le Poto e le mai i lou atamai ua malaulau po o lou iloa o mea uma, ae maua mai i lou loto mauualalo ma fai e tusa ona fetalai mai o le Alii. E masani ona tatou faalogologo e ave lava le upu Poto i tagata e tele mea, peitai ua le o lenei le vaaia a le Atua e iloa le poto i au amioga ma au faaiuga e fai i aso uma. Tatou faatalitalia ai foi le faamanatuina o le fanau mai o le pepe o le kerisimasi o le faataitaiga sili o le poto e ala i lona loto mauualalo, o lona alofa na iu ai lava i luga le Satauro ma toetu manumalo mai le tuugamau ua maua ai lo tatou avanoa i le lagi.

GALUEGA FAATINO: Faatalatalanoaga

Faatonuga:

Faatalanoa le fanau poo le a so latou manatu e faatatau i le mataupu “O LE POTO” ma sona faatusatusaina i lenei vaiata ma mea o loo tutupu ai. Pe faamata o i ai le poto i nei

mea ua vaaia ma tutupu i nei aso. (example- luga social media, o fualaau faasaina, ma le le ava i matua.)

PESE: Pese ma Viiga: 182

A’OA’OGA:

1. O le mata’u i le Atua o le amataga lea o le Poto
2. E faaaogaina e le Atua mea vaivai e faatoilalo ai mea malolosi.

.....

ASO SA- 20 TESEMA 2026

MATAUPU- UA LIUTINO TAGATA LE UPU
(*The word became flesh*)

SINI: Ia malamalama le vasega o le liutino tagata o le Upu o le afio mai lava lea o Iesu Keriso e faamagaloina o tatou agasala.

TUSI FAITAU: Ioane 1:1 – 14

FESOASOANI MO FAIAOGA:

O le faamamafa lava ia o le feau o le Evagelia Ioane, o Iesu Keriso o le Atua, e eseese ai latou ma isi Evagelia pei o Mataio, Mareko ma Luka. E amata lava lana Tusi i le faamatala mai o Iesu Keriso e le o se tagata, o Ia o le Atua. O lona uiga o le liutino tagata o le Upu, o le Atua lava lea na foafoaina mea uma ua liutino tagata e ala mai ia Iesu keriso ina ia militino faatasi ma tagata.

O loo manino lava i le amataga o le mataupu na tatou faitauina, o le upu o Iesu keriso, sa i le amataga i le taimi o le foafoaga o le lalolagi matagofie. Peitai ua tupu tele le pogisa i le lalolagi ona o agasala tagata, lea na ala ai ona liutino tagata le upu ia Iesu Keriso ina ia mafuta faatasi ma tagata. Aua fai mai Ioane o Iesu o le malamalama e susulu atu i le pouliuli, ae lei manumalo ai le pouliuli. E ui i le le taliaina e tagata o lona afio mai, ae na Ia faataunuu lava lana galuega faaola mo tagata uma. O le ata vaaia o le Atua alofa na te saili lava le auala e faasaoina mai ai lana tagata na fausia i lona faatusa paia mai le pogisa o le agasala. Na tuua lava e Iesu ona mamalu ma ona Paia faaleAtua, ae afio mai ina ia militino faatasi ma tagata. pei ona i ai le fuaiupu e 14. O le liutino tagata o le upu, o le faamoemoe o le Atua ina ia latalata i ona tagata e momoli sao le feau o le Faaolataga ma le faamagaloina o agasala.

O le Kerisimasi tatou te faamanatuina ai le liutino tagata o le upu ina ua fanau mai Iesu Keriso. Ua le toe fetalai mai le Atua e ala i Perofeta pei e mamao lava se mea o i ai o Ia, ae ua auina mai lona Alo e toatasi ina ia tatou mafuta ma

faataitai i ai i ana amio. Na afioa mai Iesu Keriso I lenei lalolagi e faasusulu atu lona malamalama I e o loo ola pea i le pogisa o le agasala, ina ia tulai ma le loto salamo faamaoni e talia ai Iesu Keriso.

GALUEGA FAATINO: Faailoa mai sou lagona.

Faamatala mai i ou lava lagona le taua o le afio mai o Iesu Keriso i lenei lalolagi ma mafuta faatasi ai ma tagata agasala.

PESE: Hark! The Herald Angels Sing

Hark! the herald angels sing,
"Glory to the newborn King!
Peace on earth, and mercy mild,
God and sinners reconciled."
Joyful, all ye nations, rise,
Join the triumph of the skies;
With the angelic host proclaim,
"Christ is born in Bethlehem."

Hark! the herald angels sing,
"Glory to the newborn King!
Christ, by highest heaven adored:
Christ, the everlasting Lord;
Late in time behold him come,
Offspring of the favored one.
Veil'd in flesh, the Godhead see;

Hail, the incarnate Deity:
 Pleased, as man, with men to dwell,
 Jesus, our Emmanuel!
 Hark! the herald angels sing,
 "Glory to the newborn King!
 Hail! the heaven-born Prince of peace!
 Hail! the Son of Righteousness!
 Light and life to all he brings,
 Risen with healing in his wings
 Mild he lays his glory by,
 Born that man no more may die:
 Born to raise the sone of earth,
 Born to give them second birth.
 Hark! the herald angels sing,
 "Glory to the newborn King!

A'OA'OGA:

1. O le alofa o le Atua na ia auina mai ai lona alo pele e faamagaloina agasala
2. O Iesu Keriso o le malamalama e susulu atu I soo se mea pogisa o loo taotaomia ai le tagata.

.....

ASO SA: 27 TESEMA 2026

MATAUPU: TATALO MO LE FILEMU
(Pray for Peace)

SINI: Ia malamalama le vasega o le tatalo foi e silafia ai e le Atua le mea o i lou loto.

TUSI FAITAU: Salamo 122:1 – 31

FESOASOANI MO FAIAOGA:

O le tatou mataupu i lenei Aso Sa, “Tatalo mo se filemu”, o le tatalo o le auala e tatou te fesootai ai ma lo tatou Atua. Ua tatou iloa ma taulotoina foi le tatalo na aoao mai e lo tatou Faaola o Iesu Keriso, ina ia tatou tatalo ai pea i aso uma o lo tatou ola. O le tatalo foi e mafai ona vaevaeina i vaega e tolu, Faafetai, tatou te faafetaia ai le alofa le faatuaioia o le Atua mo i tatou, ua tatou maua ai le ola ma le malosi e faatino ai a tatou feau, ma usu atu ai foi i aoaoga, Faatoesega, tatou te faamaualalo ai i le Atua ona o tatou sese ma agasala e faia pea I lea aso ma lea aso, ma le Manaoga, e ta’u ai i le Atua mea tatou te mananao ai, o ana faamanuiaga, o lana faamalologa ma lona filemu moni mo i tatou. E taua tele le tatalo e silafia ai e le Atua o le mea o i totonu o tatou loto. E faapena le tatalo a le faisalamo o Tavita na tatou faitauina. Na amata lava le Salamo i le fiafia tele o Tavita i agaga tapuai o ona tagata I le Atua, ina ua latou faimai e o i le fale o le Atua. O le taimi lea ua i ai le ato la’au a le Atua i Ierusalema. O Ierusalema o lea ua fai ma taulaga o Isaraelu, ma ogatotonu foi o fefaatauaiga, aemaise o le gasolo mai ai o tagata e tapuai i le fale o le Atua. O le mafuaga lea o le tatalo o Tavita i le Atua mo se filemu, aua o Ituaiga e sefulu

ma le lua o Israelu, e i ai lava le felotoai ma le fematea'i i le nonofo ai. O le tatalo ina ia avea Ierusalema ma nofoaga o se filemu, ia maua ai le fealofani ma le lotogatasi o ituaiga e sefulu ma le lua o Israelu i lalo o le pule faamalumalu a le Atua. E le gata i lea na tatalo foi Tavita mo se filemu o lona nuu aua o lo o fetaiai pea ma faafitauli aemaise o tau faafefe mai o malo tetele. Aua e talitonu Tavita ua nao le Atua e maua ai le filemu ma le tele o manuia pea fai e lotogatasi ma aioi atu i le Atua.

Ua aoao mai lenei Salamo i le taua o le lotogatasi ma le omai faatasi e tapuai i le Atua ma le loto mama. O le tatalo a Tavita e le gata mo le saogalemu o le nuu o le Atua mai ona fili, ae mo le ola faaleagaga foi o tagata o Israelu ina ia tumau i le fealofani ae le o le felotoai. O le i ai o le filemu i totonu o le Maota o le Atua ma Israelu o le i ai lava lea o manuia o le Atua e faavavau. O lea ua maea ona tatou faamanatuina le afio mai le pepe o le Kerisimasi e faaola i tatou, ae o se feau taua lea mo I tatou aua le Kerisimasi lenei tausaga, toaga e tatalo ma faailoa i le Atua soo se mea e te manao i ai.

GALUEGA FAATINO: Tusigasolo

Tusi mai sau solo i le autu o le mataupu o lenei taeao: Tatalo mo se filemu. Tau o le 2 fuaiupu, ae tai 4 laina i le fuaiupu e tasi.

PESE: Ia manuia le Kerisimasi

A'OA'OGA:

1. O le tatalo o le auala e te fesootai ai i le Atua.
2. E tali le Atua i lau tatalo i le taimi e finagalo ai.

.....

MANUIA LE KERISIMASI MA LE TAUSAGA FOU